

OOSANA AROO UFAFA

Maa maqa maaqana faqa faiqi faqa auqu ufafa.

¹ Oosana kuradoo aukuanna Anutufa sia maru ainainannai mirisinnaarunna faqa maa maqana faqa oosana arasee auqinau.

² Mi aukuanna maa maqafa fifau faafau inoo marufanoo, asukuna firaafa rafaafafinoo marufanoo Anutuna maraquna fannoo nammari amuaqumau ufaira foora uqidanoo oonuree aniree imarinau.

³ Mi faasaanna Anutufa qinau, kaaqa qaranara marianne qufanoo kaaqa qarafa kambiqanau.

⁴ Kambiqafufanoo qafamaseenoo amiqimambinoo qimaseenoo kaaqa qarana faqa asukuna faqa aadu aadu rakeemma quqanau.

⁵ Rakeemma quqaseenoo qafamaseenoo Anutufa kaaqa qaranara faasaanee qinau, asukunara eendaki fee qinau. Miqi qimasoofanoo mikari indaaruu oosana araseenoo eendirafa naaree anireenoo aiqarroofanoo iaqarafa aniroofanoo mifa mi iaqarafa faqa mi eendirafa faqa indaaruga faasaana marinau.

⁶ Mina inaaqianaa faasaana Anutufa kaifaa qinau. Innaaruna kaqi saqanna rainafinanoo nammari mirinni faqa mianni faqa aadu aadu rainanoo marianifeera qufanoo miqimminau.

⁷ Miqi qimaseenoo Anutufa innaaruna kaqi saqanna auqu quqaseenoo nammari raina mianni faqa mirinni faqa quqanau. Quqasoofanoo doo miqinoo marinau.

⁸ Anutufa mi kaqi saqanna auqureenoo inaarunee qinau. Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa inaaqianaa faasaana marinau.

⁹ Qaaramoo faasaanaikufanoo Anutufa kaifaa qinau. Maqasaa nammari suqufinoo moodaanaki mandi finanoo maqa aadana koorooianifeera qimasoofanoo miqimminoo marinau.

¹⁰ Anutufa aadanaikunara maqa fee qinoo auquranau. Nammari moodaanaki suqunara ooruku nammari fee qinoo auquranau. Miqi qimaseenoo doo andeeqafiifoo qimaseenoo asasinau.

¹¹ Asasammaseenoo fuka maqasaara Anutufa qinau. Andanda oosana oosana kambigaani, oosana oosana andanda neemaru ainainna aqama faqa kambigaanni, oosana oosana aqama ireemari saqarisa faqa kambigaannee qufanoo miqimminau.

¹² Maqa fannoo, oosana oosana andanda faqa saqari faqa maqanau. Maqasoofanoo Anutufa aiquqummaseenoo doo amiqimminoo fee qimasee asasinau.

¹³ Miqimmasoofanoo eendirafa aiqaroofanoo iaqarafa aniroofanoo mi iaqarafa faqa mi eendirafa faqa qaaramookinau.

¹⁴ Anutufa kaifaa qinau. Innaarunai qooma oosana oosana kambigaafinana, suani faqa quqoona faqa fasau faqa iaqarana faqa asukuna faqa rainaanifeera qinau, iaqarafa faqa aukuna faqa amaana suqirana oosana areemariana

uqannifiqaani fee qinau.

¹⁵ Mi qoomausa innarunaindari maqasaa kaaqa qamannimaqaani qufanoo miqimminau.

¹⁶ Miqi qimaseenoo Anutufa firaa qoomatiaqara suani faqa quqoona faqa miqanda quqanau. Firaa qooma suaniara anee faasaana rakisinnimaqaannee qinau. Kaqikaa qoomara quqoonara anee eendaki rakisinnimaqaannee qinau. Fasau namu faqa auqu quqanau.

¹⁷ Anutufa mi qoomausa innaarunaindari maqasaa kaaqa qaanifeera quqanau.

¹⁸ Eendaki faqa faasaana faqa rakisidanoo asukuna faqa kaaqa qarana faqa rainaanifeera quqanau. Anutufa quqaseenoo aiqum-maseenoo doo amiqimmafinoo fee qimasee asasinau.

¹⁹ Miqimmasoofanoo eendirafa aiqarroofanoo iaqarafa aniroofanoo mi iaqarafa faqa mi eendirafa faqa qaara faqa qaara faqaikinau.

²⁰ Anutufa kaifaa qinau. Aiqama nammariki maria ainainausa oosana oosana kambiqaaani, maqa mirinni kaqi saqanna oosana oosana ufinuqa qumbiqaaq maridaqa qaqaqa nuaqa.

²¹ Miqi qimaseenoo Anutufa ooruku nammariki maria firaa aandausa faqa oosana oosana ainaina faqa auqu quqanau. Ufinuqa oosana oosana faqa auqu quqanau. Auqu quqaseenoo aiqum-maseenoo amiqimmiifoo qimasee asasinau.

²² Miqi qimaseenoo Anutufa narí afaaqooqa qimannimaqeenoo qinau. Inni asumu moomoo kambiqafiqaa ooruku nammarki qumbiqaaqaa

mariaqa. Mifa ufiniuqara faqa moomoo kambiqafi mariaqee qinau.

²³ Miqi qimasoofanoo eendirafa aiqarroofanoo iaqarafa aniroofanoo mi iaqarafa faqa mi eendirafa faqa moodaannai qisaukukinau.

²⁴ Miqimma fufanoo Anutufa qinau. Maqa fannoo oosana oosana kasirana faqaa aandauqa maqaani. Maaqeenaa aadau faqa kaasau aadau faqa firaana faqa kaqikaana faqa maqa fannoo maqaani qufanoo miqimminau.

²⁵ Miqimmaseenoo Anutufa mi aiqama ainainausa auqu quqaseenoo amiqimmafinoo qimaseenoo asasinau.

²⁶ Miqimmaseenoo Anutufa kaifaa qinau. Maasa faiqí naanna faqaasa auquanaura, maasa qimana kai maasa qeeqa fooqaana auquanaura. Misa ooruku nammariki noodaanna ainaina faqa sandaaqai qaqaamaree nimaria ufinisa faqa maaqeenaa aandauqa faqa kaasau aandauqa firaanauqa saa faqa kaqikaanauqa saa faqa rakisianifeera auquanaura.

²⁷ Miqi qimaseenoo Anutufa faiqí narí fooqaa irana kai auqinau. Faiqí faqa anaasee faqa naumoo faqaa qanda auqinau.

²⁸ Auquseenoo Anutufa nifaaqooqa qinoo qinau. Inniqara asumu moomoo kambiqeeqa maa maqa maaqanaki qumbiqafiqa rakisiaqa. Qinee inniqara mareeqee ooruku nammariki noodaanna faqa ufiniuqa faqa aiqama kaasau aandauqa rakisirausaika mannimaqaanaura.

²⁹ Anutufa kaifaa qinoo qinau. Inni narana sakummara foora ireemarina oosana oosana

faqa oosana oosana saqari aqama faqa naaqeera nimidaqa.

³⁰ Doo qinee aiqama kaasau aandauga faqa ufiniuga faqa andanda faqa nariqa neemaria saqari amaneesa faqa naaqeera qinee nimidaqa. Miqi qimasoofanoo miqimminoo marinau.

³¹ Doo Anutufa narí auqu quqasoo aiqama ainainauqa qafamaseenoo firaqoo asasinau. Miqimmaseenoo eendirafa aiqarooranoo iaqarafa aniroofanoo mi iaqarafa faqa mi eendirafa faqa moodaannai qisauku taikasee dinni moodaa marasee 6 faasaanaikinau.

2

¹ Miqimmaseenoo Anutufa aiqama innaaruna faqa maqa faqa auqu taikanau.

² Dinni taikasee dinni oonu qaaraqanda marasee 7 faasaana Anutufa narí ainainirana taikanau.

³ Dinni taikasee dinni oonu qaaraqanda 7 faasaanara Anutufa afaaqooqa qimasee, aaduma naaquqara faasaanee qinai. Narí kadaapirirana mi faasaanna taikoonara mi faasaannara naaquqara faasaanee qimasee idooanau.

Adamafa faqa Eewafa faqa.

⁴ Miqimmaseenoo Anutufa innaaruna faqa maqa faqa auqinai.

⁵ Indaaru karaambaiqa Anutufa maa maqana faqa miri innaaruna faqa auqu aukuanna aaku sia maqasaa quqoonara oosana oosana andanda qaqama sia kambiqanau. Faiqí maqa apaurirafa faqa sia marinai.

⁶ Mikamuqoo nammari fannoo maqakiqari urureenoo aiqama maqa maaqa uqeena amaqaanau.

Eedeena saqama ufa.

⁷ Mikari karaambaiqa Anutufa maqa quma-reenoo faiqí minannoo auqinau. Auquseenoo marirana nimi maru aidoona aikaamarai fuaqa-soofanoo mi fasiqafa kasirana maranau.

⁸ Mi fasannai Anutufa suani afu oosana Eedeenna maqa maaqaki kadiqa firaana auquseenoo narí auquqoo fasiqana minaki quqanau.

⁹ Anutufa oosana oosana amiqira saqariara qufanoo minaki kambiqafufaqa amiqira aqama iraqau. Kadiqa qambaana saqari qaaraqanda marinau. Moo saqari fannoo marirana nimi maru saqarifa marinau. Kafaa moo saqari fannoo mandainainara faqa amiqira ainainara faqa irimaria iriranna nimimarufa marinau.

¹⁰ Nammari moo fannoo Eedeena maqa maaqakiqari qumureenoo kadiqa qambaana maqa uqeena uqeena ianifeera qumiqareenoo qaara faqa qaara faqaki raina fufanoo ooqufinau.

¹¹ Moo amara auqu Pisona nammari fee qiqau. Mifa Qafiraa maqa maaqa atindannai ooqu finau.

¹² Miqoo koora amiqirafa maridanoo, amiqira afundi maru saqari anoonafa faqa miqoo marinau. Firaa feefauru aqimaria oonifa faqa miqoo marinau.

¹³ Kafa moo amara auqu Kiqoona nammari marinau. Mifa Kusa maqa maaqa atindanai qumifi marinau.

14 Kafa moo amara auqu Taikirisa nammari marinau. Mifa Asiria maqa maaqa suani oosana qaannai atindanai qumi marinau. Moo amara auqu Eeufarateesa nammari marinau.

15 Karaambaiqa Anutufa nari auquqoo fasiqana mareeqee Eedeena kadidakina quqanau. Kadidaki maqa apauridanoo aiqama ainainasaa mi kadidanaki rakisianifeera quqanau.

16 Anutufa quqaseenoo mi fasiqana maaqi qimaseenoo aakapanau. Anee kadidakina aiqama saqari qaqama diqisee naannee qinau.

17 Moodaa saqariara kai qinee qaoo qidaqa. Manda ainainara irirana faqa amiqira ainainara irirana faqa nimi mari saqarina kai sia naa. Anee namaseenana mikari kai kuqinnaranoo.

18 Mi fasannai karaambaiqa Anutufa mi fasiqanara qinau, maa fasiqafa nariaraa marifanoo siamma andeeqaidanoo. Qinee mina aqoonnana auqusaananoo mina dadaaqiannoo.

19 Anutufa maqa qumareenoo minannai aiqama aandau faqa ufiniuqa faqa auqinau. Auquseenoo aiqama naarammeeqeenoo faiqi maruqoo nuquraanifeera quqasoofanoo nana ainainee auquroofa doo mi nuquna faqaasa mariqau.

20 Miqimmaseenoo faiqi fannoo kooqikinaa aandauqa faqa kaasau aandauqa faqa ufiniuqa faqa nuqu rama quqanau. Miqiga marufanoo Anutufa mi fasiqana aqoonnanaikiranara misaki randeenoo sia paqurinau.

²¹ Minara faiqarana faiqí aminau. Faifufanoo Anutufa mina aqaasana moodaa tatuseenoo mina amaqinnai minaki ititanau.

²² Ititaseenoo karaambaíqa Anutufa mina aqaasanannoo anaasee auqinau. Auquseenoo faiqí maruqoo afiqee finau.

²³ Quqasoofanoo faiqí fannoo qafamaseenoo qinau.

Doo maqee uqanna qini fooqaairafa uqanna maridanoo,
amudaani qini qimudaani kinaafa,
amaqi qini qimaqinnai auqirafa,
qinee minara anaasee fee qimasee
auquraanaura,
mifa faiqí kinaafa marinara miqi qimasee auqu
raanaura.

²⁴ Minara kai faiqí narí anoona akoona minnisee narí anaqa faqa moodaanaki mafi moodaara foora maridaqa.

²⁵ Mi fasiqafa narí aanaaqandiri kaqisamu maruqanda mariqau, sia nariara nariara nisauri mariqau.

3

Faiqi anaasee Anutuna ufa rukiqoo ufafa.

¹ Karaambaíqa Anutufa aiqama aandauqakina auquqoona qambaaindari sakani mifa nikaru qira ufa akoofasa marinau. Mifa anaasee iramirinoonoo qinau. Kuqaa fee Anutufa saqariuqaki aiqama qaoo qinoo fee sia naaqee qinoo fee.

² Mi anaaseefa minara iriseenoo qimaminau. Eeoo aiqama maa afuqanakinaa saqari naaqee qifaqa naidaqa.

³ Kadiqa qambaanai moodaa saqariara sia naaqee sia auqaaqee qifaqa sia naidaqa. Maasa namaseeqa kuqunaauranoo.

⁴ Sakani mina ufa iriseenoo anaasee akaru qinoo qinau. Namasee sia kuqinnara unnaqidanoo, anee sia kuqinnaranoo.

⁵ Anutufa minara iridanoo qaoo qinoo. Innee mi saqari aqamana namasee Anutufara foora maridaqa manda ainainara faqa amiqira ainainara faqa irifoor.

⁶ Anaasee sakani ufa iriseenoo mi saqarina afu qafamasoofanoo amiqirafa marufanoo aqama faqa qafoofanoo idaaqirafa marufanoo amiqira ainainara iriranara faqa manda ainainara iriranara faqa irufanoo amiqufanoo mi saqari aqamana diqiseenoo neenoo nari afaaqi faqa amufanoo nanau.

⁷ Miqanda namasoofanoo mikari miqanda nifusaa irirafa kambiqoofaqa nari nifaaqa qafamasee kaqisamu maridee qimaseeqa nisauruseeqa saqari amanee didiqi amanee fooqaana qumaree akunuseeqa nari nifaaqasaa ititaqau.

⁸ Mi faasaanna eenaanianna asooaa asooaa imarufanoo Karaambaiqa Anutufa kadidai nimarufaqa faiqi faqa anaasee faqa iriqaqara saqariuqaki nisaurusee kukeeqaqau.

⁹ Karambaiqa Anutufa faiqi aaramasee anee yaiffee qufanoo mifa qinau.

¹⁰ Anee kadidai nuanaqa qinee iriseeqa kaqisamu mariunausa rufiseeqa saqariuqaki kukeeqaidaqa.

11 Miqi qufanoo Anutufa qinau, yafee ani kaqisamu mariannanara qimaminoo fee. Anee saqari aqama qinee qaoo qunnana neenanee.

12 Faiqí iriseenoo narí qimaminoo qinau. Maa anaaseefa qini faqa marifa anee qimunafa mifa qimifaqa neeqa.

13 Miqi qufanoo karaambaiqa Anutufa mi anaaseena iramirinoo qinau. Anee nanaree maa oosanna mareenanee. Mi anaaseefa iriseenoo qinau. Sakani fannoo anireenoo qini qikaru qifaqa neeqa.

Anutufa manda afaaqooqa faiqí faqa anaasee faqa sakani faqa niminau.

14 Karaambaiqa Anutufa mina iriseenoo quandafinoo mi sakanina manda afaaqooqa qimamaqeenoo qinau.

Anee maa anaaseena akaru qiannanara mina akiqara aiqama aandaugakiqari anee kai maa manda afaaqooqana mareennaranoo. Anee maqamau amuaqundari nidana kookoomma nananua.

15 Qinee qianaqa maa anaaseefa faqa anee faqa nariara nariara fidiqaa ifaranoo.

Inniqara faiqinamu naaruara namuqaa mari-faranoo.

Mi anaaseena asumu kiqari moodaa fannoo ani akiqara radamuannoo. Anee mina asumu kinaana aiku ataa ukaqa aminnaranoo.

16 Anutufa maaqi qimasee anaasee afaaqooqa qinoo qinau.

Anee amuaquqa faqa marinaqa umaara fi-raanaikamma amaqaanaura.

Miqimmaseeqa faiqi maqaraqoo faqa aupurarana amianaaura. Ani aundura fannoo aneenna afaaqiara rida marinnaranoo.

Ani afaaqi fannoo ani uri aaqararafa marinana anee mina ureeqarafa marinnaranoo.

¹⁷ Miqi qimaseenoo Anutufa quandafinoo faiqi afaaqooqa qinoo qinau.

Anee aneenna anaqa ufa iriseena qinee qaoo qunna saqarina qaqama naananoo.

Minara maa maqana aqurarasaanana anee kadaapi ridana arirana rakeeidana maa maqanaki ummaqusee naida maria.

¹⁸ Nimmuru faqa amuka faqaa ainaina faqa maqakiqari kambiqannoo. Anee kaasau andanda neennaranoo.

¹⁹ Anee tooqaamu arimarinana kadaapirumaisaidana maa maqanasaa narana kambiqaisaidana nana fiifinana kuqinana maqaki ani auquafannanaki finnanaroo.

Ani maqannai auquqaafanafa marianafa marianaroo. Anee maqa marianaroo kaifaa maqaikamma finnanaroo.

²⁰ Faiqi fannoo narí aanaaqara maqasaa qaraa fasiqa anaasee ninoo fee qimaseenoo auqu Eewanee qinau. (Mi auquna oosana aiqama faiqi faiqi ninoo fee qidanoo.)

²¹ Karaambaiqa Anutufa aandau apata qumareenoo minannai qamunnara foora auqeeqeenoo Adamana faqa narí anaqa Eewana faqa niminau.

Anutufa Adamasa Eewasa kadidakiqari niqiqanau.

²² Miqimmaseenoo Karaambaiqa Anutufa qinau. Maqee faiqí faiqi maafa maasara foora maridaqa aaqara oosanara faqa andeeqara oosanara faqa iridaqa. Maasa sia miqandara qianaqa naaru marirana nimimari saqari aqamana diqisee neefaranoo. Diqisee namaseeqa naaruara marifoor.

²³ Karaambaiqa Anutufa minara iriseenoo Eedeena kadidakinaana doo miqanda nifaqaseenoo qinau. Inneeqara inni auquafanna maqanasaa maridaqa maqa auqamasaidaqa narana paquriaqa.

²⁴ Anutufa Eedeenna kadidakiqari Adamasa Eewasa niqiqoofaqa fufanoo suani oosana qaannai kadida atinni naaru marira saqari fainnai fimaru aannanasaa angiroouqa quqasoofoqa ida auru arira paipana uaqeeidaqa faiqí minni fi-foora ruki tataaka imariqau.

4

Kainasa Abeerasa ufa.

¹ Adamafa narí anaqa Eewana faqa aana numasoofanoo amuaqu qaikinoo faiqi maqaseenoo mina auqu Kainafee qinau. Maqaseenoo Eewafa qinau, Anutufa dadaaqifaqa qinee faiqi akoonaiqi maqeeqa.

² Kafa mariufanoo faiqi moo maqaseenoo mina auqu Abeerane qinau. Abeerafa innooqafinoo kooqikinaa aandausaa rakisirafa marinau. Mina afasaafa Kainafa innooqafinoo afuqakina ainaini marufa marinau.

³ Mariufanoo moo kari Kainafa narí afuqakinnaa ainaina maraseeoo Anutuna tatufirana suqa aminau.

⁴ Abeerafa mifa faqa Anutuna tatufu amiraree qimaseenoo narí firimaru aandausakinaana ooqasaa maqarana afaaqafaqaana aruseenoo amiqira afaaqa kai tatufirana suqa aminau. Abeerana tatufirana Anutufa qafeenoo amiqira fee qimasee asasinau.

⁵ Kafaa Kainaindi qafamasee minnisana. Kainafa mina qafoofanoo firaqoo arana qoofanoo oori runinau.

⁶ Anutufa Kainana qafamaseenoo qimaminau, nanaree ani arana qaidanoo fee. Nanaree ani oori mianni qumidanoo fee.

⁷ Anee amiqira ainaina auqeenanau asasa mi-anaiqini. Anee mandainaina auqaannanara numoo fannoo ani kooqiki ani amaara usinoo maridanoo. Mifa ani rafaqa firarinana anee mina uraaqaraa.

⁸ Miqi qimasoofanoo Kainafa narí akaqa Abeerana qimaminoo qinau. Aninaqa aana fua. Miqanda moosaa oonureeqa Kainafa narí akaqa Abeerana kuqa arinau.

⁹ Arusoofanoo Anutufa Kaina iramirino qinau, ani akaqa Abeerafa yaifee maridanoo fee. Qufanoo Kainafa qinau, Abee qinee sia iridaqa, anee qiniara narí akaqasaa rakisimarifee fee qidanee.

¹⁰ Anutufa mina iriseenoo qinau. Kaina anee nanee mareenee. Anee iria, aneenna akaqa fidika maqasaa teeqiananoo. Mi fidikafa

mina akiiqara iannee qimasee maqakiqari qini daaraifaqa iriqa.

¹¹ Anee aneenna akaqa fidika maa maqanasaa teeqiananoo maqa qoo raqafinaki ani akaqa fidika minaki keeqeenoo. Minara qinee ani aqurara ufa ameemaanai quqaidaqa. Anee sia kaifaa maqaki narana ummaqusaida neennaranoo.

¹² Anee narana ummaqusainanoo maqa fannoo sia ani narana amiannoo. Minara anee maaqa siainafa maridana aiku quqirafa maaqa maaqa kaqi ninnaranoo.

¹³ Kainafa minara iriseenoo Anutuna qimaminoo qinau. Anee qummaara firaana qini qimiananoo sia qinee amana uqeeraanaura.

¹⁴ Qinee maa maqanasaa ani afusaa marunnana anee diqiqaanaqa qinee qiku quqirausa aiqamatinau nuanaura. Qinee maaqanna maaqanna dapikiqa nuananoo yafee qini qiqaafainafa mifa kuqa daruannoo.

¹⁵ Karaambaiqa minara iriseenoo qimaminoo qinau. Sia miqifara, faiqi moo fannoo yafee ani arinnana qinee mina akiiqara dinni taikasee dinni ani qaaraqanda marasee naruanaura. Miqi qimaseenoo karaambaiqa Kaina afaaqasaa sia aruaqee akara quqanau.

¹⁶ Miqooqari Kainafa Anutuna oorisaaqari finoo Eedeena kadida aaqaqari suani oosana qaannai moo maqa maaqai mina auqu niku quqirausa nua maqusa fee qimarunnai finau.

Kainana aiku asauku nuqu.

¹⁷ Miqoo oonureenoo Kainafa nari anaqa faqa faiqi moo akoonaiqi maqaseenoo mina auqu

Eenookanee qinau. Kainafa narí anaaga faiqi maqoo kari maqusa moo auquseenoo mi maqusa auqu narí amaaku amaranaikinoo Eenooka maqusa fee qinau.

¹⁸ Eenookafa faiqí kammafinoo akoonaiqi Iradana maqanau. Iradafa faiqí kammafinoo akoonaiqi Meequyaeerana maqanau. Meequyaeerafa faiqí kammafinoo akoonaiqi Metusaeerana maqanau. Metusaeerafa faiqí kammafinoo akoonaiqi Rameekana maqanau.

¹⁹ Rameekafa faiqí kammafinoo qaara anaasee maranau, moonau auqu Adaa nammarifa moonau auqu Siraa nammarifa mariqau. (Adaa nammarina auqu oosana amiqira fee qimaqoofa marinau. Siraa nammarina auqu oosana auqaana fee qimaqoofa marinau.)

²⁰ Indaaruga anaasee auqu Adaa nammarifa faiqi moo Yabarana maqasoofanoo findifinoo aandau apatannai uiqaana maqa usakasaida nimarusa nikoofa marinau.

²¹ Yabarafa firimaru aandausasa rakisi marusa nikoofa marinau. Yabarana akaqa Yubarafa marinau. Mifa findifinoo qufireena fuagee marusa faqa piripunna arimarusu faqa nikoofa marinau.

²² Rameekana inaaqiana anaasee moo Siraa nammarifa marinau. Mifa akoonaiqi Tubarakaina maqasoofanoo findifinoo koopaannai faqa qainnannai faqa ainaina auqimarufa marinau. Tubarakainana auna auqu Naammaa nammarifa marinau.

²³ Rameekafa narí aanaaqaqara maaqi qimasee qimanniminau.

Adaa nammarisa Siraa nammarisa qini ufa iri-
aqa,

Qinee Rameekausa qini qinaaqaqara ufa qianaqa
amiqimmasee iriaqa.

Faiqí moo fannoo kaakadi darifaqa qinee mina
kuqamma ariqa.

Asauku samu qini darina akiiqara mi
kumaaraana kuqamma ariqa.

²⁴ Moo fannoo Kainana arinnana akiiqara Anut-
ufa dinni taikasee dinni ani qaara marasee
7 fasiqa naruannoo. Moo fannoo qini
Rameekausa darinnana akiiqara Anutufa
fiqaramasee 77 fasiqa naruannoo.

Seetana aiku asauku nuqu.

²⁵ Adamafa kaifaa narí anaaqa faiqi mara
amisoofanoo amuaqu qaikinoo akoonaiqi moo
maqaseenoo mina auqu Seetanee qinau. Miqi
qimaseenoo mina anoofa qinau. Anutufa qini
qimaaku moo qiminoo narí afasaana Abeerana
amaaqa maqaanifeera qiminoo mifa Kainafa
aruna amaaqa maqaannoo.

²⁶ Seetafa innooqafinoo akoonaiqi Eenoosana
maqanau. Eenoosafa maru kamuqooqari oosana
arasee misa Anutunara innaaru qidaqa minara
naaqura Karaambaiqee Yaawee fee qidaqa in-
naaru qimariqau.

5

Adamana aiku asauku nuqu.
(1 Stori 1:1-4)

¹ Adamana aiku asauku misa oosana maaqim-masee akaraki marinau. Anutufa indaaru narí amana kai faiqí anaasee auqinau.

² Naumoo faqaa qanda auquseenoo nifaaqooqa qima nimaqaseenoo faiqí anaasee fee qimasee nuqu ranau.

³ Adamafa aukuaana 130 marasoofanoo mina amaaku Seetafa kambiganau. Narí akoona fooqaafa mina amana kai marinau.

⁴ Seetana maqookari oosana araseenoo Adamafa 800 aukuaana maranau. Mi kamuqoo akoonaiqi maanaaqa faiqi namu moomoo Adamafa maqanau.

⁵ Adamana aukuaana aiqama 930 maraseenoo kuqinau.

⁶ Seetafa 105 aukuaana maraseenoo akoonaiqi Eennoosana maqanau.

⁷ Eennoosana maqoo kamuqooqari Seetafa 807 aukuaana maraseenoo mi kamuqoo akoonaiqi maanaaqa faiqi namu moomoo maqanau.

⁸ Seetana aiqama aukuaana 912 maraseenoo kuqinau.

⁹ Eennoosafa 90 aukuaana maraseenoo akoonaiqi Keennana maqanau.

¹⁰ Keennana maqoo kamuqooqari Eennoosafa 815 aukuaana maraseenoo mi kamuqoo akoonaiqi maanaaqa faiqi namu moomoo maqanau.

¹¹ Eennoosana aukuaana aiqama moodaanaki 905 maraseenoo kuqinau.

¹² Mina amaaku Keennafa 70 aukuaana maraseenoo akoonaiqi Maqarareerana maqanau.

13 Maqarareerana maqoo kamuqooqari Keennafa 840 aukwana maraseenoo mi kamuqoo akoonaiqi maanaaqa faiqi namu moomoo maqanau.

14 Keennana aukwana aiqama moodaanaki 910 maraseenoo kuqinau.

15 Mina amaaku Maqarareerafa 65 aukwana maraseenoo akoonaiqi Yareedana maqanau.

16 Yareedana maqooqooqari 830 aukwana maraseenoo mi kamuqoo akoonaiqi maanaaqa faiqi namu moomoo Yareedafa maqanau.

17 Maqarareerana aukwana aiqama moodaanaki 895 maraseenoo kuqinau.

18 Mina amaaku Yaareedafa 162 aukwana maraseenoo nari amaaku Eennookana maqanau.

19 Eennookana maqooqooqari Yareedafa 800 aukwana maraseenoo akoonaiqi maanaaqa faiqi namu moomoo maqanau.

20 Yareedana aukwana aiqama moodaanaki 962 maraseenoo kuqinau.

21 Mina amaaku Eennookafa 65 aukwana maraseenoo akoonaiqi Meetuseerana maqanau.

22 Eennookafa 300 aukwana Anutuna aqoondikiranaki maridanoo akoonaiqi maanaaqa faiqi namu moomoo maqanau.

23 Eennookana aukwana aiqama moodaanaki 365 aukwana maranau.

24 Eennookafa sia kuqinau. Kaaqa Anutunara rimarufa marufanoo Anutufa kaqimma afiqa-soofanoo sia sia inau.

25 Eennookana amaaku Meetuseerafa 187 aukwana maraseenoo akoonaiqi Rammeekana amarana maqanau.

²⁶ Rammeekana maqooqooqari mina akoofa Meetuseerafa 782 aukuaana maraseenoo akoonaiqi maanaaqa faiqi namu moomoo maqanau.

²⁷ Meetuseerana aukuaana aiqama moodaanaki 969 aukuaana maraseenoo kuqinau.

²⁸ Meetuseerana amaaku Rammeekana amarafa 82 aukuaana maraseenoo akoonaiqi maqaseenoo qinau.

²⁹ Anutufa maa maqa maaqana aquraraqoofaqa maasa kadaapi ridaqa. Maa faiqifa kadaapiriranaki marunnana asooarana qimiannoo fee qimasee mina auqu Nooa nee qinau.

³⁰ Nooana maqooqooqari mina akoofa Rammeekafa 595 aukuaana maraseenoo akoonaiqi maanaaqa faiqi namu moomoo maqanau.

³¹ Rameekana aukuaana aiqama moodaanaki 777 maraseenoo kuqinau.

³² Mina amaaku Noofa 500 aukuaana maraseenoo miqooqari akoonaiqi qaaramoo maqanau. Misa nuqu Seemmana faqa Qammana faqa Yafeetana faqa maqanau.

6

Faiqi anaasee manda ainaina mareeu ufafa.

¹ Mi fasannai faiqi anaasee moomoo kamambufaqa maqa maaqa itita fiqa maridaqa misa maanaaqauqa moomoo maqaqau.

² Maqasaa fasiqauqa Anutuna faiqi namu mi manaaqausa nindafoofaqa nifu noori amiqirausauqa kai marufaqa nari nidimarusa maree mariqau.

³ Miqi marufanoo Anutufa qinau. Qini maraƣuna naaru naaru sia faiqiki mariannoo. Misa fifau faiqí faiqi marianara kisaaga aukuaana atekasee qusa aukuaana nimianaúra, 120 aukuaana kai nimianaúra.

⁴ Mikari faqa kasooqaaee faqa maqasaa fasiqauqa Anutuna faiqi namu faiqí niraamuna maraqa ninii soofaqa faiqi maqee mariqau. Mi faiqisa nimudaani faqaasa murusaqa arirausa maa maqanasaa maridaqa nuqu faqaasa mariqau.

⁵ Anutufa aiqama maqasaaqaraasa nindafoofaqa misa marirafa faqa irirafa faqa mandaika uqanna inoo marinau.

⁶ Miqiqa marufanoo Anutufa firaqoo misa mi manda oosannara irinau. Mifa faiqí auqu maqasaa quqoonara irufanoo aundura mandaikufanoo akooqoofanoo qinau.

⁷ Maa oosanausa qinee auquafanausa maa maqanasaa qaraana qinee aiqama ruka aqusaanaura. Faiqí faqa ufini aandau faqa aiqama ruka aqusaanaura qinee misa auquafannanara qikooqaidanoo.

⁸ Anutufa Nooanara kai asasinau.

Noofa firaá sipa auqu ufafa.

⁹⁻¹⁰ Nooana oosana maaqimminoo marinau. Noofa kai sia aaqarana marufa marinau, narí faqa marusakiqari naríara andeeqarafa marinau. Mifa kai Anutuna aqoondikiranaki marinau. Mina amaaku qarammoo namu mariqau. Misa nuqu Seemmafa faqa Qammafa faqa Yafeetafa faqa mariqau.

11 Aiqamausa Anutuna afusaa mandainainaki mariqau. Faiqí narari nararirafa aiqama maqa maaqaki qumbiqanoo marinau.

12 Anutufa aiqama maqa maaqaki qafóofanoo mandaika uqannamminoo marinau. Faiqí anaasee aiqama mandainainaki kai mariqau.

13 Miqíqa marufanoo Anutufa Nooana qimaminoo qinau. Faiqí narari nararirafa qumbiqanoo marinara qínee aiqama fasiqa anaasee naru taikaanauree qidaqa.

14 Nooa, anee amiqira saqarinnai firaa sipa auqua. Mina aunduraki moomoo rumma auqua. Aunduraki faqa adisaa faqa koorootaqa qumaree akusainanoo ititaani.

15 Anee sipa maaqimasee auqua. Mina kisaaga fannoo Aarinnonna nammarikiqari Siara Doona nammariki amanasaa 130 metres mina kisaaga mariani. Mina qusa fannoo 22 meters sia kisaaga uqanna marinau. Mi sipana maqasaqari maaqa akiiqa amanasaa 13 metres mariani.

16 Asaana qumeeqarana ameemaanai apootaana kaqi mariani 0.5 metre mariani. Sipa qaqaasanai firaa kooqi auquseenana sipa aundurai maqasaa tida rua, mina murufi qambaanai moo tida rua, mina maariqoo moo tida rua.

17 Anutufa kaifaa Nooana qimaminoo qinau. Qínee nammari mareeqee quqasaanoo firaaqoo aúfinoo aiqama kasimari ainainausa naru taikaannoo. Aiqama maqasaa maria ainainausa faqa kuqu taikeefaranoo.

18 Ani faqa kai moodaanaki kira ufa qianaura.

Aneenna anaafa faqa aneenna faiqi namu faqa misa ninaaqmaaka faqa sipaki keeqafi mariaqa.

¹⁹ Anee aandau oosana oosana mareeqee sipaki quqaa. Oosana oosana qaara kai qaara kai akoona faqa anaasee faqa apammasee sipaki quqasainaqa ani faqa asumu mariaqa.

²⁰ Oosana oosana ufini faqa qaara kai qaara kai mara quqasainaqa ani faqa asumu mariaqa.

²¹ Anee oosana oosana narainaina misaindi faqa aneennaindi faqa mara sipaki quqaa.

²² Nooafa Anutuna ufa iriseenoo mifa qundee kai inau.

7

Nammari auflu ufafa.

¹ Karaambaiqa Nooana maaqi qimasee qimaminau. Anee aneenna aiku asauku faqa sipaki keeqaa. Maqa saaqaarasakiqari anee kai aneenaraa andeeqarafa mariana qafaidaqa.

² Innee qini qifusaa anukara aandau fee qimariana qisauku dinni taikasee dinni oonu qaara marasee 7 akoona faqa anaasee faqa ani faqa sipaki mareeqee quqasainaqa asumu mariaqa. Innee qini qifusaa sia anukara aandau oosana oosana akoona faqa anaasee faqa moodaa kai mareeqee minaki asumu quqasaina mariaqa.

³ Aiqama ufini oosana oosana dinni taikasee dinni oonu qaara marasee 7 akoona faqa anaasee faqa mareeqee sipaki quqaa. Miqimmasainaqa aiqama aandau ufini kaifaa maa maqanasaa moomoo kiaqa.

⁴ Dinni taikasee dinni oonu qaaraqanda marasee 7 faasaana aiqarainaga miqoo aaku maqasaa quqaanaura. Qaara fasiqa niku nisauku taikasee 40 faasaana faqa eendaki faqa aaku rida mariannoo. Miqi marinaqa qinee maqasaa aiqama naanna faqaasa qeeqa auqu nisaafanausa taika nisaanaura.

⁵ Nooafa aiqama ainaina Anutufa qimamundee kaimminau.

⁶ Nooafa 600 aukwana marasoofanoo mi aukwannasaa nammari aufirafa aninau.

⁷ Nooafa Anutuna mi ufausa iriseenoo rufiseenoo nari faqa nari anaaga faqa nari amaaku qaaramoo namu faqa minamusa ninaaqmaaka faqa sipaki keeqaqau.

⁸⁻⁹ Oosana oosana aandau ufini akoona faqa anaasee faqa Anutuna afusaa anukarausa faqa sia anukarausa faqa aiqama Nooana faqa sipaki keeqaqau. Anutufa ufa qumau kai keeqaqau.

¹⁰ Dinni taikasee dinni oonu qaara marasee 7 faasana marinoo nammari aufinai.

¹¹ Mi aukwana Nooafa 600 aukwana maranau. Qaara quqoonasaa qiku dinni taikasee dinni oonu qaaraqanda marasee 17 faasaanasaa mi faasaanna kai nammari radiqinai. Mi faasaanna kai maqa ameemaanaindari nammari radiqisee urureenoo innaaruna kooqiara foora atuqoofanoo aaku firaafa nammariara foora adianau.

¹² Qaara fasiqa niku nisauku taikasee 40 eendaki faqa faasaana faqa aaku firaafa nammariara foora adianau.

¹³ Nammari radiqu faasaanna mi faasaanna kai Nooafa nari aanaaqandiri faqa nari amaaku

namu Seemafa faqa Qammafa faqa Yafeetafa faqa minamusa nári ninaaqmaaka faqa sipaki keeqafiqa mariqau.

¹⁴ Kaasau aandau oosana oosana faqa maaqena aandau oosana oosana faqa ufini oosana oosana faqa firaa aandauqa faqa kaqikaa aandauqa faqa Nooana aiku asauku faqa sipaki keeqaqau.

¹⁵ Aiqama oosana oosana kasimaru aandau ufinisa akoona faqa anaasee faqa Nooana faqa sipaki keeqaqau.

¹⁶ Anutufa Nooana qimamu mau kai keeqa fufanoo Anutufa nari kai kooqi itita nimaqanau.

¹⁷ Qaara fasiqa niku nisauku taikasee 40 faasana aaku nammariara foora adianau. Miqi ufanoo nammari qumbiqeenoo sipa uqeereeqeenoo murusaqa quqanau.

¹⁸ Nammari fannoo firaaqoo innooqoofanoo sipa fannoo mina amuaqumau nimirinai.

¹⁹ Nammari fannoo moo faqa innooqeenoo aiqama kisaaga aqana dukuninai.

²⁰ Kaifaa innooqeenoo kisaaga aqana oori aaqaramaseenoo 7 meters amana ooru marinai.

²¹ Miqinoo marufanoo maqasaa maru ainainausa aiqama kuqigau. Aiqama ufiniuqa faqa aiqama andauqa faqa aiqama fasiqa anaasee faqa kuqu taikaqau.

²² Aiqama aandau faqa doodaani faqa maa maqanasaa marusa kuqu taikaqau.

²³ Karaambaiqa aiqama ainaina maqasaaqaraa ainaina taika uqanna sanau. Faiqi anaasee faqa aandau faqa ufini faqa taikannisanau. Nooafa

kai narí aiku asauku faqa narí sipakinaa ainain-
auqa faqa misa kai asumu mariqau.

²⁴ Dinni qisauku taikasee dinni oonu qaara
fasiqa maraseenoo moodaa fasiqa asaukuqara
150 faasaana nammari kaqi aulinoo marinau.

8

Nammari aufirafa taikoo ufafa.

¹ Marufanoo Anutufa Noanara faqa narí aiku
asauku faqa aiqama aanda minna faqa marusara
faqa iriseenoo qufanoo ufai uqufanoo nammari
fannoo qumi marinau.

² Maqa ameemaanaindari nammari ururee
maruna rafaaga finau. Rafaagafuseenoo
innaaruna kooqiara foora ititasoofanoo
innaarunaindaraa nammari faqa sia quminau.

³ Itita fufanoo maqasaa nammari fannoo
ireeda kai ireeda kai ooru maree ooru ma-
ree qumiqumii ufanoo maqa koorooinau. 150
suanisaa nammari qumimarinau.

⁴ Dinni taikaseenoo dinni oonu qaaraqanda
marasee 7 quqoonasaa miqi mandee quqoonna
qambaana qisaukuqara faqa dinni qiku
taikaseenoo dinni oonu qaara marasee 17
faasaana Noana sipa fannoo Ararata aaqanasaa
muqufi quqasoofanoo marinau.

⁵ Miqooqari nammari uru maree ooqinufanoo
qisaukuqara taikasee 10 quqoonasaa indaaruuqaa
faasaanasaa aaqana atiuqa koorooinau.

⁶ Qaara fasiqa niku nisauku taikasee 40
faasaana aiqaroofanoo Noofa winduqa

atuaseenoo ufini kaammeesa fooqaana mara aqinau.

⁷ Ufini fannoo sia kaifaa aninau. Kaqi kai qaqaanoo nimarinau.

⁸ Nooafa mi ufininara rakisusia sia anufanoo nakipuruna mara aquseenoo nammari qafaani-feera aqiqanau.

⁹ Aqusoofanoo nakipuruna maqara randoosianoo nammari kaqi marufanoo mi eendanaki kai kaifaa Nooafunnai sipaki aninau. Nooafa narí asaku madaanai quqaseenoo qumara sipaki quqanau.

¹⁰ Qisaku dinni taikasee dinni oonu qaara marasee 7 faasaana afeesida mariufanoo Nooafa nakipuruna kaiqaa mareeqeenoo madaanai aqinau.

¹¹ Eenee marufanoo nakipuruna fannoo oorifa saqari amanee ammunirana rakeemma aaku maree aninau. Nooafa mi saqari amaneena qafamaseenoo doo nammari ooqi maridanoo fee qinau.

¹² Miqooqari kaifaa dinni taikasee dinni oonu qaara marasee (7) faasaana aiqaroo fanoo Nooafa nakipuruna kafaa mara quqasoofanoo doo funnai fifinoo doo sia kafaa aninau.

¹³ Nooafa 601 aukuana marasoofanoo indaaruuqaa quqoona indaaruuqaa faasaanasaa nammari tukaqnanau. Nooafa sipa ataufakaqaa akuamaqaaqoona rafaammasee qafoofanoo maqa aadana usimarinau.

¹⁴ Namba 2 quqoonasaa 27 faasaanasaa aiqama nammari tukaqnamafufanoo maqa maaqa aadana uqanna marinau.

15 Miqimmafufanoo Anutufa Nooana qimaminoo qinau.

16 Doo sipakiqari anee faqa aneenna anaaga faqa aneenna faiqi namu faqa misa ninaaqmaaka faqa raudaaqa.

17 Aiqama ufiniuqa faqa aandauqa faqa nifiqee raudaaqa. Raudamafiqa maqa maaqaki daraaniqa asumu moomoo kambiaaqa.

18 Miqi qimasoofanoo Nooafa faqa nari anaaga faqa nari faiqi namu faqa misa ninaaqmaaka faqa sipakiqari raudaqa.

19 Aiqama aandauqa faqa ufiniuqa faqa nari oosana nari oosana kai moodaanaki suqufufaqa raudamaki daraaniqau.

Nooafa karaambaiqa tatufirana suqa aminau.

20 Nooafa rafudamafufanoo karaambaiqa tatufirana suqarara ooni qumareenoo aaku aakumaseenoo Anutuna afusaa anukara aandau faqa ufini faqa maraseenoo muduka Anutuna tatufirana suqa aminau.

21 Suqoofanoo mina afunda karaambaiqa aikiambu ufanoo udirama qafeenoo asasinau. Asammaseenoo maaqi qimasee qimmirinoo qinau. Sia qinee kaifaa faiqi inni mandainaina akiqara aiqama maqa maaqa niquraraanauranoo. Inneeqa faiqi saaqari irirana faqa marirana faqa mandaika kai imarunara sia kaifaa unandee iqa maqa maaqa afaaqasasa maria fasiqa aanaaseesa faqa aandau doodaani faqa naru taikaanaura.

22 Anutufa minara maaqi qimasee qinau.
Maa maqafa kaqi marinaqa

qummaqira aukuana faqa narana nara aukuana
 faqa
 suara faqa aiqaiqa faqa aaku aukuana faqa
 suani aukuana faqa faasaana faqa eendaki faqa
 sia taika nimaqaanaura, kaqi marifaranoo.

9

Anutufa Nooana faqa moodaanaki kinau.

¹ Anutufa Nooana narí faiqi namu faqa ni-
 faaqooqa qinoo qinau. Inni asumu moomoo kam-
 biqafi aiqama maqa maaqa amana kai mariaqa.

² Aiqaama aandauqa faqa ufiniuqa faqa
 noodaanna faqa inniara rufiaranaki mariaqa.
 Misa inni afeeka ameemaanai mariaqa.

³ Innee maaqooqari sia andanda kai naaqa mi
 aandausa namu faqa naaqa. Innee naranara
 foora naaqeera nimidaqa.

⁴ Innee moodaa ainaina kai sia naaqa, fidika
 amaqiki marinnana kai sia naaqa. Mifa marirana
 nimimarifa marinara sia naaqa.

⁵ Faiqí moo fannoo faiqí faiqi fidika
 ruqiqainaqqa qinee mina akiiqara ummaara
 amianauranoo. Aandau moo fannoo faiqí
 faiqi kuqa narinaqa qinee mi aandauna kuqa
 aruanaura.

⁶ Anutufa faiqí faiqi narí fooqaasa
 auquqoonara yafee moonaa auqu qimasee
 kuqa arinnana akaqausa mina akiiqara narí
 arifaranoo.

⁷ Innee moomoo faiqi maqasaifaqa aiqama
 maqa maaqaki amanaikammafi mariaqa.

⁸ Anutufa Nooana faqa narí faiqi namu faqa
 kaifaa qimannimino qinau.

⁹ Maqee qinee inni faqa innisaaqari kasooaqee kambiqaainsa faqa moodaanaki kira ufa qidaqa.

¹⁰ Aiqama ainaina ufiniuga faqa aiqama aandauqa faqa ani faqa sipakiqari anusa faqa moodaanaki kianaara.

¹¹ Maa ufausannoo qinee moodaanaki kira ufa inni faqa qidaqa. Qinee kuqaa qima afeekaika qidaqa sia kaifaa nammari aufirafa faiqi faqa aiqama ainaina faqa naruannoo. Sia uqanna kafaa nammari aufirafa maa maqa maaqana mandaikiannoo.

¹² Qinee naaru marira moodaanaki kira ufa ani faqa aiqama aandauqa faqa doodaaniuga faqa qunafa maqi qimasee uqannifiqaanaara.

¹³ Qinee qeeqa oondanda oonnamuki quqaanaara. Mifa qinee maa maqanasaaqaraasa faqa moodaanaki kirana uqannifiqaannoo.

¹⁴ Yairee fee qinee oonnamunnai innaaruna itita saannoo miqoo oondanda kambiqaannoo.

¹⁵ Oonnamuki oondanda rafeeqna finaqa qafeeqa qinee ani faqa aiqama aandau doodaani faqa qima afeekaikira ufara irisee sia kaifaa nammari aufirafa naruannoo.

¹⁶ Oondanda oonnamuki rafeeqnainaga qafamaseeqa naaruara qinee inni maqasaaqaraasa faqa naaru marira moodaanaki kira ufa qiafannanara irianaara.

¹⁷ Minannai qinee aandauqa faqa doodaaniuga faqa qima afeekaikiafanna ufana kooroo idaqa.

Noona faqa nari faiqi namuara faqa qidanoo.

18 Nooana faiqi namu sipakiqari anusa nuqu maaqimminoo marinau. Seemafa faqa Qammafa faqa Yafeetafa faqa mariqau. Qammafa Kannaana akoofa marinau.

19 Nooana mi faiqi qaaramoo namusa aiqama maa maqanasaaqaraasa nikeeku nikaaku mariqau.

20 Nooafa afuqaki ainaini marufa marinau. Mifa indaaruu oosana arasee afuqa auqusee uainna sanda moomoo ummaqinau.

21 Mifa uainna aqama tatiseenoo moomoo neeseenoo furufara maseenoo narí qamunna raipaquseenoo narí uiqaana maqaki kaqi samu faiqanau.

22 (Yafeetafa indaarugaafa Seemafa mina aanaaqianaafa marinau Qammafa inaaqianaafa marinau.) Qammafa Kannaana akoofa maridanoo anireenoo narí akoofa kaqi samu faiqaqee ufanoo oonu qafeenoo narí akaqaafasaaqara naaramaseenoo qimanniminau.

23 Seemafa faqa Yafeetafa faqa minara iriseeqa qaoo qimasee qamunna marasee moo fannoo dinni ati narí aururusaa quqasoofanoo moo fannoo dinni ati narí aururusaa quqaseeqara ninaaqianaindari uiqaana maaqaki keeqa fiqaqara nári nikoona afaaqa itita amaqaqau. Miqanda noori kaqinni quqasee nisauruanoo qimasee sia nári nikoona qafaqau.

24 Nooafa kasooqaqee irirafa kambiqafufanoo narí inaaqianaa faiqi mifa auqoo ainainnara irinau.

²⁵ Iriseenoo maaqi qimasee aquraranau. Qinee ani amaaku Kannaanasaa aqurara ufa quqaanaura. Anee aneenna akaqaafasaa ufa saika faiqi maria.

²⁶ Miqi qimaseenoo Nooafa quandafinoo Qammana akaqaafasaa qarara maaqi qinau. Karaambaiqa Seemana Anutuna amooqirana amia.

Kannaafa Seemana ainainira faiqi mariannoo.

²⁷ Anutufa qinanoo Yafeetanakiqari moomoo kambiqafiqa mina faiqi namu Seemana faiqi namu faqa moodaanaki marifaranoo. Miqiqa marifanoo Kannaafa Yafeetana ainainira faiqi mariannoo.

²⁸ Nammari aufirafa taikoofanoo miqooqari Nooafa 350 aukuaana maraseenoo kuqinau.

²⁹ Mina aukuaana aiqama moodaanaki 950 aukuaana maraseenoo kuqinau.

10

Nooana faiqi namu ninaiqimara nuqu.

¹ Nooana faiqi namu nuqu maaqimminoo marinau. Seemmafa faqa Qammafa faqa Yafeetafa faqa mariqau. Nammari aufirafa taikoogooqari misasaqari kambiqaraura nuqu maaqimminoo mariqau.

² Yafeetana faiqi namu nuqu maaqimminoo marinau. Koommafa faqa Makookafa faqa Madaifa faqa Yafanafa faqa Tubanafa faqa Meeseekafa faqa Tirasafa faqa mariqau. Mi fasiqausa ninaiqimara nisaifaqausa nariqa ninaakusa nuqu maree mariqau.

³ Koommanasaaqari kambiqoo maqannaasa nuqu Asakeenasa maqannaasa faqa Rifata maqannaasa faqa Tookaramma maqannaasa faqa mariqau.

⁴ Yafatanasaaqari kambiqoo maqannaasa nuqu Eerisa maqannaasa faqa Sipainna maqannaasa faqa Sipurusa maqannaasa faqa Roodeesa maqannaasa faqa mariqau.

⁵ Misa ooruku nammari afaiqara marusa faqa kaqikaa afumaki marusa faqa misa ninaakusa mariqau. Misauqa Yafeetanakiqari kambiqarausa maridaqa naadu naadu maqa maaqaki maridaqa naadu naadu ufa qimariqau.

⁶ Qammaana faiqi namu nuqu maaqimminoo marinau. Kusafa faqa Isipafa faqa Ribiafa faqa Kannaafa faqa mariqau. Mi fasiqausa ninaiqimara nisaifaqausa nari ninaakusa nuqu maree mariqau.

⁷ Kusana faiqi namuqi qari kambiqoosa Seebaa maqannaasa faqa Qafiraa maqannaasa faqa Sabataa maqannaasa faqa Rammaa maqannaasa faqa Sabateeka maqannaasa faqa mariqau. Rammanasaaqari kambiqoosa Seebaa maqannaasa faqa Deedana maqannaasa faqa mariqau.

⁸ Kusafa akoonaiqi Nimaroodana maqanau. Nimaroodafa findifinoo maa maqa maaqanaki indaaruaa rakira karaambaiqa marinau.

⁹ Karaambaiqa dadaaqufanoo mifa amudaanai qimasee uaqee marufa marinau. Miqi marunara faiqi anaasee maaqi qimasee akaqausara qimariqau. Karaambaiqa fannoo ani Nimarooda fara foora kaaqa amudaanai qimasee uaqee mari

fara foora maisaannoo.

¹⁰ Nimaroodafa Baabeera maqusa faqa Eereeka maqusa faqa Akada maqusa faqa mi maqusa namuna indaaru rakisimarinau. Mi maqusa namusa Babiroonia maqa maaqaki mariqau.

¹¹ Miqoo mariufanoo Nimaroodafa Asiria maqa maaqai oonureenoo Niniffee maqusa faqa Reehoobootaira maqusa faqa Karaa maqusa faqa Reeseena maqusa faqa auqinuu.

¹² Reeseena maqusa fannoo Nineefee maqusa dinni marifanoo Karaa firaa taunna dinni mari-fanoo qambaana maridanoo.

¹³ Isipana saaqari aruakusa Ridiaa maqannaasa faqa Anamma maqannaasa faqa Reehaba maqannaasa faqa Nafatuqa maqannaasa faqa

¹⁴ Patarusa maqannaasa faqa Kasaru maqannaasa faa Kareetee maqannaasa faqa mariqau. Firistia maqannaasa Kareetee maqannaasak-iqari kambiqarawsa mariqau.

¹⁵ Kannaana faiqi namu nuqu maaqimminoo marinuu. Indaaruqaafa Sidoonafa marinuu. Mina aanaaqiannaafa Heetafa marinuu. Miqanda nári ninaakusa nuqu marasee mariqau.

¹⁶ Kannaafa Yeebusa maqannaasa faqa Amooraa maqannaasa faqa Kirakasa maqannaasa faqa ni-naakufa marinuu.

¹⁷ Hifita maqannaasa faqa Akaa maqannaasa faqa Sinita maqannaasa faqa mariqau.

¹⁸ Arafada maqannaasa faqa Seemara maqannaasa faqa Qamata maqannaasa faqa mariqau. Kanna maqannaasa moomoo oosana rainaf-ufaqa aiqama maqa maaqaki daraanimambi mariqau.

¹⁹ Mariufaqa Kannaana saaqari kambiqarausa misa maru maqana dinni ati Sidoona maqusaki marufanoo suani dinni ataaqeeni Keeraa maqusa Kasaa maqusa aaga maruna raquru aminoo marinau. Miqooqari suani oosana qaannai Soodoomma maqusa faqa Koomoora maqusa faa Adama maqusa faqa Seeboima maqusa Rasaa maqusa aaga marunnai dinni ati marinau.

²⁰ Doo Qammaana saaqari kambiqarausa naadu naadu maqusakiaqa rainafufaqa naadu naadu ufa qimariqau.

²¹ Seemmafa Yafeetana afasaafa Heeburu maqannaasa ninaakufa marinau.

²² Seemana faiqi namu nuqu maaqimminoo marinau. Eerammafa faqa Asurafa faqa Arafakadafa faqa Rudafa faqa Arammafa faqa mariqau. Mi fasiqausa ninaiqimara nári ninaakusa nuqu maree mariqau.

²³ Arammaana faiqi namu Qusa maqannaasa faqa Huraa maqannaasa faqa Keeteera maqannaasa faqa Meeseekaa maqannaasa faqa mariqau.

²⁴ Arafakadafa Seeraana akoofa marinau. Seeraafa Eebeereena akoofa marinau.

²⁵ Eebeerafa akoonaiqi qaaraqanda maqanau. Indaarugaana auqu Peereekafa marinau. Mina auqu oosana rainara fee qinoo marinau. Mifa maru aukuanna maqa maaqa rainanoo marufaqa minara Peereekanee qinau. Peereekana akaqa auqu Yookatanafa marinau.

²⁶⁻²⁹ Yookatana faiqi namukiqari maaqim-masee maqannaasa mariqau. Aramooda

maqannaasa faqa Seereefaa maqannaasa
 faqa Asammafee maqannaasa faqa Yeeraa
 maqannaasa faqa Adooramma maqannaasa faqa
 Qusaraa maqannaasa faqa Dikaraa maqannaasa
 faqa Oobara maqannaasa faqa Abimaera
 maqannaasa faqa Seebaa maqannaasa faqa
 Oofira maqannaasa faqa Qafiraa maqannaasa
 faqa Yoobabaa maqannaasa faqa mariqau.
 Aiqamusa Yookatana anaiqimara mariqau.

³⁰ Misa maru maqa maaqafa dinni ati fan-
 noo Meesaa maqa maaqaindari Seefaraa maqa
 maaqai suani oosana qaannai aqana maqa
 maaqa dinni ati fannoo raquru aminoo marinau.

³¹ Seemana faiqi namu miqimmiga mariqau.
 Naadu naadu maqa maaqaki maridaqa naadu
 naadu ufa qimariqau.

³² Aiqama misauqa Nooanasaqari
 kambiqarausa mariqau. Moo maqannaa moo
 maqannaa nariqa oosana amana kai mariqau.
 Nammari aufirafa taikafufaqa aiqama maa
 maqanasaqaraasa Nooana faiqi namukiqari
 kai kambiqafi mariqau.

11

*Babiroonnia maqusasaa kisaafa maaqa us-
 akoo ufafa.*

¹ Indaaru nammari taikoo kamuqoo aiqama
 maqasaa qaraasa moodaa ufa faqaasa maridaqa
 moodaa ufa kai qimariqau. Aiqama ainainara
 moodaa auqu kai ree mariqau.

² Misa suani oosana qaannai oonuree aniree iqa niniufaqa Babiroonia afaasa paqurimmasee miqoo mariqau.

³ Misa miqoo maridaqa maaqi qimasee narí qimami narí qimami qidaqa qiqau. Anifaqa innisaimbaqa maqa qumareeqa atakuseeqa idara saananoo afeekaikamma finaqa minannai maaqa usakaa. Maasa miqimmaseeqa aaku aakummaseeqa koorootaqa mina apootaanaki akusaananoo atukaraani.

⁴ Miqi qimaseeqa maqee innisaimbaqa fuka maqusa indufusee kisaqa maaqa auqiqa ooru fiinaqa innaaruna amana kai ooruraanaura. Miqimmasee maasa duqu faqaasa moodaanaki maridaqa sia aiqama maqa maaqaki daraani- anaura. Miqi qimaseeqa doo miqimmiqau.

⁵ Mi maqusana auquseeqa kisaqa maaqa faqa usakasoo fanoo Karaambaiqa qumu nindafeenoo maaqi qinau.

⁶ Maqee maasauqa moodaa maqannaasa maridaqa moodaa ufa qidaqa. Misa nári auqararee qia ainainna oosana araidaqa. Qusasaa misa nári nidimari ainainna auqee fanoo.

⁷ Doo anifaqa inni saimbaqa ooquree misa ufa furufaramma nimaqasaanaqa sia narí ufa narí ufa iriaqa.

⁸ Anutufa miqi qimasee misa ufa furufaramma nimaqasoofaqa misa mi maqusana auquanee quna minniseeqa maqa maaqaki daraaniqau.

⁹ Mi maqusana auqu Babiroonnia fee qimariqau. Miqoo karaambaiqa fannoo misa ufa furufaramma nimaqoonara miqi qimasee

auqu raqau. Miqoo maruna Karaambaiqa furu-faramma nimaqasoofaqa aiqama maqa maaqaki daraaniqau.

Seemmana aiku asauku nuqu.

(1 Stori 1:24-27)

¹⁰ Seemmana saaqari kambigoosa maaqim-miqa mariqau. Nammari aufirafa taika fufanoo miqooqari qaara aukwana aiqarama fufanoo Seemafa 100 aukwana maraseenoo akoonaiqi Arafasadana maqanau.

¹¹ Arafasadana maqooqooqari Seemafa 500 aukwana marinoo akoonaiqi maanaaqa moomoo maqanau.

¹² Arafasadafa 35 aukwana maraseenoo nari faiqi Seeraana maqanau.

¹³ Seeraana maqooqooqari Arafasadafa 403 aukwana maraseenoo akoonaiqi maanaaqa moomoo maqanau.

¹⁴ Seeraafa 30 aukwana maraseenoo nari faiqi Eebeerana maqanau.

¹⁵ Eebeerana maqooqooqari Seeraafa 403 aukwana maraseenoo akoonaiqi maanaaqa moomoo maqanau.

¹⁶ Eebeerafa 34 aukwana maraseenoo nari faiqi Peereekana maqanau.

¹⁷ Peereekana maqooqooqari Eebeerafa 430 aukwana maraseenoo akoonaiqi maanaaqa moomoo maqanau.

¹⁸ Peereekafa 30 aukwana maraseenoo nari faiqi Reeuna maqanau.

¹⁹ Reeuna maqooqooqari Peereekafa 209 aukwana maraseenoo akoonaiqi maanaaqa moomoo maqanau.

²⁰ Reeufa 32 aukuana maraseenoo narí faiqi Seerukana maqanau.

²¹ Seerukana maqooqooqari Reeufa 207 aukuana maraseenoo akoonaiqi maanaaqa moomoo maqanau.

²² Seerukafa 30 aukuana maraseenoo narí faiqi Naqoorana maqanau.

²³ Naqoorana maqooqooqari Seerukafa 200 aukuana maraseenoo akoonaiqi maanaaqa moomoo maqanau.

²⁴ Naqoorafa 29 aukuana maraseenoo narí faiqi Teeraana maqanau.

²⁵ Teeraana maqooqooqari Naqoorafa 119 aukuana maraseenoo akoonaiqi maanaaqa moomoo maqanau.

²⁶ Teeraafa 70 aukuana maraseenoo Abarammana faqa Naqoorana faqa Qarana faqa maqanau.

Teeraana aiku asauku nuqu.

²⁷ Teeraana faiqi namu mi oosanausa maqim-miqa mariqau. Teeraafa Abarammana faqa Naqoorana faqa Qarana faqa nikoofa marinau. Qaranafa Rootana akoofa marinau. *

²⁸ Qaranafa Babiroonia maqa maaqaki narí maqusa Uraa maqusaki mina akoofa faqa kaqi marufanoo kuqinau.

²⁹ Abarammafa Sarai nammarina maranau. Naqoorafa Mirakaa nammarina maranau. Mirikaa nammarifa Qarana araamuna maranau. Qaranafa Isakana akoofa marinau.

³⁰ Sarai nammarifa sia faiqi maqoofa aafa anaasee marinau.

³¹ Teeraafa narí amaaku Abarammana faqa Qarana amaaku narí anaiqi Rootana faqa Abarammana anaafa narí aanaakuqu Sarai nammarina faqa Babiroonia maqa maaqaki Uraa maqusaindari nifiqeenoo Kannaana maqa maaqai fiqau. Teeraafa narí aiku asauku faqa Kannaana maqa maaqai fuanee qimasee Qarana auqu amarana maqusai oonu aana kasaafai mariqau.

³² Miqoo mariiufanoo Teeraafa miqoo kuqinau. Teeraana aukwana aiqama moodaanaki 205 maraseenoo kuqinau.

12

Anutufa Abarammana aaroo ufafa.

¹ Abarammana akoofa Teeraafa kuqufanoo Karaambaiqa Abarammana qimaminoo qinau. Aneenna maqa faqa aneenna aiku asauku faqa aneenna akoona maqa maaqakinaa ainaina faqa quqasee minniseenana maqa maqa moo uqafiqaanana miqoo fua.

² Miqoo oonu marinaqa ani faiqi moomoo amiananoo maqa maqa qumbiqafi marifara. Qinee ani amiqi amiqimma amaqaasaanana anee auqu faqaafa marinnaranoo.

Miqimma finaqa anisaaqaraa amiqi amiqirana faiqi anaasee mareefaranoo.

³ Aniara amiqi amiqi mariasa qinee faqa quandafiqa misa faqa amiqi amiqi ianaura ani aqurarainausa qinee faqa quandafiqa misa faqa niquraraanaura.

Aniaroo qimasee misa aiqama maqasaaqaraasa
amiqi amiqimma nimaqaanaura.

⁴ Abarammafa 75 aukwana maraseenoo Qarana
maqusa minniseenoo Kannaana maqa maaqai
Karaambaiqa qimamundee inoo fufanoo Rootafa
mina faqa finau.

⁵ Abarammafa nari anaqa Sarai nammarina
faqa nari akaqa faiqi Rootana faqa nari moomoo
qumiasana ainainira faiqiuga faqa nifiqeenoo
Arana maqasaa mariuna nifiqeenoo Kannaana
maqa maaqai finau.

⁶ Misa Kannaana maqasaa oonuroofanoo
Abarammafa oonuree aniree inoo niniufanoo
Seekeemma maqa maaqaki naaquqara
maqusasaa tatufirana suqee maruqoo Mooree
maqa maaqaki naaquqara saqari atukaki
aniranau. Mi aukuanna Kannaana maqannaasa
mi maqa maaqanaki kaqi mariqau.

⁷ Abarammafa mi maqusanai oonu marufanoo
Karaambaiqa akoogoo mina afusaa kooroomafi-
noo qimaminau. Qinee maa maqa maaqanara
ani qimamunnana ani aiku asauku nimianaura.
Miqi qimasoofanoo Abarammafa miqoo mina
afusaa kooroou Karaambaiqana tatufirana suqa
amira qainda auqusee tatufirana suqa aminau.

⁸ Suqa amiseenoo Abarammafa findifinoo
aaqana maqa maaqai ooru finau. Beeteera
maqusa fannoo suani keeqoo qaannai
marufanoo suani oosana qaannai Ai maqusa
marufanoo qambaanai nari uiqaana maqa
usakanau. Usakaseenoo miqoo Karaambaiqa
aadau tatufira ooni qainda faqa auquseenoo
Anutuna aaramaseenoo innaaru qimarinau.

⁹ Miqinoo faiqanoo fifiufanoo suani afu dinni ataaqeeni Kannaana maqa maaqa dinni atinni Isipa maqa maaqa oosira qaannai oquranau. Neekeefa maqasaa ooqu finau.

Abarammafa Isipa maqa maaqai ooqu fu ufafa.

¹⁰ Miqoo marufanoo aandaroo firaafa Kannaana maqannaasa narinau. Abarammafa mina qafofanoo mandaikufanoo narí aiku asauku faqa narí ainaina namu faqa Isipa maqasaa ooqu finau.

¹¹ Isipa maqa maaqa adeedi rama soofanoo Abarammafa narí anaqa Sarai nammarina qimaminoo qináu. Ani afaaqa amiqirafa mariananoo.

¹² Isipa maqannaana ani qafamasee, oo mina aanaaqammi maqi qimasee qini darusee ani maree foora.

¹³ Anee aneennara qiniara auna fee qinaqa sia darifaqa anindiri kaqi marianau.

¹⁴ Abarammafa Isipa maqa maaqai aniroofaqa Isipa maqannaasa Sarai nammarina qafamasee boo amiqira fee qiqau.

¹⁵ Isipa maqannaasa rakisirafa Faraona mina faiqi namu Sarai nammarina qafamaseeqa Faraona qimamiqa qiqau, qoo amiqira manaaqa fee qufanoo Faraofa qimannimufaqa Sarai nammarina ani mareeqee Faraona kinna maaqaki quqaqau.

¹⁶ Mina akiiqara Faraofa Abarammana amiqi amiqimmaseenoo sipsipauqa faqa mimmiuqa faqa burimakauqa faqa doonkiuqa faqa kammeerauqa faqa ainainira faiqiuqa

faça maanaqauça faça feefaru Abarammana aminau.

¹⁷ Faraofa Sarai nammarina maroonara Karaambaiça fannoo oosana oosana manda aurirana Faraona faça mina maaqaki marusaki faça quqanau.

¹⁸ Faraofa mina qafamaseenoo Abarammana aaramaseenoo aqinoo qinau. Anee qini naqaa fee maqimaqeennee. Anee nanaree sia qini qinaaqa fee qimasee qimaqiminanee.

¹⁹ Anee nanaree qini dauna fee qianaqee qinee qeeqara qinaaqara mareeqee qeeqa maaqaki quqee fee. Maa ani anaqa marinoo, doo ani afiqee fifua.

²⁰ Faraofa miqi qimaseenoo narí sundiauqa niqiqoofaça Abarammana faça narí anaqa faça narí aiqama ainaina faça nifiqa maree nári maqa atinni munusoofaça fiqa.

13

Abarammasa Rootasa naadu naadu fu ufafa.

¹ Abarammafa Isipa maqa maaqakiqari suani afu dinni ataaqeedari dinni ataaqeenni Kannaana maqa maaqai qumurandee narí anaqa faça Rootana faça narí aiqama qumiasana faça maree finau.

² Abarammafa ainaina faqaafa marinau. Sip-sipa faça mimmi faça burimakau faça siruaa faça koora faça faqaafa marinau.

³ Mifa miqooqari quqasee fifiufanoo Beeteera maqusa amummaqa fimarinau. Mifa ooqai narí Beeteera maqusa faça Ai maqusa faça qambaana uiqaana maqa usakaqooqoo ooqu ranau.

4 Ooqai mifa miqoo tatufira qainda auquqoo ooqureenoo Karaambaiqa innaaru qimamaqanau.

5 Rootafa faqa sipsipauqa faqa mimmiuqa faqa burimakauqa faqa faiqi anaasee faqa nari ainainira faiqiuqa faqa maanaaqauqa faqa Abarammana faqa nimariqau.

6 Miqanda moomoo aandau ainaina faqaqanda maridaqa aandauqa neemaru andandafa sia amanaikufaqa sia amana moodaanaki mariaqaa inoo marinau.

7 Miqiga marufanoo Abarammana andausaa rakisi marusa faqa Rootana andausaa rakisi marusa faqa andanda narana saara tinooriqau. Mikari Kannaana maqannaasa faqa Peerisa maqannaasa faqa mi maqanasaa kaqi mariqau.

8 Abarammafa mina qafamaseenoo Rootana qimaminau. Maasa moodaa oosana maridaqa anee faqa qinee faqa sia tinooria, ani faiqi namu faqa qini faiqi namu faqa sia tinooriaqa.

9 Maqa maqa firaatiamma maridanoo ania, anindiri rainaa, anee aninna aidimari maqana qafamasee utaaqamasee mi tinai finaqa qinee moo tinai fuanaura.

10 Miqi qimasee qimamufanoo Rootafa afu maqaidanoo Yooradanna noopundu dinni marufanoo Sooara maqusa dinni marufanoo mi qambaanna nammari moomoo marinau. Karaambaiqa kadidakiara foora moomoo nammari marinau. Amiqinoo maridanoo Isipa maqa maaqara foora marinau. Mi aukuannai Karaambaiqa Soodoomma maqusa

faqa Koomoora maqusa faqa sia naru kammuqoo
Rootafa mi maqa maaqana qafanau.

¹¹ Rootafa qafamaseenoo aiqama Yooradanna
afaasasaa ooqu mariraree qimaseenoo suani
oosanaí fimaru aatata finau. Miqi mandeeqara
rainaqau.

¹² Abarammafa Kannaana maqa maaqai kaqi
marufanoo Rootafa Soodoomma maqusa aqa
maqusaqqa dinni dinni marufanoo qambaana
noopunduki narí uiqaana maqa usakanau.

¹³ Soodooma maqannaasa kaaqa mandainaina
maree marusa maridaqa. Karaambaiqa afusaa
oosana oosana mandainaina uqanna auqee
mariqau.

Abarammafa Heebaroona maqa maaqai finau.

¹⁴ Rootafa fifufanoo Karaambaiqa Abaram-
mana qimaminoo qinau, anee mariannaqooqari
amiqimmasee aiqama atinai aiuqia.

¹⁵ Anee qafaanna maqa maaqana ani faqa
anisaaqari kambiqainausa faqa nimisaananoo
naaruara naaruara innindi kamminoo marian-
noo.

¹⁶ Qinee ani aiku asauku asumu moomoo kam-
biqa nimaqaanaura. Sia amana moo fannoo
asaana rirana amanaikiannoo. Nukuda aiqama
amana asaana rifaranoo, ani faiqi namu kai sia
amana nisaana rifaranoo.

¹⁷ Doo maqee oonuree aiqama maqa maaqa
qinee ani amiannana aiuqia.

¹⁸ Abarammafa minara iriseenoo narí uiqaana
maaqa rapeemma mareenoo Heebaroona
maqa maaqaki Mamareena saqariuqa atukaki

ooqureenoo miqoo Karaambaiqa tatufira qainda
ooninnai auquseenoo tatufirana suqa aminau.

14

*Rootafa namuqaaki marufanoo Abarammafa
afiqoo ufafa.*

¹ Mi fasannai Amarafeerafa Babiroonia
maqannaa karaambaiqa marinau. Mi aukuannai
Eerasaa maqannaa karaambaiqa Ariookafa
faqa Eeramma maqannaa karaambaiqa
Keedooroomafa faqa Kooimma maqannaasa
karaambaiqa Tidarafa faqa minamusa aiqama
nári sundiauga moodaanaki nifiqeeqa Soodooma
maqannaasa narirara fiqau.

² Misa moodaannai qisauku karaambaiqauqa
faqa rakiraree qimaseeqa fiqau. Soodooma
maqannaa karaambaiqa Beerana faqa Koomoora
maqannaa karaambaiqa Birasana faqa
Adama maqannaasa karaambaiqa Sinabana
faqa Seeboyima maqusanaasa karaambaiqa
Seemebeerana faqa Beeraa moo auqu Sooara
maqanna karaambaiqa faqa mi moodaannai
qisauku karaambaiqausa faqa rakiraree qimasee
qumiqau.

³ Mi moodaannai qisauku karaambaiqausa ru-
fiasee Sidimma noopunduki suqiqau. Maqee mi
noopundunaki ooruku nammari rafaaga finoo
marifaqa mina auqu raidaqa Kuqira Nammari
fee qidaqa.

⁴ Qisaukuqara taikasee qikunni ooqu qaara
marasee 12 aukuanaki Keedooroomana asauku
ameemaanai mariqau. Qisaukuqara taikasee

qikunni ooqu qaaramoo marasee 13 aukuanaki
mina ufa rukiee mariqau.

⁵ 14 aukuannasaa Keedooroomafa findifi-
noo aqoonna karaambaiqauqa faqa nári rakira
fasiqauqa faqa findifiqa ooqu fiqau. Ooqu
fiu faqa moo maqannaasa ooqi naru maree
fiqau. Reefaimma maqannaasa Asetaroota
Karanaimma maqusaki nariqau.

⁶ Naruseeqa Susima maqusanaasa Qamma
maqa maaqaki faqa nariqau. Naruseeqa
Eemimma maqanna faqa Kiriataimma afaasa
maqa maaqaki marusa nariqau. Miqooqari
ooquree Qoora maqannaasa Eedoona aqanasaa
marusa nariqau. Misa naru mareeqa
Eeraparanna aadana maqa maaqa atinni munu
quqáqau.

⁷ Miqooqari oonu randeeqa Kadeeasa
maqusai ooqeenaa auqu Eenamisapatee qimaru
maqusaanaasa faqa nariqau. Amareekana
aiku asauku misaqa maru maqusausa aiqama
rafaaqa fiqau. Rfaaaqafusee Amoorana aiku
asauku Qasasoona Tamara maqusaki marusa
faqa rfaaaqafu nimaqaqau.

⁸ Miqimmasoofaqa Soodooma maqanna
karaambaiqa faqa Koomoora maqanna
karaambaiqa faqa Adamma maqanna
karaambaiqa faqa Seebooyima maqanna
karaambaiqa faqa Beera moo auqu Sooa
maqanna karaambaiqa faqa mi maqusa
namusa karaambaiqauqa faqa nári rakira
fasiqauqa faqa moodaaqoo Sidima noopunduki
suqiqau.

9 Suqufufaqa Eeramma maqannaa
 karaambaiqa faqa Kooimma maqannaa
 karaambaiqa faqa Babiroonia maqannaa
 karaambaiqa faqa Eerasara maqanna
 karaambaiqa faqa rakirara deedaqiau.
 Moodaanai qisauku karaambaiquqa qaara
 faqa qaara faqa karaambaiquqa faqa rakirara
 deedaqiau.

10 Sidima noopunduki koorootaqa madika
 moomoo marinau. Soodooma faqa Koomoora
 maqannaa karaambaiquqa rakiranakiqari
 quqasee sandaani quna mi madikausaki
 aqufiqiau. Qaaramoo karaambaiquqa sanda
 maqaraasiqa aqaanai akaraqau.

11 Qaara faqa qaarafaqa karaambaiquqa
 Soodoomma maqannaasa faqa Koomoora
 maqannaasa faqa aiqama ainaina uqanna
 maraqau. Afuqakinaa nara ainaina faqa maree
 fiqiau.

12 Rootafa Abarammana akaqa amaaku fannoo
 Soodooma maqusai marufaqa mina faqa mina
 qumiasana faqa maraqau.

13 Faiqi moo fannoo rakiranakiqari sandeenoo
 Abarammafa Qeeburu maqannaa fasiqa
 fannoo Amoorra maqannaa fasiqa Mamareena
 saqariuqa atukaki marufanoo ooru qimaminau.
 Mamareefa nari akaqaqara Eesakoorana faqa
 Aneerana faqa minamusa Abarammana aqoondi
 mariqiau.

14 Abarammafa Rootana mara maree funara
 iriseenoo nari ainainira faiqiuqaki nimudaanai
 qimarusa nari uqaana maqusakinaasa 318
 fasiqa nifiqanau. Nifiqaseenoo qimannimufaqa

qaara faqa qaara faqa karaambaiqauqa nifaqamaree Danna maqa maaqai nianai fiqau.

¹⁵ Ooruree namuqaa nindafamaseenoo nari faqa fusa rainaseenoo eendaki namuqaa maruqoo oonureeqa naru nindaqaaqa qiqau. Mifa misa nifaqa maree suani afu dinni ataaqeeni Damasakusa maqusa fiaaqaree Hoobaa maqusaki munusaqau.

¹⁶ Ooru randee qumureeqa Abarammafa Rootana faqa mina qumiasana faqa aiqama aanaaseeuqa faqa rumbree fusauqa faqa aiqama nifiqee aniqau.

Meerakiseedeekafa Abarammana amiqi amiqira ufa qimamaqanau.

¹⁷ Abarammafa Keedoroommana faqa mina aqoonna karaambaiqauqa faqa naruseenoo aniroofanoo Soodooma maqanna karaambaiqa fannoo mina qafarara Saavee noopunduki moo auqu Kinna noopunduki fee qimaruuqoo paqurinau.

¹⁸ Sareema maqannaasa karaambaiqa auqu Meerakiseedeekafa uriqarara Anutuna aanaiqikirafa marufa feemu faqa uainna nammari faqa Abarammana mini aminau.

¹⁹ Meerakiseedeekafa amiseenoo maaqi qimaseenoo amiqi amiqira ufa qimamaqanau. Uriqarara Anutufa innaaruna faqa maqa faqa auqufa mifa kai Abarammana amiqi amiqiannoo.

²⁰ Kaaqa uriqarara Anutufa kai namuqaa mareeqee ani asaukuki quqeenoo miqinara Anutuna amoo qiaqa.

Miqi qimasee amiqi amiqira ufa qimasoofanoo
 Abarammafa namuqaa ainaina
 maraqaona qisaukuqaraki rainaseenoo
 moodaaki Meereekiseedeekana aminau.

²¹ Amisoofanoo Soodooma maqannaa karaam-
 baiqa Abarammana qimaminoo qinau. Anee
 rakiranaki maraanna ainainausa aneennara ma-
 reenana qini faiqi anaasee kai qimia.

²² Miqi qufanoo Abarammafa asauku
 uqeeraseenoo qinau. Qeeqa qisauku uqeereeqa,
 kaaqa uriqarara Anutuna innaaruna faqa maqa
 faqa auquna afusaa uqeerasee qimamidaqa.

²³ Sia uqanna ani ainaina kaqikaa ainaina
 maraanaura tiriti faqa niku aanaamu sanda faqa
 ririmma sia maraanaura. Anee qiniara maasa
 ainaina maraseenoo moomoo ainaina faqaasee
 qidanoo mifoo qinoora. Sia uqanna maraanaura.

²⁴ Qinee sia uqanna moo ainaina qeeqara
 maraanaura. Qini faqa rakiranaki fuasa misa
 namasaa ainainnara kai doo maree fee qidaqa.
 Qini qiqoodi namu Aneerafa faqa Eesakoorafafa
 faqa Mamareefa faqa misa kai nari nimanasaa
 maraaqa.

15

*Anutufa Abarammana faqa moodaanaki kira
 ufa qinau.*

¹ Rakirana taikaseenoo marufanoo Yaaweefa
 Abarammana afu pisipasa mandeenoo qimam-
 inau.

Abaramma anee sia rufiaa.

Qinee ani saqariara foora anisaa ititafuananoo sia moo fannoo ani aruannoo. Qinee mina akiiqara firaa ainaina ani amianaara.

² Abarammafa mi ufana iriseenoo narí qimaminoo qinau. Oo uriqarara karaambaiqa anee nana qumiasanee qini qiminnaree qinee faiqi siaisa maridaqa. Maa qini ainainira faiqi auqu Eerieseerafa Damaskusa maqusaindaraafa mifa kai maridanoo qinee kuquananoo qini ainaina maraannoo.

³ Anee faiqi asumu sia qini qimiananoo qini ainainira faiqi uqakiqari moo fannoo qini qumiasana maraannoo.

⁴ Miqi qimaseenoo Abarammafa irufanoo kafa Karaambaiqa qimaminoo qinau. Maa ani ainainira faiqi Eerieseerafa sia ani qumiasana ainaina maraannoo. Aninna faiqi uqanna fannoo ani ainaina maraannoo.

⁵ Miqi qimaseenoo Karaambaiqa Abarammana afiqee madaanai muquseenoo qinau. Innaarunai qafamaseenana fasau amanee anee asaana rinnaree. Aniki ani aruakinausa miqimmasee kambiqeefara.

⁶ Abarammafa Yaaweena mi ufana iriseenoo narí saqarikirana mi ufanasaa rusisee marinau. Miqunara Karaambaiqa asasammaseenoo Abarammana mareeqee narí aqoondikiranaki quqanau.

⁷ Miqi qimasee Karaambaiqa Abarammana qimaminoo qinau, qinee Karaambaiqa ani Ura maqusakinaana Babiroonia maqa maaqaindaraana afiqee minisee maa maqa maaqana amiananoo anindikianifee qimasee afiqee aniqiafana.

⁸ Miqi qufanoo Abarammafa iramirinoo qinau. Oo uriqarara Karaambaiqa qinee naqi fee masee qinindi kammiannoo fee qimasee irianauree.

⁹ Miqi qufanoo Karaambaiqa narí qimaminoo qinau. Anee burimakau faqa mimmi faqa sipsipa faqa qaaramoo aukwana mararansa faqa nakipuruna faqa kukuma faqa maree mini qimia.

¹⁰ Miqi qimasoofanoo Abarammafa mi aandausa Anutufa maruqoo maree mini quqaseenoo minauqa qambaana kai afoommaseenoo dinni moo afooirana dinni moo afooirana qaaramau irasasaa quqanau. Ufinqara kai sia afooinau.

¹¹ Meemoonauqa mi aandausa narara aniroofanoo Abarammafa niqaaqinau.

¹² Suani keeqarana namu faqa eenoofanoo Abarammafa afuki qaunduarufanoo faiqaqeeidanoo qaini marufanoo firaa rufiarafa faqa maparaairafa faqa Abarammana afaaqai aqufinau.

¹³ Miqida rufiee marufanoo Karaambaiqa Abarammana qimaminoo qinau. Anisaaqari kambiqainausa aanaamuruara foora moo maqannaasa maqasaa oonu maridaqa ainainira faiqikiqa marifaqa 400 aukuanaki manda fitiqnarana nimifaranoo.

¹⁴ Miqi marifaqa qinee mi maqannaasa mi fitiqnarana nimimariana akiiqara aupurarana nimianauro. Misa mi maqa maaqana minnisee oonurandee aniqqa moomoo qumiasana maree anifaranoo.

¹⁵ Aniara maaqi qiqa anee asooaqeenana asooaranaki kuqufinaqa akundaqa.

¹⁶ Ani aiku asauku qaara faqa qaara faqa oosana mi rumbaranakiqari oonu randee ani-

faranoo. Qinee sia Amooraa maqannaasa dauni naru taikaanaura. Misa kaaqa mandaika uqanna ifaqa miqoo misa naru nindaqaaqa masee ani aiku asauku miqoo quqaanaura.

¹⁷ Suani keeqoofanoo eendirara mammandufanoo Abarammafa qafoofanoo qafeeki idamuna namu faqa qooma namu faqa akooqoo nari kai kambiqafinoo aandau afoomma dinni dinni quqagoona qambaana runna finau.

¹⁸ Doo aaqee mikari kai Yaaweefa Abarammana faqa moodaanaki kira ufa qinau. Qinee maa maqa maqana ani aiku asauku nimianauranoo. Isipa maqannaa nammari dinni oosirafa ani rameeqeenoo firaa nammari dinni Eeufarateesa nammari mariannoo.

¹⁹⁻²¹ Keenaa maqusanaasa maqa faqa Keennisa maqusanaasa maqa faqa Koodamoonaa maqusanaasa maqa faqa Qeeta maqusanaasa maqa faqa Peerisa maqusanaasa maqa faqa Reefaimma maqusanaasa maqa faqa Amooraa maqusanaasa maqa faqa Kannaana maqusanaasa maqa faqa Kirakasa maqusanaasa maqa faqa Yeebusa maqusanaasa maqa faqa miqimmasee maqannaasa maqa faqa ani aiku asauku nimianaura.

16

Qakaarafa nari amaaku Isamaeerana faqa ufa qu ufafa.

¹ Abarammana anaafa Sarai nammarifa mifa qaafa anaasee marinau, sia faiqi maqanau. Mina ainainira maanaafa Isipa maqannaa maanaafa

marinau. Mina auqu Qakaara nammarifa marinau.

² Sarai nammarifa nári oosana maraseenoo Abarammana qimaminoo qinau, anee iria, Anut-ufa sia faiqi qini qiminoo. Minara maa qini ainainira maanaaqa mara sainanoo mifa ani faqa finoo aqbee faiqi maqa sainaqa qinee qeeqara maraanaura. Miqi qufanoo Abarammafa eedoo qimaseenoo maranau.

³ Abarammafa qisaukuqara taikasee aukuana Kannaana maqa maaqai marufanoo Sarai nammarifa nári ainainira maanaaqa Qakaara nammarina Abarammana aminau.

⁴ Abarammafa Qakaara nammarina faqa aana fufanoo faiqi maranau. Qakaara nammarifa amuaquqaika mafufanoo nasuridanoo nári aqoonnana Sarai nammarina ramoo ramaa ira ufa qimamaqanau.

⁵ Miqufanoo Sarai nammarifa Abarammana qimaminoo qinau. Ani oosanasaa Qakaara nammarifa qini fidiqaamma qimaqaidanoo. Qinee qeeqa kai mina ani amisaafananoo amuaquqaika mafinoo qini uridaaqa raidanoo. Karaambaiqa fannoo kai anindiri ufa rainaannoo. Anee fee, qinee fee andeeqee fee.

⁶ Abarammafa kafa nári qimaminoo qinau. Doo amana ani ainainira maanaaqa ani ameemaanai maridanoo. Naqaamma amaqqararee fee qimasee iridanee, doo miqia. Sarai nammarifa Akaara nammarina maqee maqee oofana qaidanoo ari aqimarunara quqasee sandanau.

⁷ Qakaara nammarifa amaaqa firaree qimasee

Suraa maqa maaqaki fimaru aatata sandee fifiufanoo aadana maqa maaqa qambaanaai nam-mari kaqikaafa ururee maruqoo Karaambaiqa angiroo fannoo Qakaara nammarina paqurim-masee qimaminoo qinau.

⁸ Qakaara nammari, Sarai nammarina ainainira maanaaqa, anee yaindari fee anidanee maaqooqari yai fee fidanee. Miqi qufanoo Qakaara nammarifa qinau, qeeqa rakisirana Sarai nammarina aaqu rufiee sandaidaqa.

⁹ Angiroo fannoo minara iriseenoo maaqi qimasee qimaminau, doo findi finana aneenna rakisira anaasee marinnai kafaa anirandee oonureenana mina ainainira manaqaikia.

¹⁰ Angiroo fannoo kafaa qimaminoo qinau. Qinee moomoo asumu ani amianaqa sia amana asaana rifaranoo.

¹¹ Maqee ani aranandaki faiqi rinoo anee akoonaiqi maqennaranoo anee mina auqu Isamaeera nee qia.

Karaambaiqa fannoo anee aupuraranakiqari mina aaramasee faaqa ruannana irinara minara mi faiqina auqu Isamaeera nee qia.

¹² Mi faiqifa kaasau fainiara foora mariannoo.

Mifa aiqamausa namuqaakamma nimaqainaga misa faqa nari namuqaakamma amaqee-faranoo.

Mifa nari ainaina rakeemasee aaduma marian-noo.

¹³ Qakaara nammarifa nari kai qimirinoo qinau. Qinee kuqaa fee Anutuna qafamasee fee sia kuqirai kaqi maridee qimannimianauree.

Miqi qimasee mina qimamu karaambaiqanara niqafee mari Anutu fee qinau.

¹⁴ Miqooqari misa mi nammari dikaandana auqu reeqa kaqi marira Anutufa qini qiqafai nammari dikaanda fee qiqau. Mi nammari dikaandafa Kadeesa maqusa dinni Beereeda maqusa dinni qambaana marinau.

¹⁵ Qakaara nammarifa kafaa anirandee oonureenoo faiqi maqasoofanoo Abarammafa mina auqu Isamaeera nee qinau.

¹⁶ Mi aukuanna Abarammafa 86 aukuanfa faqaafa marufanoo mina faiqi kambiqanau.

17

Anutufa Isaraee maqannaasara nifaaqa ati aukirafa moodaanaki kira ufa kooroo imarifa maridanoo.

¹ Abarammafa mariufanoo 99 aukuanfa marasoofanoo Karaambaiqa mina afusa kooroo mafi qimaminau. Qinee aiqama afeeka faqaa Anutusa maridaqa. Anee aiqama kari qini ufa qaindusidana andeeqara ainaina kai auqaa.

² Qinee ani faqa qeeqa moodaanaki kira ufa qimasee anisaaqari asumu moomoo kambiqanamaqaanau.

³ Abarammafa mi ufana iriseenoo oorindari maqasaa mapamufufanoo Anutufa maaqi qimasee qimaminau.

⁴ Qinee maa moodaanaki kira ufana ani faqa qidaqa. Qinee kuqaa qima afeekaikidaqa. Anee moomoo maqannaasa ninaakufa marinnaranoo.

⁵ Doo maqee ani auqu Abarammafa marina maqee fuka auqu amiqa. Abaraqaammanee

qianauro. Qinee ani moomoo maqanna ninaak-
ufaika maisaannara ani auqu Abaraqaamma-
nee qianauro.

⁶ Qinee ani faiqi asumu moomoo amianaqa
misakiqari akaqausa karaambaiqa marifara. Ani
asaifaqausa moomoo maridaqa moomoo maqan-
naa marifaranoo.

⁷ Qinee qeeqa qima afeekaikira ufa ani faqa ani
asaifaqausa naaru kambiqainausa faqa qiafan-
nana naaru marira moodaanaki kira ufara foora
rakisianaura. Qinee ani faqa ani asaifaqausa
Anutusa marianauro.

⁸ Anee asaqiraa faira foora maa maqanasaa
mariannana qinee ani faqa ani asaifaqausa faqa
nimianauro. Nimiananoo aiqama Kannaana
maqa maaqa fannoo ani asaifaqausaindi kammi-
nnoo naaru naaru marinaqa qinee misa Anutusa
marianauro.

Abarammana fuka auqu.

⁹ Miqi qimaseenoo Anutufa kaifaa Abaraqaam-
mana qimaminoo qinau. Anee faqa eedoo qi-
masee qini qima afeekai kira ufamau aneenna
asaifaqausa naaru kambiqainausa faqa fuaqa.

¹⁰ Anee faqa ani asaifaqausamara faqa aiqama
eedoo qimasee akoonaiqi faiqiuqa nifaaqa ati
aukuuqa.

¹¹⁻¹² Maaqooqari aiqama akoonaiqi faiqiuqa
maqasaifanoo 8 faasaana aiqaramafinaqa ni-
faqa ati aukuuqa. Ainainira faiqiuqa inniki
mariasa faiqi namu faqa nianaindaraasa feefau-
rumma quqaqaafaqa inniki mariasa faiqi namu
faqa nifaaqa ati aukuuqa. Miqimmasaifanoo

mifa qinee faqa innee faqa moodaanaki kirana uqannifiqaannoo.

¹³ Aiqama uqanna nifaaqa ati aukuaqa. Auku-saifanoo mifa inni nifaaqai qini moodaanaki kira ufa naaruara marianinnanara koorooiannoo.

¹⁴ Inniki qari akoonaiqi moo fannoo sia afaaqa ati aukinafa marinaqa sia qini faiqi aanaaseeki mariannoo fee qianaara. Mifa qini qima afeekaikira ufamau sia finara sia inniki mariani.

¹⁵ Kafaa Anutufa Abaraqaammama qimaminoo qinau, sia aneenna aanaaqara Sarai nammarinee qia. Maqee mina auqa Saraqa nammarifa mariannoo.

¹⁶ Qinee Saraqa nammarina amiqi amiqi maisaanadoo faiqi akoonaiqi ani maqa amiannoo. Mifa moomoo maqannaasa ninoofa marinaqa mina faiqi namukiqari akaqausa karaambaiqauqa marifaranoo.

¹⁷ Abaraqaammama mi ufana iriseenoo maqasaa mapamu finoo naanaidara qidanoo qinau. Amanee 100 aukuaana marara fasiqa fannoo faiqi maqaannoo fee Saraqa nammarifa faqa 90 aukuaana mararafa amanee faiqi maqaannoo fee.

¹⁸ Miqi qimaseenoo Abaraqammama Anutuna qimaminoo qinau. Naqaa saina Isamaeerafa qini ainaina maraqaana ifanee.

¹⁹ Miqi qufanoo Anutufa qimaminoo qinau. Ani anaaqa Saraqa nammarifa ani faiqi akoonaiqi maqasainana mina auqu Isakee nee qia. (Maasa ufakiqari Isakeena auqu naanaidara qiranee qimaqoofanoo.) Qinee ani faqa moodaanaki kira ufa quqaunafa

Isakeenasaa faqa minasaaqari naaru naaru kambiqaiausasaa faqa mariannoo.

²⁰ Isamaeerana faqa anee qianandee, mina faqa amiqi amiqi ianaura. Mina faiqi namu moomoo uqanna kambiqaefara. Akoonaiquqa qisauku qara taikasee qikunni ooqu qaaraqanda 12 marasee uriqararausa marifara. Mina saaqari kambiqaiausaa firaa maqannaa marifaranoo.

²¹ Moo aukwana maa quqoonnasaa kai Saraqa nammarifa ani faiqi Isakeena maqannoo. Qinee qeeqa moodaanaki kira ufa minasaa quqaqaana mariannoo.

²² Anutufa aiqama maa ufana Abaraqaammaana qimamiseenoo doo quqasee finau.

²³ Fifufanoo Abaraqaammafa Anutuna ufa mau finoo mi faasaana kai nari faqa nari amaaku Isamaeerana faqa nari ainainira faiquqa faqa nari ainainiranaki marida maqaqoo faiqisa faqa aiqama nifaaqa ati aukinau.

²⁴⁻²⁵ Abaraqaammafa 99 aukwana marinoo nari afaaqa ati ateeqa aqinau. Isamaeerafa 13 aukwana marasoofanoo mina afaaqa ati ateeqa aqinau.

²⁶⁻²⁷ Moodaa faasaana kai Abaraqaammafa faqa nari amaaku Isamaeerafa faqa nari ainainira faiquqa aiqama nifaaqa ati ateeqaqau.

18

Anutufa Abaraqaammaana faiqi amirara qima afeekaiku ufana.

¹ Abaraqaammafa Mamareena arookasa atukaki suani qambaana aiqaiqa ufanoo nari

uiqaana maqa kooqiki ooqu faaqee marufanoo karaambaiqa maaqimmasee mina afusaa kooroo inau.

² Ooqufaaqee marufaqa faiqí qaaramoo namu anufanoo Abaraqaammafa niqafamaseenoo nári oosana mareenoo findimeegeenoo misa anuqoo sandee oonureenoo oorindari maqasaa kum-marama finoo qimanniminoo qinau.

³ Oo uriqararausa, qinee inni dadaaqirausa maridaqa sia qini aidaaqa raaqa.

⁴ Qinee qianaqa nammari minisaifaqa inneeqa niku nammari uqu seeqa maa saqarina atukaki adooaqa.

⁵ Qinee akaqa narana nimiana namaseeqa afeeka mara mareeqa fuaqa. Qinee inni dadaaqianeera maaqoo aniafanoo. Innee mai anianannai qini duqu uqeeraafanoo. Minara eedoo qifaqa narana nimia. Miqi qufaqa misa qiqau. Dufi dufi doo nimina naanee qiqau.

⁶ Abaraqaammafa iriseenoo uiqaa maaqaki sandeenoo oonureenoo Saraqa nammarina qimaminau. Anee kai kaqi parauaqa amiqirana moodaa beeka marasee feemu suqa.

⁷ Miqi qimaseenoo raudamaki sandeenoo burimakau maruqoo oonureenoo burimakau aanaaqi amiqirana amaqi qumooqu kirana mara rumba mareenoo narí ainainira faiqi amisoofanoo kai kaqi ufanoo arusee suqanau.

⁸ Abaraqaammafa burimakau naamma anoona faqa naamma anoona fadameena faqa feemu faqa burimakau suqarana faqa mara maree mini nimufaqa naqau. Abaraqaammafa

saqari atukaki misa faqa maridanoo narana nimufaqa naqau.

⁹ Misa namaseeqa Abaraqaamma maaqi qimasee iraqau. Ani anaqa Saraqa nammarifa yai fee marinoo fee qufanoo mifa qinau. Maa uiqaana maqaki maridanoo fee qinau.

¹⁰ Miqi qufanoo misakiqari moo fannoo qinau. Moo aukuaana maa quqoonnasaa kai qinee kafa aniraananoo ani anaqa Saraqa nammarifa akoonaiqi faiqi maqaannoo. Miqi qimarfanoo Saraqa nammarifa uiqaana maqa kooqiki mi fasiqana aanaaqiannai ooqu faaqee idanoo irimarinau.

¹¹ Miqi qufanoo Saraqa nammarisa Abaraqamasa asooqa uqanna marufanoo Saraqa nammarifa faqa faiqi maqara aukuaana ooqai taikanau.

¹² Saraqa nammarifa minara iriseenoo nari kai naanaidara qidanoo qinau. Qinee faqa qeeqa nauraiqindiri asooqa marida. Naqimmasee fee qeeqa qifaaqi faqa aana fuanauree.

¹³ Miqufanoo karaambaiqa Abaraqaamma qimaminoo qinau. Naqaa fee ifanoo fee Saraqa nammarifa naanaidara qinoo fee. Maana qinee asooqa maridaqa naqimandee faiqi maqaanau-ree qinoo fee.

¹⁴ Nana ainainee moo ainaina Yaaweefa sia amana auqaannoo fee mifa amana aiqama ainaina auqaannoo. Qinee anoona ufa qidaqa, moo aukuaana maa quqoonnasaa qinee kafa aniraananoo Saraqa nammarifa akoonaiqi faiqi maqaannoo.

15 Saraqa nammarifa mina iriseenoo rufia mareenoo unna qimasee qaoo qinau, Qinee sia naanaidara qiqa. Miqi qufanoo misa uriqararafa Karaambaiqa qimaminoo qinau. Anee naanaidara qianaqa iriqa.

Karaambaiqa Soodooma maqusa aruaninnanara qinau.

16-17 Mi fasiqa qaaramoo namusa Abaraqaammana faqa ooqu fiufaqa Soodooma maqusai qafee maruqoo muqunnisoofanoo Karaambaiqa narí kai qimasee irinau. Qinee auqararee qunna ainaina sia Abaraqaammana umeerama amaqaanaura.

18 Mina saaqari kambiqainausa firaa maqanna marifaranoo. Aiqama maqannaasa Abaraqaammana saqaraanannai amiqi amiqimma nimaqaanaura.

19 Abaraqaammafa narí faiqi namu faqa misasaqari kambiqainausara faqa andeeqara oosanamau kai fuageera fuki faaki ianifeera rusandeesammasee maraqiafana. Misa miqi faqa qinee qima afeekaikiafanna ainainausa aiqama miqimma nisaanaura.

20 Miqi qimiriseenoo Yaaweefa Abaraqaammana akooqoo kooroommasee qimaminau. Soodoomma maqusanaasa faqa Koomoora maqusanaasa faqa manda oosana fiqaranoo marifaqa akaqausa minara nikoo uqanna qaifaqa qimaqimifaqa iriqa.

21 Qinee ooqureeqa mi fasiqa anaaseesa mi oosanna auqee mariana qafaanaura kuqaa fee unna fee maridanoo fee.

²² Mi qaaramoo fasiqa namusakiqari qaara qanda Soodoomma maqusai ooqu fimarufanoo Karaambaiqa Abaraqaamma faqa marinau.

²³ Abaraqaammafa Karaambaiqa oorinni oonu reenoo iramirinoo qinau. Kuqaa fee anee andeeqarausa faqa aaqee mariasa faqa aiqamee naru taikennaree.

²⁴ Qaara fasiqa niku nisauku taikasee qini qisauku qara taikasee 50 andeeqarausa mi maqusanaki marifana anee aiqamee naru taikenna-ree. Kafaa 50 andeeqarausa marifana mi maqusanana asumu quqennaree.

²⁵ Sia amana andeeqarausa faqa mandaiki-rausa faqa moodaanaki narinnaranoo. Mifa sia andeeqanoo maridanoo. Andeeqarausa faqa aaqee mariasa faqa sia amana moodaa oosana kai niminnaranoo. Aiqama maa maqanasaa mariasa siaasa marianafa andeeqara oosana kai maraa.

²⁶ Karaambaiqa Abaraqaamma ufa iriseenoo qimaminau. Qinee qaara fasiqa niku nisauku taikasee qini qisauku qara taikasee 50 andeeqarausa mi maqusanaki paquriqa sia mi maqusanana kuridianaura.

²⁷ Abaraqaammafa mina iriseenoo kafaa qimaminau. Oo karaambaiqa qinee qifaaqa quqasee ani qimamunna ufana mi numoona minni qisaa. Qinee faiqi faiqi maridaqa aaqamammasee ani faqa moomoo kari ufa qidaqa.

²⁸ Amanee 50 sia marifana 45 kai andeeqarausa marifana moodaannai qisauku 5 minaki sia marinnanara irisee narinnaree. Karaambaiqa nari qimaminoo qinau. 45 andeeqarausa

mi maqusanaki marifaqa sia kuridi taikaanaura.

²⁹ Abaraqaammafa mina iriseenoo kafaa qimaminau. Oo karaambaiqa qaara fasiqa niku nisauku taikasee 40 andeeqarausa marifana aiqama narinnaree. Karaambaiqa mina iriseenoo qimaminau. Qinee qaara fasiqa niku nisauku taikasee 40 andeeqarausa paquriqa mi maqusana sia kuridianaura.

³⁰ Abaraqaammafa iriseenoo kafaa Karaambaiqa qimaminau. Qinee kaifaa ani qimaminana anee sia qiniara aanoo qia. Moodaa fasiqa aiku asauku taikasee qini qisauku qara taikasee 30 andeeqarausa marifana naqaa fee innaree. Yaaweefa iriseenoo qinau. Qinee 30 andeeqarausa paquriqa sia miqianaura.

³¹ Abaraqaammafa kafaa qimaminau. Qinee qifaaqa quqasee ani faqa moomoo ufa qimarunnana mi numoona minni qisaa. Mi maqusanaki moodaa fasiqa 20 kai marifana naqaa fee innaree. Karaambaiqa iriseenoo qinau. Qinee 20 andeeqarausa paquriqa sia mi maqusana kuridianaura.

³² Abaraqaammafa kaifaa qinau. Oo karaambaiqa sia aanoo qia. Qinee moo ufa kafaa qianaura. 10 andeeqarausa paqurimasee naqi fee innaree. Miqi qufanoo Karaambaiqa qinau. Qinee qisauku qara 10 kai andeeqarausa paquri mandee sia kuridi nimaqaanaura.

³³ Karaambaiqa Abaraqaammana faqa ufa qimaseenoo doo ooqu finau. Ooqu fufanoo Abraqaammafa quqasee anirandee amaaqa finau.

19

Soodoomma faqa Koomoora faqa manda oosanna maraqau.

¹ Abaraqaammafa muqunnisoo qan-girooqanda Soodoomma maqusai ooquree maqusa kooqiki qafofanoo Rootafa miqoo ooqu faaqee marinau. Maridanoo Rootafa miqanda nindafeenoo maqeenoo oonu miqanda noorinni oorindari maqasaa rupaitama fufanoo maaqi qimasee qimannimainau.

² Oo qini uriqarara qanda qinee inniqara dadaaqirara maridaqa. Innee qara qini maaqaki aniree niku nammari uqusee qini maaqaki faiqaaqa. Faiqee duna kananaana findi finaqa inneeqa finnannai fuaqa. Miqi qimasoo faqa miqanda qaoo qida qiqau. Saina maa qanda maqusa qambaana faiqaanaura.

³ Rootafa sandanainai qimaseenoo ufaqa miqanda mina faqa maaqaki keeqaqau. Ooru roofanoo Rootafa narí ainainira faiqiuqara qufaqa misa ooruku anoona sia qai feemuna faqa amiqira narana faqa suqasee nimufaqa naqau.

⁴ Namaseeqa faiqarara imarufaqa mi maqusaanaasa faiqí kumaaraa nauraiqi aiqama aniree Rootana maaqa fuseemma dati mambufaqa Rootana maaqi qimasee aaraqau.

⁵ Mi faiqi qanda faasai ani maaqaki keeqaa qanda yai fee maridaqee. Anee miqanda maasa qiminaqa mi qanda manda oosana nimia.

⁶ Rootafa misa ufa iriseenoo rauda mafinoo narí aanaaqianaindari kooqi ititasee qimannimainau.

⁷ Qinee qaoo qira ufa inni qimannimidaqa. Sia uqanna maa manda oosanna maraaqa.

⁸ Iriaqa, qeeqa qiraamuna qaara qanda sia faiqi faqa nuaqanda inni nimisaanaqa inneeqa iriranannai kai maraaqa. Maa fasiqa qanda qini maaqaki ani raafaqa aqoondi kammaqauna mariafaqa qinee amiqimmasee miqandasaa rakisidaqa.

⁹ Miqi qimasee qimannimisoofaqa misa aiqama maaqi qiqa. Anee moo maqannaafa maasaki ani marianafa. Yafee qifanee anee maasara qaoo qidanee. Anee nimaaraa. Sia nimaarainaga sia ani aqoondiqara kai mandaikamma nimaqaanaura, ani faqa firaqoo mandaikamma amaqaanaura. Miqi qimaseeqa misa Rootana afeeqa aquseeqa mina kooqi rufadaairara iqau.

¹⁰ Maaqakiqari Rootana aqoondiqara Rootana qumu rarisameeqee maaqaki aqusee kooqi itifaqau.

¹¹ Ititaseeqa mi fasiqausa madaanai marusa aiqama nifu qimbasoofaqa kooqiara randoosia minnisaga.

Rootafa Soodoomma maqusakiqari finau.

¹² Minni soofaqa Rootana aqoondi qara iramiriqa qiqa. Maa anee marianna maqusanaki ani ati akaqausa maridee. Kai kaqi aneenna araamuqmaaka faqa airaamaku oondamara faqa aneenna atiuqa faqa aiqama nifiqee moosaa fua.

¹³ Maasa maa maqusana damunamma aquanaura. Karaambaiqa maa maqusanakina oosana

oosana mandainaina kambiqaifanoo mi ufana iriseenoo maaqanda diqiqaifaqa maa maqusana kuridirara qumidaqa.

14 Rootafa iriseenoo narí araamuna qara ni-faaqi qarara qutaaqamaqoo fasiqa qanda faqa qimanniminnau. Doo anifaqa innisaimbaqa mootinai fuaqa. Anutufa maa maqusana damunirara qinoo. Miqi qufaqa mina airaamaku qara sia iriqau. Quteeti qidanoo mifoo qimasee kaqi mariqau.

15 Iaqqoo faqa kananaana angirooqara Rootana kafa fauki faaki qiqau. Doo kai kaqinana aneenna anaafa faqa aneenna araamuna qara faqa nifiqee fua. Innee faqa maa maqusana namu faqa kuridifaara.

16 Rootafa iriseenoo oonauqee anauqee imarufanoo mina aqoondiqara mina asauku faqa mina anaafa asauku faqa mina araamunaqara faqa qumaree rarisameeqee aanai ubeekaqa. Yaaweefa Rootanara amuqusufanoo miqinai.

17 Nifiqa quqasoofanoo angiroo moo fannoo qimanniminnoo qinai. Innee sandamafuafa kuqifaara. Fidaqa sia quandafi qafaafa. Afaasasaa faqa sia kasooiaqa. Innee kuqifaara, aqanai sandee ooru fuaqa.

18 Rootafa iriseenoo maaqi qimasee qimanninai. Sia aneenna qiannannai diiqaa.

19 Anee firaqqoo qiniara amuqusifana qini kuqiranakinaana maraanoo. Aaqana nianai marifaqa minni fimarianoo mi narirafa qini faqa darinaqa kuquanoora.

²⁰ Anee kaqikaa maqusa muqunni qafaidanee. Mifa adeedi marifaqa amanee qinee minni sandaanauree. Kaqikaa maqusa uqanna maridanoo qinee minni oonureega asumu marianaaura.

²¹ Miqi qimasoofanoo angiroo moo fannoo qimaminau. Doo amana qinee minara eedoo qidaqa. Sia qinee mi maqusana kuridianaura.

²² Doo kai kaqi sandaa. Anee oonu rainaqa miqoo qeeqa qunna ainaina auqaanaura. Rootafa mi maqusanara kaqikaa maqusee qunara misa mi maqusana auqu Sooara fee qidaqa.

Karaambaiqa Soodoomma maqusa faqa Koomoora maqusa faqa kuridinau.

²³ Mi kananaanna suani afu maqee uri marufanoo Rootafa Sooara maqusai oonu ranau.

²⁴ Oonuroofanoo Karaambaiqa ida namu faqa koorootaqasaaqari qeemari idanara foora irana namufaqa quqasoofanoo aakuara foora Soodoomma maqusasaa faqa Koomoora maqusasaa faqa aqufinau.

²⁵ Aqufinoo mi arumunaki maru maqusausa faqa aiqama faiqi anaasee faqa andanda faqa naru taikanau.

²⁶ Rootana anaqa nari afaaqi faqa sandee fidanoo oonu quandafinoo afu maqeenoo doo miqoo ooruku kammafi kisaqa saqariara foora rakiqanoo marinau.

²⁷ Moo kananaana Abaraqaammafa findimeeqeenoo Karaambaiqa faqa ufa quqoo ooqu finau.

²⁸ Miqooqari Abaraqaammafa mara muami qafoofanoo Soodoomma faqa Koomoora faqa mi

afaasanasaa maru maqusausaki ida muna fanoo firaafa uqanna ooru fufanoo qafanau.

²⁹ Anutufa mi afaasanasaa maru maqusausa faqa maqa maaqa faqa kurididanoo Abaraqaamanara iriseenoo Rootafa mariu maqusausa naridanoo Rootana kai mareeqee kaqinni quqanau.

Mooabana faqa Amoona faqa niku nisauku kambiqoo ufafa.

³⁰ Rootafa Sooara maqusara rufiaseenoo nari araamuna qara nifiqeenoo amuaqu namusaa ooni aamara marunaki ooru marinau.

³¹ Mariufanoo mina araamuna indaaruuqaafa inaaqianaana maaqi qimasee qimaminau. Doo maasa qikoofa asooqa maridanoo. Sia maa saqanna anindiri marasee faiqi mara qimifaqa maqara fasiqauqa maridaqa. Aiqaama faiqi auqeeu oosanafa sia anindiriki maridanoo.

³² Doo aninaqa anindiri uainna nammari auquseeqa nari nikoona amiananoo moomoo namaseenoo furu farinaqa anindiri mina faqa sakasee faiqaa. Miqi masaifanoo anindiri nikoofa anindiri faiqi mara qiminaqa anindiri faiqi namu findifiqa mariaqa.

³³ Miqi qimaseeqa mi eendanaki miqanda uainna nammari moomoo nari nikoona amisoofanoo neeneeseenoo furufara masoofanoo anasaafa naaree nari akoona faqa sakasee faiqanau. Uainna nammari fannoo mina furu fara masoofanoo nari araamuna auqoo ainainara sia irinau.

³⁴ Kananaana anasaafa nari auna qimaminoo qinuu. Faasai eendaki qinee qeeqa qikoona faqa sakasee faiqeeqa. Doo fafaa eendaki

anindiri uainna moomoo kaifaa amiananoo namaseenoo furu farinana anee faqa mina sakasee faiqaa. Miqimasee aninidiri qeeqa qikoona faiqi maqasaana faiqí asumu kaqi mariaqa.

³⁵ Miqi qimasee doo mi eendanaki miqanda uainna nammari moomoo nári nikoona amisoofanoo furu faramma soofanoo auna fannoo nári akoona faqa sakaseenoo faiqanau. Rootafa uainna nammari namseenoo furu faridanoo nári araamuna auqoo ainainara sia irinau.

³⁶ Miqimmasee Rootana araamuna qara nári nikoona faqa faiqoonannai nimuaqu qaikiqau.

³⁷ Miqimasee marufanoo indaaruuqaa araamana fannoo faiqi akoonaiqi maqaseenoo mina auqu Mooaba nee qinau. Mariu fannoo Mooabafa findifinoo Mooaba maqannaasa nikoofaikamminoo marinau.

³⁸ Auna fannoo mifa faqa faiqi akoonaiqi maqaseenoo mina auqu Beenaami fee qinau. Mariu fannoo Beenaamifa findifinoo Amoona maqannaasa nikoofaikamminoo marinau.

20

Abaraqaammafa faqa Abimeereekana faqa ufa.

¹ Abaraqaammafa Mamareena maqusa minni seenoo Neekeefa maqa maaqakina ooqu finau. Mifa Kadeesa maqusa dinni Sura maqausa dinni qambaana ooqu marinau. Marikinoo kafaa Keeraara maqusaki ooqu marinau.

² Keeraara maqusaki kaqi maridanoo Abaraqaammafa nári aanaqara Saraqa

nammarinara qini dauna fee qinau. Keeraara maqannaa karaambaiqa mina auqu Abimeereekafa marinau. Mifa Abaraqaamma ufa iriseenoo Saraqa nammarinara mina auna fee qimaseenoo narí ainainira faiqiuqa niqiqoofaqa Saraqa nammarina mareeqeeqa Abimeereekana amiqau.

³ Miqoo marufanoo Anutufa Abimeereekana qaina saa kooroo qimasee qimaminau. Anee kuqinnaranoo maa anaaseena anee maraannana moo fasiqa anaqa maridanoo.

⁴ Abimeereekafa Saraqa nammarina sia sakasee faiqanau. Minara iriseenoo Anutuna qimaminoo qinau. Oo karaambaiqa qinee andeeqarausa maridaqa anee qini faqa qini faiqí anaasee faqee narinnaree.

⁵ Abaraqaammafa narí kai Saraqa nammari-nara qini dauna fee qifaqa qinee iriqa. Kafaa maa anaaseefa faqa narí afaaqiara qinoo qini qifasaa fee qinoo. Miqi qifaqa qinee mina irunanoo qini daakirafa qimaqiminoo sia aaqarafa aniki mariannoo fee qifaqa maraunanoo sia aaqarafa qiniki maridanoo.

⁶ Anutufa iriseenoo kafaa qainasaa qimaminoo qinau. Eeoo qinee iridaqa kuqaa ani aakirafa qimamifana andeeqaananoo. Qinee kai ani qumee rafaafunana anee sia qini mandaikamma qimaqeenana mi anaaseena faqa sakasee faiqaananoo.

⁷ Doo findi finana mi fasiqana anaqa kaifaa narí afaaqinnai aiqainanoo fuani. Abaraqaammafa qini tamummaqara fasiqa maridanoo. Mifa

aniara innaaru qinaqa iriseeqa siamma ani arua-
nauranoo. Anee sia mi anaaseena aiqainaqa ani
faqa ani maqannaasa faqa aiqama naruanaura-
noo.

⁸ Abimeereekafa mina iriseenoo Kananaana
eendai findifinoo narí maqannaa uriqararasa
naaramaseenoo Karaambaíqa qu ufana qiman-
nimisoofaqa firaa qoo rufiaqau.

⁹ Abimeereekafa kafa Abaraqaammama aara-
maseenoo iramirinau. Anee nana oosanee maasa
qiminanee. Nana manda ainainee maasa ani
amunanee anee qini faqa qini qiku qisauku faqa
firaa ummaara qiminanee. Sia auqaaqaa ira
oosana maasa qimiananoo.

¹⁰ Nana irirafee marifanee maaq inanee.

¹¹ Abaraqaammama mina iriseenoo maaqi qi-
masee Abimeereekana qimaminoo qinau. Qi-
nee maaqi qimasee qimiriqa maa maqannaasa
sia Anutunara rufiqee mariafaqa qini daruseeqa
qini qinaaqa maree maaqi qimaseeqa miqi qiqa.

¹² Qini qinaaqa kuqaa qini dauna maridanoo
qini qikoona araamuna maridanoo moo anaasee
faiqi marifaqa maraqaunafa maridanoo.

¹³ Anutufa qiniara aneenna akoona maqusa
minnisee anaamurinni nuannee qufaqa qinee
Saraqaa nammarina qimamiqa maaqi qiqaifana.
Anee qiniara qini uriqarara fee qinana qiniara
qini qifasaa fee qia.

¹⁴ Miqi qufanoo iriseenoo Abimeereekafa
Saraqaa nammarina kafa Abaraqaammama
aminau. Mikari mifa sipsipauqa faqa
burimakauqa faqa ainainira maanaaqa
kumaaraauqa faqa Abaraqaammama aminau.

¹⁵ Amiseenoo maaqi qimasee qimaminau. Qini maqa maaqa maridanoo. Aneenna kai aidinaqoo maria.

¹⁶ Miqi qimaseenoo quanda finoo Saraqa nammarina maaqi qimaseenoo qimaminau. Doo ani afasaana siruaa munnimma wan tauseenna (1,000) amiqa, maa ummaarafa taikainaqa ani faqa mariasa ani aaqarana sia mariifoo qiaqeera. Kafaa aigamausa aniara sia mandoosana auqee maqi qiaqa.

¹⁷⁻¹⁸ Yaaweefa Saraqa nammarinaki kambiqoonara iriseenoo Abimeereekana, na aiku asaukukinaa aanaaseeuqa faiqi maqara aana ititasoofaqa faiqi maqarara sia amanaikiqau. Miqiqa marufanoo Abaraqaammafa Abimeereekanara Anutufinnai innaaru qufanoo Anutufa Abimeereekana faqa nari anaqa faqa nari ainainira maanaaqauqa faqa misa aurirana taikannisoofaqa kafaa faiqi maqarana amanaikiqau.

21

Isakeena maqoo ufafa.

¹ Karaambaiqa nari qimaqoondede inoo Saraqa nammarina amiqi amiqimma amaqaanau.

² Miqimmasoofanoo Abaraqaammafa nauraiqi marufanoo Saraqa nammarifa amuaqu qaikinoonoo Abaraqaammana faiqi Anutufa qimaqooqoo maqaanau.

³ Maqasoofanoo Abaraqaammafa mina auqu Isakeenee qinau.

4 Auqu ramaseenoo qisauku dinni taikasee dinni ani qaaramoo maraseenoo 8 faasaana aiqarama fufanoo Abaraqaammafa Anutufa qimamundee inoo Isakeena afaaqa ati ateeka aqinau.

5 Abaraqaammafa uan handeereeta 100 aukwana faqaafa marufanoo Isakeena maqanau.

6 Saraqa nammarifa Isakeena maqaseenoo maaqi qinau. Anutufa asasirana faqa naanaidara qirana faqa qiminoo. Aiqamausa minara irinausa qini faqa naanaidara qifaranoo.

7 Miqi qimaseenoo Saraqa nammarifa maaqi qinau. Yafee moo fannoo Abaraqaammama qimaminoo Saraqa nammarifa nari faiqi maqasee amana naamma amiannoo fee qiannoo fee, sia amana moo fannoo miqi qiannoo. Miqi qimari-afaqa qinee asooqa namuki Abaraqaammama faiqi akoonaiqi maqeeqa.

8 Isakeefa aaqoo irinoo naamma minnisoo faasaana Abaraqaammafa qoomaqa firaqoo suqananau.

Abaraqaammafa Qakaarana faqa Isamaeer-ana faqa niqiqoo ufafa.

9 Miqimmasee mariufanoo moo kari Isipa maqannaa anaasee Akaara nammarina amaaku fannoo Saraqa nammarina amaaku Isaakeena faqa sarari marinau.

10 Sararimarufanoo Saraqa nammarifa mina qafamaseenoo Abaraqaammama qimaminoo qinau. Maa ainainira manaaqana faqa nari faiqi faqa niqainaqa fuaqa. Maa anaaseena faiqi

fannoo sia ani qumiasana qini faiqi mararee qinnana maraannoo.

¹¹ Isamaeerafa faqa Abaraqaammama faiqi marunara Abaraqaammama mi ufana irufanoo aundura ummaara ranau.

¹² Miqufanoo Anutufa Abaraqaammama qimaminoo qinau. Sia faiqi aanaaqi qisanoosara amuqusiani. Anee Saraqa nammarifa qimamindee ia. Isakeena saaqari kai qinee qima afeekaikiarfannandee inoo moomoo asumu kambiqeefaranoo.

¹³ Ani ainainira anaasee faiqi faqa qinee dadaaqiananoo moomoo faiqi maqasainaqa moo maqannaasara foora marifaranoo. Mifa faqa ani faiqi kai maridanoo.

¹⁴ Abaraqaammama mi ufana iriseenoo moo kananaana findifinoo feemu aafaqa faqa aandau apata taquki nammari sakaseenoo Akaara nammarina uqaruma amiseenoo faiqi aakua-maqaseenoo aiqanau. Akaara nammarifa narí amaaku afiqeenoo Beeraseeba maqa maaqaki aadana maqa maaqaki ooqu maridanoo oonuree aniree ida marinau.

¹⁵ Aandau apata taqukinaa nammari aiqama taikafufanoo Akaara nammarifa narí faiqi kaqikaa saqari atukaki aisanau.

¹⁶ Aisaseenoo kaqikaaqoo kisaacaqasaa oonu ooqufaqqee idanoo narí kai qimirinau. Qinee sia amana qeeqa faiqi kuqirana qafaanauranoo. Miqi qimaseenoo miqoo ooqufaqqee maridanoo iki raqee marinau.

¹⁷ Miqi marufanoo Anutufa mi faiqina iki raqarana irufanoo innaarunaindari Anutuna

angiroo moo fannoo Akaara nammarina qimaminoo qinau. Akaara nammari anee nanaree ummaara maraidanee. Sia rufiaa. Ani amaaku iki raqarana Anutufa doo irinoo.

¹⁸ Doo findi finana oonu faiqi rafususee amiqi amiqia. Qinee mina saaqari kambiqainausa firaa maqannaasaika mannisaanaura.

¹⁹ Miqi qimaseenoo Anutufa Akaara nammarina afu maqa amufanoo nammari madika qafanau. Qafamaseenoo aandau apata taqu mara mareenoo oogu saka nari faiqi amufanoo nanau.

²⁰ Anutufa Isamaerana rakisi amaqee marufanoo innooqanau. Innooqafufanoo mifa Paraana aadana maqa maaqaki maridanoo uaqarana akoofasa marinau.

²¹ Paraana aadana maqa maaqaki marufanoo mina anoofa Isipa maqusaindaraa maanaaqa mara aminau.

Abaraqaammafa Abimeereekana faqa moodaanaki kira ufa qinau.

²² Mikari Abimeereekafa Pikoarana nari rakira fasiqauqa uriqararana afiqeenoo Abaraqaammafa maruqoo oonu reeqa maaqi qimasee qimamiqa qiqau. Anee aiqama ainaina auqaannanaki Anutufa dadaaqidanoo.

²³ Doo maqee Anutuna afusaa qima afeekaikkammasee qini faqa qini faiqi namu faqa qini saaqari naaru kambiqainausa faqa sia mandaikamma nimaqaa. Qinee ani amiqimma amaqaqiafana anee faqa miqi kai inana qima afeekaikkammasee qini faqa maa maqa maaqana

anee marianna maqa maaqana faqa amiqimma qimaqaa.

²⁴ Abaraqaammafa minara iriseenoo qimaminau. Qinee miqimmianauree qimasee qima afeekaikinau.

²⁵ Miqi qimaseenoo Abaraqaammafa Abimeereekana oori kandara ufakiqari qimaminau. Ani ainainira faiqiuqa qini nammari madika rakirara maseeqa mareea.

²⁶ Abimeereekafa iriseenoo qimaminau, Qoo qinee sia mina iridaqa, yafee miqinoo fee. Anee minara sia qima qimunaqa sia iriqiafana. Maqee kai iridaqa.

²⁷ Abaraqaammafa minara iriseenoo burimakauqa faqa sipsipauqa faqa mareeqee Abimeereekana aminau. Amisee miqanda moodaanaki kiqau.

²⁸ Abaraqaammafa sipsipa aanaaqiuqa dinni taikasee dinni ani qaara marasee 7 naadumasaa raina quqanau.

²⁹ Abimeereekafa mina qafamaseenoo Abaraqaammama iramirinau. Anee nanaree miqidanee.

³⁰ Miqi qimasee iroofanoo Abaraqaammafa qinau. Anee maanauqa maraa. Anee marainnanannoo qiniara maa nammari dikaandana indu finafoo qinnaranoo.

³¹ Misa miqoo qima afeekaika maseeqa mi maqusana auqureeqa Beeraseeba fee qiqau.

³² Miqanda Beeraseeba maqa maaqaki moodaanaki kira ufa qimasoofanoo Abimeereekafa narí rakira fasiqauqa

uriqararana Pikoorasandiri nári maqusai Firistia maqa maaqai fiqau.

³³ Miqanda fufanoo Abaraqaammafa tamarisika saqari Beeraseeba maqusai ummaquseenoo naaru naaru marira Karaambaiqa Anutunara innaaru qimarinau.

³⁴ Mi kamuqoo Abaraqaammafa kisaqasaa Firistia maqa maaqakina marinau.

22

Anutufa Abaraqaammanara aneenna amaaku Isakeena tatufirana suqa qimianne qu ufafa.

¹ Mariiufanoo Anutufa Abaraqaammana amanammasee qafaanee qimasee innaarunaindari aaramasee qinau. Oo Abaraqaama qufanoo Abaraqaammafa qinau qinee maaqoo maridaqa. Miqi qufanoo Anutufa qimaminau.

² Aneenna amaaku Isakeena ani amaaku moodaa, kaaqa amuqusa imariannana afiqeenana Moorja maqa maaqai ooru rainaqa qinee aaqana moo uqafiqaanaura. Anee mi aaqannanasaa aneenna amaaku arusee qini tatufirana suqa qimia.

³ Miqi qimasoofanoo kananaana findifinoo narí dookisaa ida rufariseenoo minasaa quqaseenoo narí ainaini maru faiqi qanda faqa narí amaaku Isakeena faqa nifiqeenoo findimeeqee Anutufa qimamunnai finau.

⁴ Qaara afuru aanai fi faiqaqau. Qaaramoo kufanoo Anutufa qimaqoo aaqannafa nianasaa marufanoo qafanau.

⁵ Qafamaseenoo Abaraqammafa narí ainaini maru faiqi qanda qimanniminoo qinau. Inneeqara maaqoo marida doonkisa rakisiaqa. Qeeqa qimaakundiri miqoo ooru Anutunara innaaru qimasee inneeqara iannai qumuanaura.

⁶ Miqi qimaseenoo Abaraqaammafa tatufirana suqaaninna idana mareeqeenoo Isakeenasaa soofanoo maroofanoo narí ida qeemaruna akuru mandeenoo mina qumareenoo musuka faqa qumareenoo doo narí faiqi afiqeenoo Anutufa qimaqoo aqaanna kaaqa ooru finau.

⁷ Aanai ooru fimarufanoo Isakeefa narí akoonaa aaramaseenoo qinau, Qipoo qufanoo Abaraqaammafa maqi qimasee qinau. Nanaree qidanee qufanoo Isakeefa qinau. Qinee qafaunana anee idati faqa ida rumbarana faqa maree fimarinanoo, yaafee tatufirana suqeefandinna sipsipafa maridanoo fee.

⁸ Abaraqaammafa maaqi qimasee narí amaaku qimaminau. Anutufa narí kai sipsipa aanaaqi moodaa qiminaqa tatufirana suqamianaura. Miqi qimaseeqa miqanda moodaanaki ooru fiqau.

⁹ Miqanda Anutufa qimaqoo aqaannasaa ooru reeqa Abaraqaammafa ooniuga mareeqee aaku aakummaseenoo ida mina amuaaqa quqaseenoo narí faiqi Isakeena rumbeeqeenoo rafusu idasaa rusinau.

¹⁰ Rusiseenoo musuka qumareenoo narí faiqi kuqa arusaaneera inau.

¹¹ Karaambaiqa angiroo innaarunaindari aaramaseenoo qinau, Abaraqaamma, Abaraqaamma,

miqi qufanoo Abaraqaammafa qinau. Qinee maa maridaqee qufanoo Karaambaiqa qinau.

¹² Sia faiqi arua, sia mandaikamma amaqaa. Sia aneenna asaukukoo aneenna faiqi arua. Doo maqee qinee iridaqa anee Anutuna ufa qaindusidana mina ufa afaqee mariananoo. Anee aneenna amaakuara aneenna amuqusa uqanara sia qaoo qiananoo eedoo kai qiananoo.

¹³ Miqi qufanoo Abaraqaammafa uqeerafinoo qafoofanoo andandaki sipsipa akoona saqari aanaaqiki aanai rutaqusee marufanoo qafanau. Qafamaseenoo Abaraqaammafa narí amaaku amaqa maqeenoo sipsipa akoona aruseenoo Anutuna tatufirana suqa aminau. ¹⁴ Miqooqari Abaraqaammafa mi aaqanna auqu reenoo, Karaambaiqa nimira aaqanee qinau. Minara maqee mindaraasa maqi qidaqa, Yaaweefa narí aaqanasaa nimidanoo fee qidaqa.

¹⁵ Karaambaiqa angiroo innaarunaindari kaifaa Abaraqaammama aaramaseenoo qinau.

¹⁶ Karaambaiqa aniara maqi qidanoo. Qinee qeeqa duqusaa qima afeekaikammasee qidaqa. Qinee firaqoo ani amiqimma amaqaanaura. Anee aneenna amaaku moodaa sia qaoo qiannanara qinee miqianaura.

¹⁷ Qinee kuqaa qima afeekaikammasee anisaa ani aruakinausa ani aiku asauku innaarunai fasaura foora moomoo marifaranoo nukudara foora ani amianauranoo. Ani aiku asauku namuqaa rafaqa fusee misa ainaina maree marifaranoo.

¹⁸ Aiqaama maqannaasa qiniara ani aiku asauku amiqi amiqimma nimaqaafanandee

masee maasa faqa amiqi amiqimma qimaqaannee qifaranoo. Anee qini aakapara ufa qaindusuannanara miqiga.

¹⁹ Abaraqaammafa miqooqari narí faiqi Isakeesandiri narí ainainira faiqi qara qumi nifiqee narí maru maqusanai Beeraseeba maqusai ooqu marinau.

Naqoorana aiku asauku nuqu.

²⁰ Mariiufanoo Abaraqaammafa irufanoo Mirikaa nammarifa Naqoorana Abaraqaammana akaqa faiqi qisauku dinni taikasee dinni oonu qaarammoo marasee 8 maqee foo qiqau.

²¹ Usafa indaarufa Busafa mina aanaaqiannaafa marinau, mina aanaaqiannaafa Keemueerafa mifa Arammanna akoofa marinau.

²²⁻²³ Mina aanaaqiannaafa Keeseedafa marinau, mina aanaaqiannaafa Qasoorafa marinau, mina aanaaqiannaafa Piradasafa marinau, mina aanaaqiannaafa Didarafa marinau, misa ninaaqiannaafa Beetueerafa marinau. Mifa Reebeeka nammarina akoofa marinau. Mirikaa nammarifa mi faiqi namusa Naqoorana Abaraqaammanna akaqasaa maqanau.

²⁴ Reumma nammarifa Naqoorana inaaqiannaa anaasee fannoo Teebana faqa Kaqammana faqa Taqasana faqa Maakaana faqa maqanau.

23

Saraqa nammarifa kuqufanoo Abaraqaammafa akundara maqa feefauru ufafa.

¹ Saraqa nammarifa 127 aukwana marasee kuqinau.

² Kannaana maqa maaqaki Qeeboorona maqusaki kuqufufanoo Abaraqaammafa mina kuqiranara soofaari marinau.

³ Abaraqaammafa narí anaqa kuqirana mafi quqasee Qeetana aiku asauku maruqoo oonureenoo maaqi qimasee iramirinoo qinau.

⁴ Qinee moo maqannaasa inni qambaana ani maridaqa. Amanee qini maqa moo qimifaqa feefauru nimiseeqa qeeqa qinaaqa minaki akundaanauree.

⁵ Qeetana aiku asuku irisee Abaraqaamma qimamiqa qiqau.

⁶ Anee maasa ufa iria, maasa ani qafaunana anee afeeka rakisirafa marianafa mariananoo. Aneenna anaqa maasa amiqira madikaki akunda. Maasa aiqamausa mi madikanaki akundara nara asasidaqa.

⁷ Miqi qufanoo Abaraqaammafa misa noorinni kumma ramafinoo qimanniminoo qinau.

⁸⁻⁹ Innee eedoo qiafaqa amanee innee Eefarona, Sooqarana amaaku iramirifanoo inni nifusaa Makapeera maqa maaqaki narí anaadoo atinni ooni aamara marina qiminaqa feefauru amana kai amiseeqee mi maqa maaqana qeeqaindi kammasee qeeqa qiku qisauku nikundee marianauree.

¹⁰ Eefarooka narí Qeetana aiku asauku faqa faandaamura kooqiki ufa suqiranaki maridanoo iriseenoo aiqamausa iramirufanoo Abaraqaamma qimaminoo qinau.

11 Oo uriqararafa iria, qinee aiqama mi maqana faqa ooni aamara minaki marina faqa ani amiana. Maaqoo qeeqa faiqi anaasee nifusaa ani amianana aneenna anaqa minaki akundaa.

12 Miqi qufanoo Abaraqaammafa Qeetana aiku asauku noorinni kumma ramafinoo Eefarona aiqamausa iriaqera firaqoo qimaminoo qinau.

13 Amanee qinee iramiriananee irinnaree. Qinee mi maqana atisaa aiqama feefauriana. Qinee feefauru amianana anee eedoo qimasee marinaqa qinee qeeqa qinaaqa miqoo akundaana.

14 Eefarona minara iriseenoo maaqi qimasee Abaraqaammafa qimaminau.

15 Oo uriqararafa, maqa feefauru 400 siruaa maridanoo, mi feefauruna maasa qeeqa qambaana naqa fee masee rainaanauree. Anee aneenna anaqa kaqi minaki akundaa.

16 Abaraqaammafa iriseenoo eedoo qimaseenoo sikeera maraseenoo 400 qummaara ainaina dinni quqaseenoo siruaa dinni quqasoofanoo amana kai ufanoo aminau. Eefarona aiqamausa nari maqannaasa Qeetana aiku asauku nifusaa qufanoo iriseenoo miqi kai minau. Nari sikeera qummaara amana kai Eefarona aminau.

17 Miqimmasee Abaraqaammafa Eefarona aiqama ainaina Makapeeraa maqa maaqaki suani oosana qaannai Mammareena maqusa adeedi maruna feefaurummasoofanoo Abaraqaammanaindi kinau. Mi feefaurirafa maqa faqa ooni aamara minaki maruna faqa

aiqama saqariuqa mi maqana atisaa maru saqarisa faqa aiqama moodaanaki rafaafaqafinau.

¹⁸ Aiqama Qeetana aiku asauku miqoo suqiranaki mariusa mi maqa maaqanara Abaraqaammanaindi fee qiqau.

¹⁹ Miqimmaseenoo Abaraqaammafa nari anaafa Saraqa nammarina mi ooni aamaranaki Kannaana maqa maaqaki akundanau.

²⁰ Miqimmasoofanoo mi maqafa faqa ooni aamara minaki marufa Qeetana aiku asaukundi mariufa Abaraqaammanaindi kufanoo mi maqana nikundara maqaikinau.

24

Isakeena anaafa mara amu ufafa.

¹ Doo Abaraqaammafa kaaqa nauraiqi marinau. Karaambaifa Abaraqaammafa aiqama auqoo ainainna amiqi amiqimma amaqee marinau.

² Abaraqaammafa nari oosana maraseenoo nari ainainiranasaa kisaafasaa rakisi maruna aaramaseenoo qimaminoo qinau. Anee aneenna asauku qifundana ameemaanai aususee afeekaika masee qima afeekaikia.

³ Qinee aniara Karaambaifa innaaruna faqa maqa faqa auqu Anutuna auqusaa qima afeekaikamasee sia qini qimaaku Kannaana maqannaa anaasee mara amiannee qidaqa.

⁴ Anee qinee kambifaafanna maqusanai oonuree qini atikinaa maanaafa mara maree Isakeena muqu amia.

5 Miqi qimasoofanoo mi rakisirafa maaqi qinau. Doo amana, ooru raanaqa mindaraa maanaqa irafanoo narí maqa maaqa minisee mai qumirara ititinaqa amanee qinee ani amaaku aiqaananoo anee qumunna maqa maaqanai ooru fuannoo fee.

6 Miqi qufanoo Abaraqaammafa qinau. Oo sia uqanna anee qini qimaaku aiqainanoo minni oorufuani.

7 Yaaweefa innaarunaindaraa Anutufa qeeqa qikoona maqusaindaraana faqa qeeqa ainaina maqasaqaqaraana faqa mara mareenoo maa maqa maaqanasaa quqaqoosa maridaqa. Mifa qima afeekaikammasee qini faqa qini qiku qisauku faqa maa maqa maaqana nimianauree qinau. Mifa narí angiroo aiqainanoo ani afunni finana ooru qini qimaaku anaaqa afiqee qumi naranoo.

8 Mindaraa maanaqa fannoo sia mai qumiraree qinana miqoo kai qima afeekaika maqaanna ufanakiqari idukuananoo. Qini qimaaku sia minni afiqee ooru fua.

9 Miqi qimasoofanoo mi ainainira fasiqafa narí asauku Abaraqaammama narí uriqararana afundana ameemaanai quqaseenoo qinau, doo qinee anee qianandee ianaura.

10 Miqi qimaseenoo raudama kinoo Abaraqaammama kammeera, qoosa fooqaana, mina qisauku qara maraseenoo narí uriqararana ainaina amiqirana kai maraseenoo kammeerasaa quqaseenoo mareenoo finau. Abaraqaammama akaqa Naqoorafa Mesopotamia

maqusai suani dinni ataaqeenni marunnai ooru finau.

¹¹ Aanai faiqanoo fiifiu fanoo eenee marufanoo aanaaseeuqa nammari sakee maruqoo oonu ranau. Oonuree qafoofanoo maqusa adeedi nammari sakee maruqoo oonu reenoo miqoo nari kammeerauqa quqasoofaqa mariqau.

¹² Nari kammeerauqa quqaseenoo mi fasiqafa Yaaweenara innaaru qinoo qinau. Oo Anutu qini uriqararana Abaraqaammanna Anutufa anee qini faqa maridana maqee qini dadaaqa. Anee qini uriqararana Abaraqaammanna faqa qima afeekaika maqoonafa maqee anonaikiani.

¹³ Qinee nammari sakee mariana aqa adeedi marunaqa, aanaaseeuqa nammari ani sakee mariafaqa maridaqa.

¹⁴ Moo maanaqa anirainafa qinee maaqi qimasee qimamiana. Amanee aneenna taquki nammari saka qiminaqa naanauree. Mifa qiniara namasainafa ani kammeerauqa faqa nimianauree qinnanara minara aneenna ainainira faiqi Isakeena utaaqama amaqaqaanafee qiana. Mi ainainafa kambiqaqainafa anee qini uriqararanasaa qima afeekaikunna ufanara iriana.

¹⁵ Mifa miqi qimasee innaaru qimarufanoo moo maanaqa Reebeeka nammarifa nammari taqu akumaaqa aku maree aniranau. Mifa Abaraqaammanna akaqa Naqoorana faqa mina anaqa Mirikaa nammarina faqa faiqi Betueerana araamuna marinau.

¹⁶ Mina oori afiri amiqi amiqi irafa sia auqu marufa aniroofanoo qafoofanoo ooqu nammari

saka maree urinau.

¹⁷ Ururoofanoo Abaraqaammanna ainainasaa rakisira fasiqa fannoo mi funnai sandee oonureenoo maaqi qimasee qimaminau. Amanee aneenna taqukinaa nammari kaqikaana qini qiminaqee naanauree.

¹⁸ Miqi qufanoo mi manaaqafa qinau, eeo faiqi firaafa, doo naa qimaseenoo nammari taqu afiqu quqasoofanoo doo nanau.

¹⁹ Namasoofanoo mi manaaqafa nari kai qinau. Qinee nammari moo faqa sakasee ani kammeer-
auqa nimii saanaqa nama saifanoo nimuaqu ian-
noo.

²⁰ Miqi qimaseenoo nari nammari taqu kai kaqi difaaniki adiaseenoo sandeenoo ooqu moo faqa saka mareenoo muru adia soofaqa kammeer-
auqa naqau.

²¹ Kammeerauqa nammari nimi marufanoo Abaraqaammanna ainainira fasiqa fannoo ireeda kai kasoinoo maridanoo qafaidanoo maaqi qimirinau. Doo fee Yaaweefa qinee kisaagasaa anunnanara anoonai kidanoo fee.

²² Kammeerauqa nammari neeneesee nimuaqummasee marufanoo Abaraqaammanna ainainira fasiqa fannoo koorannai auqira qimmusa mi manaaqana aikiki qusamaqaseenoo kafa koorannai auqira isaaqama qaaraqanda asaukuki usamaqaseenoo iramirinoo qinau.

²³ Anee yana araamunee maridanee amanee qini qimaqimia. Amanee maasa namu aneenna akoona maaqa kina nifiqee finaqee faiqaanau-
ree.

²⁴ Reebeeka nammarifa mina iriseenoo nari qimaminoo qinau. Qini qikoofa Beetueerafa

Naqoorana faqa Mirikaa nammarina faqa faiqi maridanoo.

²⁵ Maasa maaqa narana amana maridanoo ani faqa aniasa faqa ani kammeerauqa faqa narana maaqa faqa nimifaranoo.

²⁶ Miqi qimasoofanoo Abaraqaammana ainainira fasiqa iriseenoo maqasaa oorindari mapamu finoo Karaambaiqa narí uriqararana Abaraqaammana Anutuna amooqidanoo maaqi qinau.

²⁷ Oo Anutu Abaraqaammana Anutufa, anee amiqi amiqi uqanna miananoo. Anee Abaraqaammana amiqi amiqi imariannanara sia taikeenoo kaqi fidanoo. Karaambaiqa fannoo qini uriqararana atiuqa iannai andeeqasee qifiqee aninoo.

²⁸ Miqi qimasee innaaru qimasoofanoo Reebeeka nammarifa sandeenoo narí anoona maaqai oonureenoo aiqama mi ufausa qimaminau.

²⁹⁻³⁰ Reebeeka nammarina afasaafa Rabanafa Reebeeka nammarina ufa iriseenoo koorannai auqira qimmusa qusamaqoona faqa koorannai auqira isaaqama qusamaqoona faqa qafamaseenoo raudamaku fanoo ooqureenoo nammari sakee maru madikana afainni qafooofanoo Abaraqaammana ainainira fasiqa miqoo nammari afainni narí kammeerauqa naaqa kikiqinoo marinau.

³¹ Marufanoo qafamaseenoo qimaminoo qinau. Qini faqa aninaqa maaqai fua. Karaambaiqa fannoo ani amiqi amiqimma amaqee marifa mariananoo. Nanaree anee

maaḡoo maridanee. Qinee ani faiqara maaḡa doo deedaḡammasee ani kammeerauḡa marirana faḡa deedaḡiḡa.

³² Abaraḡaammama ainainira fasiḡa fannoo mina iriseenoo narí faḡa marusa faḡa narí kammeerauḡa faḡa nifiḡeenoo doo maaḡai fiḡau. Maaḡai oonu roofanoo Rabanafa kammeera saaḡaraa ḡumaara mara maḡasaa ḡuḡaseenoo narana nammari nimiseenoo Abaraḡaammama faiḡi namu nammari nimufaḡa niku nammari uḡiḡau.

³³ Niku nammari uḡu soofanoo Rabanafa narana niminau. Nimufanoo Abaraḡaammama ainainira fasiḡa fannoo ḡaoo ḡimasee ḡinau. Sia ḡinee kaḡi naanaura. Qinee ḡiraree ḡunna ufana ḡima nimiseeḡa miḡoo naanaura. Rabanafa minara iriseenoo ḡinau. Doo ḡinaḡa maasa iria.

³⁴ Miḡi ḡimasooofanoo Abaraḡaammama ainainira fasiḡa ḡima niminoo ḡinau. Qinee Abaraḡaammama ainainira fasiḡa maridaḡa.

³⁵ Karaambaiḡa firaaḡoo ḡini uriḡararana amiḡi amiḡimma amaḡaseenoo ainaina faḡaafaikamma amaḡeenoo. Karaambaiḡa sipsipauḡa faḡa burimakauḡa faḡa siruaa faḡa koora faḡa ainainira fasiḡauḡa faḡa maanaaḡauḡa faḡa kammeerauḡa faḡa doonkiuḡa faḡa moomoo aminoo.

³⁶ ḡini uriḡararana anaḡa Saraḡa nammari ifa asooḡasaa faiḡi akoonaiḡi maḡasoofanoo ḡini uriḡararafa narí aiḡama ainaina mina kai aminoo.

³⁷ ḡini uriḡararafa ḡifaḡa ḡinee afeeka ufannai ḡima afeekaikammaseeḡa mina aamuḡaḡira ufa

qaindusuaanauree qiafananoo qinau. Anee maqoo qaraasa Kannaana maqanna kinaa anaasee sia uqanna mareeqee qini qimaaku amia.

³⁸ Anee ooru qini qikoona maqannaasaki qini atikinaa maanaaqa mara maree muqusee qini faiqi amia.

³⁹ Qinee mi ufana iriseeqa narí maaqi qimaseeqa qimamiqa. Mi manaqafa sia qini faqa quminaqa naqaa fee ianauree.

⁴⁰ Qunanoo mifa qinoo, qinee Karaambaiqa ufa aiqama kari afaqee marunasa maridaqa, mifa narí angiroo aiqainanoo ani faqa fidanoo dadaaqinanoo anoona kambiqaannoo. Anee qini faiqi anaqa qini maqannaasakinaana qini qikoona atikinaana mareennaranoo.

⁴¹ Moodaa aana kai anee idukinna aanafa maridanoo. Ooru rainaqa misa maanaqa moo sia qimifanoo ani qima afeekaikirafa taikainana idukira fasiqaikinnaranoo.

⁴² Qinee Abaraqaamma mi ufana iriseeqa nammari dikaanda mariqoo ururee maaqi qimasee innaaru qiqa. Oo Karaambaiqa qini uriqararana Abaraqaamma Anutufa mariananoo, qinee auqaunna ainainna anoona kambiqaani.

⁴³ Qinee nammari dikaanda mariqoo mariana. Mariananoo maanaqa moo fannoo nammari sakarara anirainaqa qinee nammari-ara innaaru qiana.ura.

⁴⁴ Mifa eedoo qimaseenoo qini faqa qini kammeerauqa faqa nammari nimiranoo mifa

anee qini uriqararana amaaku utaaqama amaqaqaanafa mariannoo.

⁴⁵ Qinee qireeda kai innaaru qimarunanoo Reebeeka nammarifa maqusaindari nammari taqu akumaaqa akumareenoo aiqareenoo nammari sakararee qimasee fifaqa qinee maaqi qimasee qimamiqa. Amanee anee nammari qimina naanauree.

⁴⁶ Miqi qunanoo mifa kai kaqi narí nammari taqu akumaaqa qaraana afaimma quqaseenoo qinoo. Namasainaqa ani kammeerauqa faqa nimianaura. Miqi qifaqa qinee namasaunanoo mifa kammeerauqa faqa nimifaqa neea.

⁴⁷ Namaseeqa qinee maaqi qimasee iramiriqa ani akoofa yafee, qunanoo mifa qimaqiminoo qinoo. Qini qikoofa Beetueerafa Naqoorasa Mirikaa nammarisa faiqi maridanoo. Qinee mi ufana iriseeqa koorannai auqira qimmusa usuamaqaseeqa kafa koora isaaqama asaukuki usuamaqeeqa.

⁴⁸ Usuamaqaseeqa doorindari maqasaa kummarama fifaqa qeeqa uriqarana Abaraqaammuna karaambaiqa Anutuna amooqiqa. Mifa qini qifiqamareenoo andeeqasee qini uriqararana atiuqa iannai murusaifaqa qinee misa niraamuna qeeqa uriqararana amaaku anaaqa marianinnana paquriqa.

⁴⁹ Doo maqee uqanna Rabanna anee qima qiminaqa iria. Anee qini uriqararana andeeqa amaqararee qinana qima qimia. Anee sia andeeqa amaqararee qinana minara faqa qima qiminaqa qinee qeeqa ianna ainainara oonu mafi irianaura.

⁵⁰ Rabanafa faqa mina akoofa Beetueerafa faqa narí qimamiqa qiqau. Maa ufafa Karaambaiqinaindari ani marifaqa maasa naqiffee masee minara ufa qinauree.

⁵¹ Maa Reebeeka nammarifa marinoo. Afiqamaree fua. Munusainanoo mifa ani uriqararana amaaku aanaaqaikinoo, Karaambaiqa narí qindee iani.

⁵² Abaraqaammanna ainainira fasiqa mi ufana iriseenoo oorindari maqasaa aqufinoo Karaambaiqa amooqimamaqanau.

⁵³ Amooqimaseenoo findifinoo qamunna faqa siruaa faqa koora faqa firaa feefauru aqimaru oonisa Reebeeka nammarina aminau. Mifa firaa munnimma aqimaru ainainausa mina afasaana faqa mina anoona faqa niminau.

⁵⁴ Nimi seenoo narí faqa anusa saimbaqa narana faqa nammari faqa neenee seeqa faiqau. Faiqee iaqoofanoo kananaana Abaraqaammanna ainainira fasiqa Reebeeka nammarina afasaana faqa anoona faqa qima niminau. Amanee qinee maqee qeeqa firaa finnai fuanauree.

⁵⁵ Miqi qufaqa miqanda qiqau, saina Reebeeka nammarifa maasa faqa moodaa amaanaki fee, qisauku qara taikaseenoo afuru fee faiqeenoo fuani.

⁵⁶ Miqi qufanoo Abaraqaammanna ainainira fasiqa fannoo qinai. Doo sia maasa rafaqa fua. Doo qinee maqee fidaqa. Karaambaiqa fannoo qinee kisaqasaa anunna saikana anoona doo kambiqasaifaqa qafamaseeqa sainaqa qeeqa uriqarara finnai fua.

⁵⁷ Miqanda minara iriseeqa qimamiqa qiqau. Saina Reebeeka nammarina aaramasee qifanoo naqaa fee qiannoofee.

⁵⁸ Miqi qimaseeqa Reebeeka nammarina aaramaseeqa iramiriqa qiqau. Anee maa fasiqana faqa maqee fee finnaree. Miqi qufanoo doo maqee fuaauree qinau.

⁵⁹ Misa mi ufana iriseeqa Reebeeka nammarifa faqa minasaa rakisi maru anaaseefa faqa Abaraqaammama ainainira fasiqa faqa mina faqa anusa faqa doo niqiqoofaqa fiqau.

⁶⁰ Reebeeka nammarifa firarufaqa maa ufanannoo mina afaaqooqa qiqau. Oo maasa qisooki anikiqari aruakinausa moomoo uqanna firaaqoo uqanna kambiqeefara ani aiku asaku marinausa namuqaa nárí nifaqaaqa mandaida misa maqa maaqa namu faqa misa ainaina faqa maree marifaranoo.

⁶¹ Miqi qimasee afaaqooqa qimasoofanoo Reebeeka nammarifa faqa ainainira maanaaqauqa faqa kammeerasaa akaree fufaqa Abaraqaammama ainainira fasiqa namu faqa fiqau.

⁶² Isakeefa Neekeefa maqa maaqakiqari aadana maqa maaqai nammari dikaanda maruqoo ooqu marinau. Mi nammari dikaandana auqu kaqi marirafa qini qiqafaidanoo fee qimariqau. Mifa Kannaana maqa maaqa qaannai suani afu dinni ataageenni marinau.

⁶³ Miqoo maridanoo Isakeefa moo eenoonnai aatata nidanoo uqeera fufanoo mirinni qafoofanoo kammeerauqa qumiqau.

⁶⁴ Reebeeka nammarifa kammeera saaqari uqeera finoo Isakeena qafanau. Reebeeka nammarifa qafamaseenoo narí kammeera saaqari maqasaa aqufinau.

⁶⁵ Aqufufanoo Abaraqaamma anaainira faiqi iramirinau. Ya fasiqa fee maasa unannai anidanoo fee. Miqi qufanoo Abaraqaamma anaainira fasiqa qinau. Qini uriqararafa anidanoommi qufanoo Reebeeka nammarifa narí oosana mareenoo qamunna mafi oorisaa ititanau.

⁶⁶ Isakeefa uru paqurimmasoofanoo Abaraqaamma anaainira fasiqa fannoo aiqama ainaina auqoonara Isakeena qimaminau.

⁶⁷ Qimamisoofanoo Isakeefa Reebeeka nammariina mareeqeenoo narí maaqaki Saraqa nammarifa mariunaki quqasoofanoo mina aanaaqai kinoo marufanoo Isakeefa Rebeeka nammariinara aidi marufanoo mi aidirafa Isakeefa narí anoofa kuqunara amuqusiufa doo asoanau.

25

Abaraqaammafa moo aanaaseesaa faiqi maqoo ufafa.

(1 Stori 1:32-33)

¹ Abaraqaammafa anaasee moo maranau. Mina auqu Keeturaa nammarifa marinau.

² Minasaa faiqi moomoo maqanau. Faiqi moo indaarugaana auqu Simaramafa marinau mina aanaaqianaafa Yookasanafa marinau mina aanaaqianaafa Meedanafa marinau mina aanaaqianaafa Midianaafa marinau.

Mina aanaaqianaafa Isabakafa marinau ninaaqianaafa uqanna Suaafa marinau.

³ Indaarugaana aanaaqianaafa Yookasanafa mifa Seebabana faqa Deedana faqa nikoofa marinau. Deedana aiku asuku Asuraa maqannaasa faqa Reetusimma maqannaasa faqa Reeummimma maqannaasa faqa mariqau.

⁴ Midiana amaaku indaarugaa faiqi Eefaafa marinau, mina aanaaqianaafa Efeerafa marinau, misa ninaaqianaafa Qannookafa marinau misa ninaaqianaafa Abidafa marinau, misa ninaaqianaafa uqanna Eeradaafa marinau. Minamusa Abaraqaammama anaafa Keeturaa nammarina saaqari kambiqarusa mariqau.

⁵ Abaraqaammama nari aiqama ainaina Isakeena kai aminau.

⁶ Amiseenoo nari kaqi maridanoo moo anaasee faiqi namu faqa amiqira ainaina oosana oosana Abaraqaammama kaqi nimiseenoo Isakeefa maruqooqari suani oosana qaannai maqa maaqai nianai niqooafaqa mitinai oonu mariqau.

Abaraqaammama kuqufuafaqa akundoo ufafa.

⁷⁻⁸ Abaraqaammama asooqaqeenoo kuqinau. 175 aukwana marasee kuqinau.

⁹ Kuqufuafaqa mina amaaku qara Isakeesa Isamaeerasa miqanda nari nikoona iri mara maree Makapeeraa maqa maaqaki Mamaree maqusa suani oosana qaannai ooni aamaraki akundaqau. Mi maqana Eefarona Sooqarana amaaku Heetana aiku asaukundi feefaurum-maqoonaki Abaraqaammama akundaqau.

¹⁰ Abaraqaammafa kaqi maridanoo Qeetana aiku asauku feefauru maqoonakina Saraqa nammarina faqa Abaraqaammana faqa nikundaqau.

¹¹ Abaraqaammafa kuqufufanoo mina amaaku Isakeena Anutufa amiqi amiqi imarinau. Isakeefa kaqi marira nammari dikaanda qini qiqafaidanoo fee qimaru nammari dikaandana aaqa marinau.

Isamaeerana aiku asauku nuqu.

(1 Stori 1:28-31)

¹² Qakaara nammarifa Saraqa nammarina ainainira maanaaqa Isipa maqannaa maanaaqa marufa mifa Abaraqaammana amaaku Isamaeerana maqoofa marinau.

¹³⁻¹⁵ Isamaeerana faiqi namu maaqimmiga mariqau. Indaarugaafa Neebaiotafa marinau, mina aanaaqianaafa Keedarafa marinau, misa ninaaqianaafa Adabeerafa marinau, misa ninaaqianaafa Mibasamafa marinau, misa ninaaqianaafa Misammafa marinau, misa ninaaqianaafa Dummaafa marinau, misa ninaaqianaafa Masafa marinau, misa ninaaqianaafa Qadadafa marinau, misa ninaaqianaafa Teemafa marinau, misa ninaaqianaafa Yeeturafa marinau, misa ninaaqianaafa Nafisafa marinau, misa ninaaqianaafa uqanna Keedeemaafa marinau.

¹⁶ Misa qisaukuqara taikasee qikunnooqu qaara marasee maqannaasa nikausaikiqa mariqau. Miqiqa maridaqa nariqa nuqu nariqa maqusa faqa nariqa uiqaana maqusa faqa qafaafauree mariqau.

17 Isamaerafa 137 aukwana maraseenoo kuqinau.

18 Isamaerana aiku asauku Isipa maqusaindari suani oosana qaannai Sura maqa maaqa faqa, Qafiraa maqa maaqa faqa qambaana Asiria maqa maaqai fimarugo mariqau. Misa Abaraqaamana aiku asauku akaqausa maruqooqari naaduma mariqau.

Eesausa Yookooboosa maqoo ufafa.

19 Moo ufa Abaraqaamana amaaku Isakeena ufa maridanoo.

20 Isakeefa qaara fasiqa niku nisauku taikasee 40 aukwana maraseenoo Beetueerana araamuna Reebeeka nammarina maranau. Rabannana asookina maranau. Beetueerafa Arameean-naindaraafa Meesoopootamia maqa maaqaki ani marinau.

21 Reebeeka nammarifa sia faiqi maqanau aafanaasee marinau. Isakeefa minara iriseenoo Yaaweenara innaaru qimarinau. Yaaweefa mina ufa iriseenoo dadaaqufanoo Reebeeka nammarifa amuaqu qaikinau.

22 Amuaqu qaikufanoo faiqi qaara qanda mina aranandaki maridaqa raki mariqau. Raki marufanoo Reebeeka nammarifa qinau, maa ainainafa nanaree qiniki kambiqaidanoo fee qimaseenoo karaambaiqunnai oonuree anoonufa qimamianifeera innaaru qinau.

23 Innaaru qufanoo Yaaweefa qimaminoo qinau.

Qaara maqannaasa ani aranandaki maridaqa. Anee nariara nariara rairai qimariasanikooqanda maqeennaranoo.

Moo fannoo moo uriqarara afeeka faqaafa mari-
anno.

Akaqa fannoo afasaana rafaqa fuaninafa mari-
anno.

²⁴ Reebeeka nammarina faiqi maqarafa
aniroofanoo qaara qanda maqanau.

²⁵ Indaarugaana afaqa kaaqa taatuqee ari-
noo marinau, mina afaqasasa asaasi aanaqi
marinau. Mina auqu Eesau nee qiqa. (Mina
auqu oosana asaasi fee qiqa).

²⁶ Inaaqianaafa indaarugaana aiku ataa raki-
sisimma uqirafa quminau. Minara mina auqu
Yakooboo nee qiqa. (Mina auqu oosana aiku
ataa fee qiqa.) Isakeefa qaaramoo fasiqa niku
nisauku taikaseenoo 60 aukwana maraseenoo
miqanda maqanau.

*Eesaufa nari indaarugaa faiqi ainaina mina
akaqa aminau.*

²⁷ Miqanda innoqafuqa Eesaufa uqarana
akoofasa maridanoo sia ooqu marufa kaqi ni-
ranara aidimarufa marinau. Miqi marufanoo
Yakooboofa sia miqi marinau. Fifirafa mari-
danoo maqasasaa marufa marinau.

²⁸ Isakeefa Eesaunara aidi marinau. Mifa
aandau arusoofanoo nee marunara minara aidi
marinau. Reebeeka nammarifa Yakooboonara
rimarinau.

²⁹ Moo kari Yakooboofa narana suqasee auqee
marufanoo mina afasaafa nandaki niniuufa aara-
roofanoo anireenoo qinau.

³⁰ Anee taatuqee narana auqee mariannana
doo mina mara qiminaqa naa daarandee mar-
ifaqee qinau. Miqi qimasooqaqaa misa minara

iriseeqa Eesaunara Eedoomee qimariqau. Mi auguna oosana taatuqee fee qimariqau.

³¹ Yakooboofa iriseenoo qinau, aninidiri qikoofa anee indaaruuqaa faiqi mariananoo ani afaaqooqa qima amaqee marina qiminaqa narana ani amianauranoo.

³² Eesaufa qinau. Saa qinee daararai faqa kuqua qaammidaqa qini mi ainainausa sia qini dadaaqifaranoo.

³³ Yakooboofa iriseenoo qinau, aneenna ufa qima afeekaika mandee qiminaqa qinee narana ani amianaura. Qimasoofanoo Eesaufa Yakooboona qima afeekaika mandee indaaruuqaa qinau.

³⁴ Miqi qima afeekaika masoofanoo Yakooboofa quanda fufanoo feemu faqa nara ainaina faqa nammari faqa Eesauna amufanoo namasee doo finau. Miqi maseenoo Eesaufa nari indaaruuqaa faiqi marunara akooqoofanoo nari akaqa amisee quqasee finau.

26

Isakeefa Keeraa maqa maaqai faqa Beeraseeba maqa maaqai faqa mariu ufafa.

¹ Abaraqaammafa maru aukuanna aandaroo firaafa narufanoo Abaraqaammafa Isipa maqa maaqai ooqu finau. Kafa minna amaaku Isakeefa maru aukuanna aandaroo narufanoo Isakeefa Keeraa maqusai Abimeereekana maqusai finau. Abimeereekafa Firistia maqannaasa uriqararafa Keeraa maqusai marunnai finau.

² Isakeefa Keeraa maqusai oonu marufanoo Karaambaiqa maaqi qimasee qimaminoo qinau. Anee sia Isipa maqa maaqai ooqu fua. Maaqoo qinee aniara mariannee qunnaqoo kai maria.

³ Maaqoo kai marinaqa qinee ani faqa marida amiqi amiqida dadaaqianauro. Maa maqa maaqana faqa anisaa ani aruakinausa faqa nimi-anaura. Qinee minara Abaraqaammama ufa qima afeekaika masee amianauroo qiafannana doo ani faqa qima afeekaikiqa amianauroo.

⁴ Qinee anisaa ani aruaki kambiqainausa fasaura foora moomoo amianauro. Qinee maa maqa maaqana misa nimianauro. Aiqama maqannaasa aniree maaqi qimasee innaaru qifaranoo. Oo Anutu anee Isakeena aiku asaku amiqi amiqimma nimaqoonandee inana maasa faqa amiqi amiqimma qimaqaa.

⁵ Abaraqaammama ani akoofa qini sandufa faqa aamuqaira ufa faqa afaqee marunara qinee ani amiqi amiqimma amaqaanauro.

⁶ Isakeefa Anutuna mi ufana iriseenoo eedoo qimaseenoo Keeraa maqusai maridanoo Isipa maqa maaqai sia ooqu finau.

⁷ Keeraa maqannaasa fasiqauqa mina aanaaqara iramirufanoo Isakeefa qini qisooki fee qinau. Isakeefa nari anaqa Reebeekaa nammarifa oori amiqirafa marufanoo qini darusee qini qinaqa mareefoo qimaseenoo rufia mareenoo qini qisooki fee qinau.

⁸ Isakeefa kaqi kaaqoo marinoo moo kari nari anaqa Reebeeka nammarina faqa madaanai ooqu faaqee narisaa narisaa mundaqa marufanoo mi maqannaasa uriqararafa nari maaqaki

ooqufaaqee maridanoo qafanau.

⁹ Qafamaseenoo Abimeereekafa Isakeena aaramaseenoo qinau. Maa anaaseefa ani anaaga uqanna maridanoo. Anee nanaree qini qisooki fee qinane. Isakeefa qinau. Qini qinaaqa fee qianaqa darifooru miqi qiqa.

¹⁰ Abimeereekafa iriseenoo qinau. Anee maasa naqaa fee maqimaqeennee. Qini maqanna moo fannoo ani anaaga sakasee faiqaifana anee mi ummaarana maasa qimianaiqini.

¹¹ Miqi qimaseenoo nari maqannaasa aiqama naarama quqaseenoo maaqi qimasee qima nima. Yafee maa fasiqanee mina aanaaqee mandaikamma nimaqaiqa qinee kuqa kai mina aruanauranoo.

¹² Mi aukuanai Isakeefa narana ummaqusoofanoo kambiqafufanoo amiqimmasee anoona mafufanoo unakira aukuaana moomoo uqanna unakinu. Karaambaiqa amiqi amiqimma amaqaasee dadaaqunara miqinu.

¹³ Karaambaiqa dadaaqufanoo mina ainaina rairaaufanoo kaaqa ainaina faqaafa marinuu.

¹⁴ Mifa moomoo sipsipa faqa burimakau faqa ainainira faiqiuqa faqa marunara Firistia maqannaasa niraanaqee marinuu.

¹⁵ Ooqai Abaraqammafa kaqi maridanoo indufuqoo nammari dikaandausa Firistia maqannaasa aiqama rafaafa fiqau.

¹⁶ Moo kari Abimeereekafa Isakeena aiqama ainaina tia qafamaseenoo rufia seenoo qimaminu. Doo anee maasa uridaaqarana mariananoo. Anee maasa maqa maaqa quqasee moosaa fua.

17 Isakeefa mi ufana iriseenoo mi maqa maaqana minniseenoo narí uiqaana maaqa Keeraa noopunduki usakasee miqoo kisaagasaa marinau.

18 Miqoo ooqu Isakeefa narí akoona nammari madikauqa Firistia maqannaa rafaafa fuqoona paqurimmaseenoo kafaa indufuseenoo narí akoofa auquroo auquna kai kaifaa auquranau.

19 Isakeena ainaini maru fasiqausa mi arumunaki fuka madika indufiufaqa nammari paquriqau.

20 Paquri masoofaqa Keeraa maqannaa sipsipasa rakisi marusa mi nammarina qafamasee Isakeena sipsipa rakisirausa faqa rakirarida qiqau. Maa nammarifa maasaindi maridanoo. Miqi qufanoo Isakeefa mi nammari madikana auqu Tinoorira nammari madikee qinau.

21 Miqi qimasooafaqa mina ainainira fasiqa namu kafaa moo indufiqau. Keeraa maqannaasa minara faqa miqi kai iqau. Isakeefa mina iriseenoo minara faqa niranaqara nammari fee kai qinau.

22 Miqi qimaseenoo kafaa quqasee moosaa oonureenoo miqi kai minoo moo nammari madika indufinau. Miqoo minara sia tinoo taanoo rirafa marufanoo mi nammari madikana auqureenoo nifaafa quqasee mana manira nammari madikee qinau. Magee Karaambaiqa fanoo mana manirana maasa qimifaqa maridaqa maaqoo aiqama ainaina masaananoo rairaaianoo.

23 Doo miqoo mariufanoo miqoo minni seenoo Beeraseeba maqa maaqai finau.

24 Miqoo marufanoo moo eendaki akooqoo Karaambaiqa maaqi qimasee qimaminau. Qinee ani akoona Abaraqaammanna Anutusa maridaqa. Sia anee rufia rufiaqia. Qinee ani faqa nidaqa. Qeeqa ainainira fasiqa Abaraqaammanna faqa qima afeekaikafannanara iriseeqa ani amiqi amiqi ianaura anisaa ani aruakinausa moomoo kambiqeefaranoo.

25 Isakeefa Karaambaiqa mi ufana iriseenoo ooninnai qainda auquseenoo Karaambaiqa aandau tatufirana minasaa suqa amiseenoo innaaru qinau. Miqoo Isakeefa nari uqaana maqa burimakau apatannoo usakaseenoo marinau. Minaki maridanoo nari ainainira fasiqauqa niqoofaqa moo nammari madika indufiqau.

Isakeesa Abimeereekasa eedoo qimasee moodaanakiku ufafa.

26 Abimeereekafa Keeraa maqa maaqaindari Ausafatana nari irirana amimaru fasiqana faqa nari sundiauqa uriqararana Pikoarana faqa Isakeena qafararee qimasee Beeraseeba maqusai aniqau.

27 Aniroofanoo Isakeefa iramirinoo qinau. Naqi fee qifaqee qiniara nikooqoofaqa diiqamasoosa marunnannai kafaa anidane.

28 Miqi qufanoo Abimeereekafa faqa mina faqa anusa qiqau. Karaambaiqa ani faqa marinara maqee maasa iridaqa. Ani faqa maasa faqa qambaana kuqaa qima afeekaikirafa marianifeera iridaqa.

29 Maasa aniara qima afeekaikammasee sia maasa mandaikamma qimaqaannee qidaqa.

Maasa sia ani mandaikamma amaqaafannandee inana maasa faqa sia mandaikamma qimaqaa. Maasa ani amiqi amiqimma aisaafanana anee asooaranaki finau. Magee akooqoo uqanna Karaambaiqa fannoo ani amiqi amiqimma amaqaaidanoo.

³⁰ Miqi qimasoofanoo Isakeefa qoomaqa deedaqinau. Deedaqammasoofaqa misa narana namaseeqa faiqaqau.

³¹ Kananaana findi fufaqa narí qimami narí qimamimma afeekaikamasee firaa ufannai qima afeekaikamma rafaqaqifiqau. Miqimmaseenoo Isakeefa nimandara ufa qimasoofaqa aqoondi kammasee quqasee fiqau.

³² Doo mi faasaanna Isakeena ainainira fasiqa namu nammari madika indufu qoonaki nammari paqurimmasee Isakeena qimamiqa qiqaqau. Doo maasa nammari paquriqa.

³³ Miqi qimasee qimamufanoo Isakeefa mi nammari madikanara qima afeekaikira madikee qinau. Miqi qimaseenoo nári ufakiqari Beeraseeba maqusa fee qimasee auqu ranau.

Eesaufa aanaamuru aanaaseeqara maroo ufafa.

³⁴ Isakeena faiqi indaaruqaafa mina auqu Eesaufa marinau. Mifa qaara fasiqa aiku asauku taikasee 40 aukuna maraseenoo Qeetaa maqannaa aanaaseeqara maranau. Moo anaasee auqu Yuditi nammarina Beerina araamuna maranau. Moo anaasee auqu Baseemata nammarina Eeroona aramuna maranau.

³⁵ Miqanda nári ninaakuquqara Isakeesa Reebeeka nammarisa sukaqara oosana nimufaqa nikooqanau.

27

Yakooboofa Eesauna afaaqooqa ummuaru ufafa.

¹ Isakeefa mariiufanoo doo asooqaqoofanoo afu mandaikinai. Mariiufanoo moo kari nári indaaruaa faiqi Eesauna aaroofanoo Eesaufa maqi qinai.

² Foo qimasoofanoo Isakeefa Eesauna qimaminoo qinai. Doo qinee asooqa marida, qeeqa kuqira aukwana sia qafaida, minara ani qimamiqa.

³⁻⁴ Aneenna duru feefa mareenana nandaki aandau aru maree qini didi marina mini suqa qiminaqa namseeqa ani afaaqooqa qimamaqaseeqa kuqua.

⁵⁻⁶ Isakeefa Eesauna faqa ufa qiqiisoofanoo Reebeeka nammarifa iriseenoo qafoofanoo Eesaufa nandakinai uaqarara fufanoo quanda fufanoo Yakooboona qumee kai qimaminoo qinai.

⁷ Doo maqee ani akoofa Eesauna maqi qimasee qimaminoo, anee aandau arumaree mini suqa qiminaqa qinee namasee Karaambaiqa afusaa ani afaaqooqa amisee kuqua.

⁸ Qini qimaaku doo anee qini ufa irisee qinee qianandee ia.

⁹ Anee doo fua oonu mimmi aanaaqiuqa marianakinaana afaaqa faqaana qaaraqanda mini

sainaqa qinee ani akoona aidi marina suqa saanana munu amia.

¹⁰ Munu aminano namaseenoo narí afaaqooqa amiseenoo kuquani.

¹¹ Yakooboofa iriseenoo narí anoona qimaminoo qinau. Qini qifasaafa asausi faqaafa maridanoo asausi aadaiki marifa maridanoo. Qini qifaaqa qisausi sia maridanoo umooqu kammidanoo.

¹² Abee qini qikoofa qini qifaaqa duqama qafamaseenoo iriannoo. Qiniara qikaru qidanoo fee qiannoo. Miqqa qinee rairaiqirana qeeqa qifaaqai qifaaqooqara foora mara quqaanaura.

¹³ Mina anoofa mi ufana iriseenoo qinau. Ani aqira ufa fannoo qinisaa kai mariannoo, sia anee minara iria, sandeenana oonu mimmi aanaaqi kaqi maree mini qimia.

¹⁴ Miqi qima soofanoo Yaakooboofa eedoo qimasee mara maree mini soofanoo mina anoofa maraseenoo narí afaaqi Isakeena aidira narana suqanau.

¹⁵ Reebeeka nammarifa aandau suqaseenoo Eesauna amiqira qamunna narí maaqaki quqaqoona maraseenoo Yakooboona afisu amaqaanau.

¹⁶ Afisu amaqaaseenoo mimmi aanaaqi apata qumareenoo Yakooboona afaarinni faqa asauku faqa asausi sia maruqoo afisu amaqaanau.

¹⁷ Miqi mandeenoo mi adiafaaira naranna feemu namu faqa suqaqoona amufanoo narí akoo funnai maree finau.

¹⁸ Oonureenoo narí akoona maaqi qimasee qimaminau. Qipoo doo qinee anireeqa, qufanoo

Isakeefa qinau. Qini faiqi namuqi qari anee yafee maridane qinau.

19 Yakooboofa qinau. Qinee ani indaaruuqaa faiqi Eesausa maridaqa. Doo anee aandaaura qiannana arusee suqamaree anireeqa doo anee findi finana namasee qifaaqooqa qimia.

20 Miqi qufanoo Isakeefa qinau. Oo qini qi-maaku anee naqaa fee maseenane kai kaqi paqurinee qufanoo Yakoobofa qinau. Karaambaiga ani Anutufa qini dadaa qipaqurimma qimino.

21 Isakeefa minara iriseenoo Yakoobona aaramaseenoo qinau. Anee qini daaqa adeedi ani rainaqa qinee ani auqama qafaa. Kuqaa anee Eesau fee maridane.

22 Miqi qufanoo Yakooboofa nari akoona oorinni oonu kikiqamma fufanoo Isakeefa auqama qafamaseenoo qinau. Qinee irunanoo anee ufa qianafa ani Yakooboona aunda maridanoo ani asauku auqamasee qafaunanoo Eesauna asauku maridanoo.

23-24 Yakooboofa mimmi asausi afisuqoofanoo Eesauna asaukuara foora asausi aanaaqi marufanoo Isakeefa sia irinau. Isakeefa nari afaaqooqa mina amiraramaseenoo kaifaa iramirino qinau. Anee kuqaa Eesau fee maridane. Miqi qufanoo Yakooboofa qinau. Eeoo qinee Eesausa maridaqa.

25 Miqi qufanoo Isakeefa qinau. Doo aneenna aanda mini qiminaqa namaseeqa afaaqooqa qimamaqaanaura. Yakooboofa irino aanda aina faqa uainna nammari faqa mini amufanoo nanau.

²⁶ Namaseenoo Yakooboona maaqi qimasee qimaminoo qinau. Qini qimaaku maaqoo adeedi ani reenana qini qimooqaa.

²⁷ Qufanoo Yakooboofa adeedi aaga ani reenoo nari akoona amooqee marufanoo andanda unda afaaqaindari ufanoo udirama qafamaseenoo maaqi qimasee afaaqooqa qinau. Qini qimaaku afaaqai amiqira unda fannoo Karaambaiqa afaaqooqa qimamaqaqai maqana afundara foora idanoo.

²⁸ Anutufa innaarunaindaraa qifi faramu quqasainanoo ani maqa ainoo ainoommaseenoo moomoo narana amiani.

²⁹ Moo aanaamuru marinausa ani ainainira faiqi kammambi faranoo.

Maaqanna maaqanna mariasa misa ani ani qafeeqa noorindari maqasaa kummaree faranoo.

Anee aneenna akaqaafasaa uqa firaafai kina marinnaranoo.

Ani anoona faiqi namu ani ani qafeeqa noorindari maqasaa kummaree faranoo.

Moo fannoo ani aqinafa mi ufafa nariki kai mariannoo.

Moo fannoo ani amiqi amiqimma amaqaainafa nariki faqa mariani.

Eesaufa nari akoona afaaqooqara qiaaqee qu ufafa.

³⁰ Miqi qimasee Isakeefa Yakooboona afaaqooqa qimami soofanoo Yakooboofa nari akoona maaqakiqari raudamakufanoo dindanai fufanoo doo Eesaufa dindanai uqaanoo niniuufa aniranau.

³¹ Eesaufa anireenoo adiafaa ira aandau aina suqa mareenoo narí akoofuqoo oonu reenoo qinau. Qipoo doo findi finana namasee qifaaqooqa qimia.

³² Mina akoofa qinau. Anee yafee. Miqi qufanoo mifa qinau. Qinee Eesausa indaaruuqaa faiqi maridaqa.

³³ Isakeefa minara iriseenoo boo qimasee tautu maseenoo aindiri aindiri imarufanoo qinau. Yafee moo fannoo aandau arusee mini qimifaqa, namasaunana anee aniraananoo. Qinee namaseeqa doo qeeqa taikara afaaqooqa qimamaqasaunanoo naaru naaru minaindi marianoo.

³⁴ Eesaufa mina iriseenoo firaqoo aundurairi sukaqoofanoo qinau. Oo qipoo qini faqa qifaaqooqa qimia.

³⁵ Qufanoo Isakeefa qinau. Ani akaqa fannoo qikaru qimaseenoo doo ani afaaqooqa maree fifinoo.

³⁶ Eesaufa minara irufanoo Yaakooboonara arana qoofanoo qinau. Oo mina auqu Yakoo-boofa maridanoo narí auqu mau kaimbinoo qini ainaina qaara kari qini qikaru qimasee mareenoo. Indaaru mifa qinee indaaruuqaa faiqi uriqararawsa maraani qiafanna ainaina maroofa maqee miqi kai inoo qini qifaaqooqa qirana doo maree finoo. Miqi qimaseeno Eesaufa narí akoona qimaminoo qinau. Anee afaaqooqa sia fee qini faqa qiseenanee.

³⁷ Miqi qufanoo Isakeefa qinau. Doo qinee ani uriqararafa marianifee afaaqooqa amiseeqa. Kaifa mina ainaina mina ainainira faiqi kiaqee

afaaqooqa faqa amiqa. Qinee oosana oosana narana faqa nammari faqa amiqa. Qini qimaaku, magee sia moo ainaina marinaqa ani amianauroonoo.

³⁸ Eesaufa narí akoona kafaa kafaa iki raqaidanoo iranau. Moodaa afaaqooqa marinee aminanee sia fee moo qini faqa qiminnaree.

³⁹ Isakeefa minara irinoo maaqi qimasee Eesauna qimaminau.

Sia innaarunaindaraa qifi faramu anindi marianonoo.

Sia ainoo faqaa maqa anindi mariannoo.

⁴⁰ Anee duru saamu uqeerasaidana aneenna amiqira marirana paqurinnaranoo.

Miqidana anee aneenna akaqa ainainira faiqikina mariinana rakeemmaki aaduma finnanoo.

Isakeefa Yakooboona Qaraana maqusai aqiqoo ufafa.

⁴¹ Yakooboofa Eesauna afaaqooqa maree fifufanoo Eesaufa narí akaqara akoo qaidanoo fidaqaammi marinau. Miqi marufanoo maaqi qimasee narí kai oonu mafi iriseenoo qinuu. Kaqi kaaqoo maasa qikoofa kuqu finaqa soofaara taikaseeqa mikari qeeqa qikaqa kuqamma aruanaura.

⁴² Reebeeka nammarifa mi ufana iriseenoo Yakooboona aaramaseenoo aaqu qimamaqeenoo qinuu. Iria ani afasaafa Eesaufa afaaqooqara qimammareenoo ani aruannoo.

⁴³ Qini faiqi qinee qimamianandee ia. Anee quqasee sandeenana Qaraana maqusai qini qisookifa ani anaufa Rabannafa marinnai fua.

⁴⁴ Anee ooru miqoo marinanoo ani afasaana arana qarafa asooainana qumua.

⁴⁵ Anee mina mandaikamma amaqaannanara qaunusainaqa qinee akaqausa niiqaanaqa ani ooru afiqee qumuaqa. Qinee qikoo innee-qara moodaafa kuqiranara irunanoo qaifaqa doo quqasee fua.

Isakeefa Yakooboona aiqoofanoo Rabana fun-nai ooru finau.

⁴⁶ Miqanda ninoofa Reebeeka nammarifa oonu reenoo narí afaaqi Isakeena qimaminoo qinau. Qinee maa Qeeta maqannaa anaasee qandara Eesauna anaqa qarara qikoo uqanna fidiaqaamidaga. Yakooboofa Qeeta maqannaa anaasee maaqirana moo marainaqa qinee kuquanauranoo.

28

¹ Isakeefa minara iriseenoo Yakooboona aaramaseenoo amandaidanoo qinau. Oo Yakooboo sia uqanna Kannaana maqannaa anaasee maraa.

² Doo findi finana ooru fua. Aneenna aanaakuna Beetueerana maqa maqa Meesoopootamia maqa maaqaki ooruree aneenna anauna Rabannana araamuna maraa.

³ Aiqama afeeka faqaa Anutufa ani faqa ani anaqa faqa amiqi amiqimma nimaqaseenoo moomoo faiqi nimisainana anee moomoo maqannaasa nikoofa marinnara.

⁴ Anutufa Abaraqaammanna amiqi amiqimma amaqoondee inoo ani faqa amiqi amiqimma aisainana anee aneenna marianna maqa maaqana

Anutufa Abaraqaamana amiqoonakinaa qumiasana maraa.

⁵ Miqi qimaseenoo Isakeefa Yakooboona aigoofanoo findifinoo Meesoopootamia maqa maaqai Rabanafa Beetueerana amaaku Arameea maqannaafa Reebeekaa nammarina asookifa marunnai oorufinau. Rebeekaa nammarifa Yakooboosa Eesausa ninoofa marinau.

Eesaufa anaasee moo maranau.

⁶ Isakeefa Yakooboona afaaqooqa amiseenoo Meesoopootamia maqa maaqai anaasee maraanifeera aqiqoonara Eesaufa irinau. Isakeefa afaaqooqa Yakooboona amiseenoo Kannaana maqanna anaasee sia maraannee qunara faqa irinau.

⁷ Yakooboofa nari anaukoo ufa irisee Meesoopootamia maqa maaqai funara faqa Eesaufa irinau.

⁸ Isakeefa Kannaana maqannaa aanaaseera akooqee marunara Eesaufa irinau.

⁹ Iriseenoo Isamaeerafa Abaraqaammanna amaaku marunnai oonuree mina araanuna auqu Maqarata nammarina maranau. Maqarata nammarina asookifa Neebaiotafa marinau.

Yakooboofa Beeteeree maqa maaqaki ooni qunu rumasee faiqaqee qaininuu.

¹⁰ Kaifa Yakooboofa Beeraseeba maqusaindari Qaraana maqusai firaree qimasee faiqanoo ooru fimarinau.

¹¹ Fimarufanoo eendufanoo moosaa uiqaana araseenoo faiqanau. Faiqararinoo ooni firaana marasee qunu rumasee miqoo faiqanau.

12 Faiqaqee idanoo qaina moo inau. Aana kisaaga maqasaaqari innaarunai ooru marufanoo angiroouqa mimau ooruree qumuree imariqau.

13 Karaambaiqa Yakooboona aakaarinni kik-iqinoo maridanoo maaqi qimasee qimaminau. Qinee Karaambaiqa maridaqa, ani aanaakuna Abaraqaamana Anutusa maridaqa, ani akoona Isakeena faqa Anutusa maridaqa. Qinee maa maqa maaqana anee faiqaannana ani faqa ani aiku asauku faqa nimianaura.

14 Ani aiku asauku anisaa ani aruakinausa faqa nukudara fooraa maa maqanasaa marifaranoo. Misa miqooqari kambiqamaree suani oosana qaannai finanoo aramareenoo keegee mari qaannai finanoo dinni dinni ataaqeenni finanoo miqi mambi amana kai marifaranoo. Ani faqa ani aiku asaukuaroo qiqa aiqama maqanaasa amiqimma nimaqaanaura.

15 Karaambaiqa kafaa qimaminoo qinau. Iria, qinee ani faqa maridaqa aiqamai finnannai anisaa rakisianaaura. Rakisidaqa kaifaa ani mareeqee maa maqanasaa quqaanaura. Qinee sia ani minnisaanaura, qinee qeeqa qima afeekaiki-afanna ufafa anoona kambiqainaqa quqaanaura.

16 Miqi qimsoofanoo Yakooboofa tautinoo findifinoo qinau. Karaambaiqa maaqoo maridanoo. Mifa maaqoo marinara qinee sia iridaqa.

17 Yakooboofa Anutuna ufa iriseenoo rufia rufia idanoo qinau. Maa maqa maaqafa daaquqara maqa maqaa maridanoo. Abee Anutuna maaqa mariannoo innaarunai fimaria kooqifa uqanna mariannoo.

18 Kananaana Yakooboofa findifinoo narí ooni qunu qumareenoo daaqoo auqaanifée qimasee maqasaa rakiqaseenoo Anutunaindi fee qimasee oorifa fadameena akuamaqanau.

19 Akuamaqaseenoo mi maqanara Beeteera fee qináu. (Mi auquna oosana Anutuna maaqa fee qináu.) Ooqai miqoora misa Rusa maqusa fee qimariqau.

20-21 Yakooboofa mi maqana auqu ramaseenoo Karaambaiqara qima afeekaikinoo qináu. Qinee fimarianana anee qini faqa marida qinisaa rakisidana narana faqa qamunna faqa qiminaqa qinee amiqimmaseeqa qeeqa qikoona maaqai qumu raanana anee qini Anutufa marinnaranoo.

22 Maa daaqoo auqara oonina rakiqaunnana ani naaru amooqi fandinnaqoo mariannoo. Anee aiqama ainaina qiminaqa qinee qisaukuqaraki-naana aninna amianaúra.

29

Yakooboofa Rabanana maaqai ooruranau.

1 Miqi qimaseenoo innaaru qimaseenoo Yakooboofa suani oosana qaannai mariasa, misa maqa maaqai oonu ranau.

2 Oonureenoo qafoofanoo nammari madika qusau saqanna marufanoo qaaramooki sipsipauqa mi nammari madikana afainni faiqageeufaqa misasaa rakisirausa miqoo rakisimariqau. Sipsipauqa mi madikanakinaa nammari neemariqau. Firaa ooninnoo mi madikana rafaafuqoofanoo marináu.

³ Sipsipauqa aiqama moodaa qoo aniroofaqa sipsipasaa rakisirausa mi oonina quanda quandamma agusee nammari nimisee kaifaa mi oonina quanda quandamma mafi rafaafafi mariqau.

⁴ Yakooboofa sipsipasaa rakisi marusa oonu nindafeenoo qin角度. Qini qikaqaafasaa, innee yaindaraasee maridaqee. Misa qiqau, maasa Qaraana maqusaindaraasa maridaqa.

⁵ Yakooboofa iriseenoo qin角度. Innee Naqoorana anaiqi Rabannanara iridee qufafaqaa misa qiqau. Eoo maasa minara iridaqa.

⁶ Miqi qufanoo Yakooboofa qin角度. Rabannafa amiqisaa fee maridanoo fee. Misa qiqau. Eoo amiqisaa maridanoo. Mina qafaa, doo mina araamuna Raseera nammarifa mina sipsipauqa nifiqee anidanoo.

⁷ Yakooboofa misa sipsipa oosana qafeenoo qin角度. Innee naqiffee ifaqee sipsipa suani qambaana mara quqaqaafaqee maridee. Dauni nammari nimiseeqa mara quqasaifaqa misa fida qusau neeqa nifaaqa maraaqa.

⁸ Mi maqannaasa iriseeqa qiqau. Maasa sia miqianaara. Aiqaama sipsipa maaqoo aniraifaqa ooni quanda quandamma agusee nammari nimifaranoo.

⁹ Yakooboofa misa faqa ufa qimarufanoo Raseera nammarifa nari akoona Rabanna sipsipauqa nifiqee aniranau.

¹⁰ Yakooboofa nari anoona Reebeeka nammarina asookina araamuna qafamaseenoo Rabanna sipsipa faqa qafamaseenoo findifinoo nammari

madikaki rafaafafuqoo oonina quanda quanda damma mafi quqaseenoo Raseera nammarina sipsipauqa nammari nimirau.

¹¹ Nammari nimiseenoo Raseera nammarina ooriki amooqaidanoo asirafa firaafa minaki marufanoo iki raqanau.

¹² Iki raqaseenoo Raseera nammarina qimaminoo qinai. Qinee ani akoona ati Reebeeka nammarina amaaku maridaqa. Raseera nammarifa mina ufa iriseenoo sandeenoo oonuree nari akoona qimaminai.

¹³ Rabannafa nari anauqi Yakooboona ufa iriseenoo sandeenoo oonu mafi kaqaramma qumareenoo amooqaseenoo sukudaakutamasee afigeenoo nari maaqai aninai. Miqoo oonu maridanoo Yakooboofa Rabanna aiqama ainaina kambiqoonara qimaminai.

¹⁴ Rabannafa iriseenoo maaqi qimasee qimaminoo qinai. Anee qini moodaa fidika mari-ananoo. Miqi qimasoofanoo Yakooboofa moodaa uqoona mina faqa miqoo marinai.

Yakooboofa Rabannana araamuna qara mararee qimasee mina ainaina imarinai.

¹⁵ Rabannafa maaqi qimaseenoo Yakooboona qimaminoo qinai. Kuqaa anee qini qinauqi mariananoo, sia fifau qini ainaina kai innaranoo. Maqee oosana araseeqa feefauru amiqambua-naura. Ani naqifee mandee feefauru amianau-ree.

¹⁶ Rabanna araamuna qara qaaraqanda mariqau, indaaruqaafa Reea nammarifa marinai inaaqianaafa Raseera nammarifa marinai.

¹⁷ Reea nammarifa indaarugaafa amiqira oori afiri faqaafa marinau. Raseera nammarifa mina faqa arusee kaaga amiqirafa uganna marinau.

¹⁸ Yakooboona irirafa Raseera nammarinara kai iri marufa marinau. Minara iriseenoo Yakoo-boofa Rabannana nari ainaini maruna akiqara qimaminoo qinau. Amanee qinee Raseera nammarina maraanauree. Anee eedoo qinaqa qinee mina akiqara qisauku dinni taikasee dinni ani qaara marasee ⁷ aukwana ani ainaina ianaura.

¹⁹ Qufanoo Rabannafa qimaminau. Qinee amana ani amianaura, moo oosana nimiranara qikooqaidanoo. Doo anee qini faqa maridana ainainia.

²⁰ Rabannafa miqi qimasoofanoo Yakooboofa Raseera nammarina marararee qimaseenoo qisauku dinni taikaseenoo dinni ani qaara maraseenoo ⁷ aukwana mina ainaina maisee marinau. Yakooboofa Raseera nammarinara aidi marufanoo mi aukwana namufa qaaramoo faasaanara foora aiqaranau.

²¹ Dinni taikasee dinni ani qaara marasee ⁷ aukwana taikasoofanoo Yakooboofa Rabanna qimaminoo qinau. Doo qini maanaqa qimiraree qunna aukwanafa aiqareenoo. Doo Raseera nammarina qiminaqa maraa.

²² Rabannafa eedoo qimaseenoo nari araamuna amundaida oomaqa sakasee aiqama naarofaqa ani naqau.

²³ Mi eendanaki Rabannafa nari araamuna indaarugaana Reea nammarina qumee Yakooboona maqaki quqasoofanoo Yakooboofa auna Raseera nammarifa mifoo qimaseenoo mina faqa sakasee faiqanau.

²⁴ Rabannafa miqoo qaraasa oosana mareeno narí ainainira maanaaqa moo minauqu Siripaa nammarina mareeqee narí araamuna Reea nammarina ainaina maisaanifeera aminau.

²⁵ Iaqoofanoo findifinoo Yakooboofa qafamaseenoo, boo Reea nammari fee qinau. Yakooboofa Rabanna funnai oonureenoo aqinoo qinau. Anee naqifee ifanee qini miqimma qimaqeenee. Qinee Raseera nammarina marararee qimasee ani ainaina maiseeqa. Anee nanaree qini qikaru q inanee.

²⁶ Rabannafa qinau. Maasa maaqoo qaraasa oosana sia miqinoo maridanoo. Indaarugaana naaree amundaseeqa inaaqiannaana kasooaqee inaaqianna amundaídaqa.

²⁷ Anee Reea nammarina faqa kaqi mari-nanoo mina oomaqirafa 7 faasaana mariannoo. Taikainaaqa miqoo kafa Raseera nammarina faqa amianaura. Amianana miqooqari mina akiiqara anee oosana araseenana kaifaa dinni taikasee dinni ani qaara marasee 7 aukwana qini ainaina innaranoo.

²⁸ Yakooboofa minara iriseenoo eedoo qimaseenoo Reea nammarina faqa mariufanoo qoomaqa narana taikoofanoo Rabannafa narí araamuna Raseera nammarina faqa aminau.

²⁹ Kafa Rabannafa narí ainainira maanaaqa mina auqu Biriqaa nammarina mareeqeenoo Raseera nammarina ainainianifeera aminau.

³⁰ Amufanoo Yakooboofa Raseera nammarina faqa sakasee faiqanau. Yakooboofa Raseera nammarinara aidi marufanoo Reea nammarinara sia amiqimma aidi marinau. Miqidanoo Raban-

nana ainainiranaki kafaa qisauku dinni taikasee dinni ani qaara marasee 7 aukuanaki marinau.

Yakooboona faiqi namu ufa.

³¹ Yakooboona irirafa Raseera nammarinasaa kai mundinoo marunara Reea nammarinara akoo akaa mimarinau. Miqi marunara Karaambaiga qafeenoo dadaaqufanoo Reea nammarifa amuaqu qaikinau.

³² Reea nammarifa amuaqu qaikinoo mariiufanoo faiqi akoonaiqi maqanau. Maqaseenoo qinau. Karaambaiga qiniara qimudao qinara qini qifaaqi fannoo maqee qinisaa atooqeenoo fee qianaura. Mi irirana iriseenoo mi faiqina auqu Reeubena fee qinau.

³³ Reea nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau. Qini qifaaqi qini ameesuqi marinara Karaambaiga irinoo qiniara qimudao qimaseenoo maa faiqina qiminoo. Minara mina auqu Simeeona fee qinau.

³⁴ Reea nammarifa marikinoo kafaa amuaqu qaikinoo mariiufanoo faiqi akoonaiqi moo maqaseenoo qinau. Doo maqee uqanna qini qifaaqi fannoo doo qinisaa atooqaannoo, qinee qaaramoo akoonaiqi maqaseeqa. Minara iriseeqa mi faiqina auqu Reefi nee qiqa.

³⁵ Reea nammarifa marikinoo kaifaa amuaqu qaikinoo mariiufanoo faiqi akoonaiqi moo maqanau. Maqaseenoo qinau doo maqee qinee Karaambaiga amooqidaqa, maa faiqina auqu Yuda fee qidaqa. Reea nammarifa Yudana kai maqaseenoo mi kamuqoo kisaagasaa marinau.

30

¹ Raseera nammarifa narí anasaana faiqi namu nindafeenoo Yakooboona aqinoo qinau. Anee faiqi sia qini mara qimianaqa qinee kaqi marian-abaqa kuquanauranoo.

² Yakooboofa minara irufanoo arana qoofanoo qinau. Qinee Anutusau maridau. Anutufa kai ani itita amaaidanoo.

³ Miqi qimasoofanoo Raseera nammarifa qinau. Maa qini ainaini mari manaaqafa Biriqaa nammarifa marinoo qinee mina ani amiqa. Anee mina faqa faiqeenana faiqi mara amia. Aminanoo faiqi maqasainanoo qinindi kammiannoo. Miqimasee qinee faqa faiqi anausa marianaaura. (Mi aukuanai mi maqannaasa oosana miqi marusa mariqau.)

⁴ Raseera nammarifa miqi qimasee narí ainaini maru manaaqana mina auqu Biriqaa nammarina Yakooboona amisoofanoo mina faqa sakasee faiqanau.

⁵ Miqimmasoofanoo Biriqaa nammarifa amuaqu qaikinoo mariiufanoo Yakoboona faiqi akoonaiqi maqanau.

⁶ Maqasoofanoo Raseera nammarifa qafamaseenoo qinau. Doo maqee Anutufa qini oosanara andeeqara oosana fee qimasee qini innaaru qirana iriseenoo doo akoonaiqi qiminoo. Miqi qimaseenoo Raseera nammarifa mi faiqina auqu Danna nee qinau.

⁷ Mi manaaqafa Biriqaa nammarifa marikinoo kaifaa amuaqu qaikinoo mariiufanoo akoonaiqi moo maqanau.

8 Raseera nammarifa mina qafamaseenoo qinau. Qinee qeeqa qinasaana faqa firaqoo rairai qimasee qinee uriaaqareeqee qimaseenoo mi faiqina auqu Napatari fee qinau.

9 Reea nammarifa faiqi maqarana taikaseenoo narí ainaini maru manaaqana auqu Siripaa nammarina narí afaaqi Yakooboona mara aminau.

10 Amufanoo minasaa faiqi akoonaiqi moo maqanau.

11 Reea nammarifa qafamasee qinau. Oo qini amiqimma qisainara mi faiqina auqu Kadafa nee qinau.

12 Siripaa nammarifa marikinoo kafa akoonaiqi moo Yakooboona faiqi maqanau.

13 Reea nammarifa mina faqa nariara maraseenoo qinau. Doo qinee firaqoo asasidaqa. Maqee aanaaseeuqa qiniara asasirafee qimasee duqu reefaranoo. Minara iriseenoo mi faiqina auqu Aseera fee qinau.

14 Reea nammarina amaaku Reeubeenafa sakumma neemaru kamuqoo andanda kinai nidanoo faiqi maqee maru andandana qaqama paqurinau. Mi aqamana auqu mandareeka marinau. Mina paqurimaseenoo mara mareenoo mini narí anoona Reea nammarina aminau. Raseera nammarifa mina qafamaseenoo Reea nammarina qimaminoo qinau. Amanee mandareeka qaqama akaqana qini faqa qiminnaree.

15 Miqi qufanoo Reea nammarifa narí qimaminoo qinau. Anee qini qifaaqi marasaanafa kaifaa qini qimaaku mandareeka qaqama marararee fee qidanee. Miqi qufanoo

Raseera nammarifa qinau. Ani amaaku marai mandareekana qaqama qini qiminaqa doo Yakooboona ani amiananoo ani faqa faiqaannoo.

16 Eenee marufanoo Yakooboofa ainainain-dari aniroofanoo Reea nammarifa aanai oonu afigeenoo anidanoo qimaminau. Doo qinee mandareeka qaqama Raseera nammarina amiqa. Mifa mina akiiqara maqee eendaki aniara qini faqa faiqaannee qinoo. Miqi qufanoo Yakooboofa eedoo qimasee Reea nammarina faqa sakasee faiqanau.

17 Anutufa Reeaana innaaruqirana iriseenoo dadaaqufanoo Reea nammarifa kafa amuaqu qaikinoo faiqi akoonaiqi maqanau. Moodaanna qisauku namu Yakooboonasaa maqanau.

18 Reea nammarifa maqaseenoo qinau. Qinee qeeqa ainainira maanaaqa qeeqa qifaaqi amifannanara maa faiqina Anutufa qini qiminoo. Mifa minara iriseenoo mi faiqina auqu Isakara-nee qinau.

19 Reea nammarifa marikinoo kafa amuaqu qaikinoo akoonaiqi moo maqanau. Dinni ani moodaa maraseenoo Yakooboonasaa maqanau.

20 Maqaseenoo qinau. Anutufa idaaqira ainaina kaqi qiminoo. Maqee dinni qisauku taikasee dinni ani moodaa 6 maraunannara qini qifaaqi qiniara aidiannoo. Mifa minara iriseenoo mi faiqina auqu Seburuna fee qinau.

21 Mina aanaaqianna Reea nammarifa maanaaqa maqaseenoo Dinnaa nammari fee qinau.

²² Miqooqari Anutufa Raseera nammarina innaaru qirana iriseenoo dadaaqufanoo faiqi maqarana amanaikinau.

²³ Mifa amuaquqaika mafufanoo faiqi akoonaiqi maqaseenoo qinau. Anutufa qini qisaurirana taikeenoo qini faiqi akoonaiqi qiminoo.

²⁴ Raseera nammarifa minara iriseenoo qinau. Karaambaiqa qini faiqi moo akoonaiqi qimiani. Miqi qimaseenoo mi faiqina auqu Yooseefaa nee qinau.

Yakooboofa Rabannana faqa mina ainaini marunara ufaqu ufafa.

²⁵ Raseera nammarifa Yooseefaana maqasoo kamuqoo Yakoooboofa Rabanna maaqi qimasee qimaminoo qinau. Anee amanee qini quqasainaga qeeqa maaqai fua.

²⁶ Qinee ani ainainammaasaunana qimianna anaaseesa nári faiqi namu faqa qiminaqa maree fua. Qinee amiqimmasee ani ainaina iunnanara anee minara iri mariananoo.

²⁷ Rabannafa minara iriseenoo qinau. Qini afunee fannoo aniara qima qimifaqa iriseeqa anee qini faqa marunnaqoo Anutufa qini ainaina amiqi amiqifanoo firaa qoo kambiqafinoo maridanoo.

²⁸ Qinee minara iridaqa anee aneenna feefauruara qinaqa qinee ani amianaura.

²⁹ Yakoooboofa mina iriseenoo kafaa qimaminau. Anee qini ainainirana oosana amiqimmasee irimariananoo. Qinee ani aandau ainasaa rakisi mariafananoo qini rakisirana ameemaanai marida moomoo kambiqee irairaa imariqau.

³⁰ Qinee aniafanna kari ani ainaina oodaa kai marinau. Qinee maaqoo ani maridaqa ani ainaina aiqamai auqaunanoo Anutufa dadaaqifanoo firaanaikinoo maridanoo. Qinee maqee qeeqaree qianna ainainausa maraanaura.

³¹ Miqi qima soofanoo Rabannafa irinoo nari qimaminau. Doo anee qiananoo naqiffee masee feefauru ani amianauree. Miqi qufanoo Yakoo-boofa qinau. Sia anee feefauru munnimma aina qini qimia. Qeeqa qiannana kai qimia. Qinee kaqi ani sipsipasaa rakisi marianana qini maa iriranara anee eedoo qinaqa ani sipsipasaa rakisianaura.

³² Qinee maqee ani sipsipauqa mariannai oonuree aiqama takoosa takoosira sipsipauqa faqa mimmi miqiranauga faqa sipsipa aanaaqi ruduqariranauga faqa maraanaura. Mi feerunara kai qini dididanoo.

³³ Qinee andeeqasee maraanaura anee ka-sooaqee aneenna oonu reenana qafaa. Eekara arira sipsipa qinindiki marinana eekara fee dunduqarira mimmi fee qinindiki marinana qiniara qumuara miaanoo qia.

³⁴ Rabannafa mina iriseenoo asasa mandee qinau. Eeoo maasa anee qianandeemmianaura.

³⁵ Mi faasaanna qumee kai mimmi akoona takoosa takoosa iranauqa faqa mimmi anaasee miqiranauga faqa eekarasai runduqasai irana faqa runduqarira sipsipauqa faqa moodaanaki quqaseenoo nari faiqi namuara qufaqa misasaa rakisiqau.

³⁶ Rabannafa Yakooboona maraandoo qimasee nari mimmi sipsipa mara mareenoo nari

faiqi namusaa quqasoofaqa nianai qaaramoo afuru aanai faiqee oonuraaqaa irannai munu quqasee rakisi mariqau. Maree fifufanoo Yakoo-boofa akaqa sipsipauqa mafisoosasaa kai rakisi marinau.

³⁷ Rabanna sipsipasaa maqusai rakisida maridanoo saqari amimiuqa atekaseenoo moodaa mau apata ruata aquseenoo eekara ari marutinai quandaseenoo sipsipa nammari nee maruqoo rakiqanau.

³⁸ Sipsipa mimmi nammari naidaqa miqoo ani raidaqa naafeeqaambaaqaa rimariqau. Yakoo-boofa mi saqarisa sipsipauqa difaaniki nammari neemaruqoo rakiqaqoofanoo marufaqa sipsipauqa nammari narara anireeqa mi saqarina qafaidaqa akoonauqa anaasee naafeeqaambaaqaa riaqeera rakianau.

³⁹ Mimmiuqaindi miqoo mina qafaidaqa akoonauqa anaasee naafeeqasoofaqa akarakaurira aanaaqiuqa maqaqau.

⁴⁰ Yakoo-boofa sipsipauqa nifiqeenoo akarakaurira mimmiuqa maruqoo munusaina sipsipa akoonauqa akarakaurirana qafaidaqa anaasee sipsipa naafeeqasaifaqa miqirana maqaqeera nifiqee finau. Miqi marunannoo Yakoo-boofa akarakaurira aanaaqiuqa narindiki mareeqaida aaduma quqee marufanoo moomooki marinau.

⁴¹ Nifaaqauqa faqaa sipsipa faqa mimmi faqa naafee qaambaaqaa rirara ufanoo Yakoo-boofa mi saqari asaanausa mareeqee nammari neemaruqoo rakiqeesoofaqa minakiaqa nidaqa naafeeqee mariqau.

⁴² Nimudaani aanaaqi ummooqukiqa

nusa naafeeqara rufanoo Yakooboofa sia mi saqarisa rakiqanau. Miqimmasee maru fanoo Rabananaindi amudaani aanaaqi ummooqukirafauqa kai marufanoo Yakoobooinaindi nifaaqauqa faqaasa amiqirauka kai mariqau.

⁴³ Mi oosannanannai Yakooboofa moomoo ak-inaina faqaafa marinau. Mina sipsipa mimmi moomoo uqanna mariqau. Mina ainainira fasiqauqa faqa aanaaseeuqa faqa kammeer-auqa faqa doonkiuqa faqa moomoo qumbiqauqa mariqau.

31

Yakooboofa Rabanna sia qimamirai sandoo ufafa.

¹ Yakooboofa irufaqa Rabanna faiqi namu misa Yakooboona ainaina moomoo qafamaseeqa aqidaqa qiqau. Yakooboofa maasa qikoonaindi aiqama mareeqee narinni quqeenoo. Yaindaraanee maa firaa qumiasanna mareenoo fee. Maasa qikoonaindi kai mareenoo.

² Yakooboofa mi ufana iriseenoo quanda fufanoo Rabanna oori qafuofanoo sia ooqai undee oori runinoo marufanoo qafanau.

³ Mi kamuqoo Karaambaiqa Yakooboona qimaminoo qinau. Doo findi finana aneenna akoona faqa aneenna ainaina maqai fua. Anee finaqa qinee ani faqa marianauro.

⁴ Yakooboofa mi ufana iriseenoo sipsipa rakisi marunnaindari Raseera nammarina faqa Reea

nammarina faqa naarofaqa oonu roofanoo qima nimirau.

⁵ Ooqai inni nikoona oori sia runinoo mariufa maqee oori runifaqa qafaidaqa. Sia qiniara amiqi amiqidanoo. Miqimmi marifaqa qini qikoona Anutufa qini faqa mariufa maridanoo.

⁶ Inneeqara irimariafanoo, qinee qeeqa afeekannai inni nikoona ainaini mariqiafana.

⁷ Miqi mariafanano mifa qini qikaru qimaseenoo qisauku qara 10 kari qini feefauru quandaqaandinoo. Miqi marifanoo Anutufa qifanoo sia qini mandaikamma qimaqeenoo.

⁸ Inni nikoona ainaina iafannana feefauru mina sipsipa nifaaqa takoosa takoosa irana kai mi aukuanma maqee marufaqa qinee mareeqee qeeqaindiki quqee mariqiafana. Inni nikoofa qini feefauruara nifaaqa akara kau rirausa kai maraannee qufaqa mina sipsipauqa mi aukuanmai miqi ranauqa kai maqee marufaqa mareeqee qeeqara qeeqaindiki quqee mariqiafana.

⁹ Miqimma saafananoo Anutufa inni nikoona aandau aina mareeqeenoo qinindiki kai quqaqiseenoo.

¹⁰ Mimmi sipsipa nariqa araraiki maru anaana qinee qaina qafaafananoo mimmi akoonauqa aanaaseeuqa naafeeqee marufaqa qafaqiafana. Mi akoonausa aiqama akarakau rirausa faqa nifaaqa takoosa takoosa irausa faqa anaasee naafeeqee mariqau.

¹¹ Qinee qainasaa qafaafananoo Anutuna angiroo moo fannoo qini daarofaqa qinee maqi qiqiafana.

¹² Foo qiafananoo qinau. Qafaa maa nifaaqa takoosa takoosira akoonauqa naafeeqaidaqa. Qinee Rabanafa ani mandaikamma amaqee marina qafamasee qunanoo maa ainainafa kambiqaidanoo.

¹³ Qinee ooqai Beeteera maqa maaqai ani afusaa koorooiafanna Anutusa maridaqa. Miqoo anee aaqoo auqara ooni rakiqasee oorifa fadameena minasaa adiasee qiniara qima afeekaikinau. Doo maqee indaammamaree aneenna maqusai anirandee anee kambiqoonna maqanasaa fua.

¹⁴ Raseera nammarisa Reea nammarisa qimannimi soofaqa Yakooboona ufa iriseeqa qimamiqau. Sia maasa qikoona qumiasana aina kaqi marinaqa maasa maraanaura.

¹⁵ Mifa maaqandara aanaamuruara foora midanoo. Doo mifa maaqandasaa feefauru mara mareenoo doo nariki kai taikkeenoo.

¹⁶ Anutufa maaqanda qikoona kinaana mareeqee maaqanda faqa maaqanda faiqi namu faqa nimifanoo maasaindi kamminoo maridanoo. Anutufa ani qimamindee ia.

¹⁷ Yakooboofa misa ufa iriseenoo nari akoona maqai Kannaana maqasaa firara deedaqinau. Mifa nari aanaaqmaaka faqa nari faiqi namu faqa kammeerauqa saa quqasee ooqu mari fufanoo finau.

¹⁸ Yakooboofa nari mimmi sipsipa doonki kammeera aiqama Meesoopootamia maqusai marida maroo ainainausa aiqama mareeqee oorinni quqaseenoo doo nari inaaqianna Kannaana maqa maaqai finau.

19 Rabannafa narí sipsipa asausi moosaa oonu aukirara fifufanoo Raseera nammariifa narí akoona maaqaki keeqa fufanoo narí akoona afunee ainaina maaqaki quqaqoona qumee kai mara mareenoo kukeeqa mareenoo Yakooboona faqa sia qimamirai doo mara mareenoo narí afaaqi faqa finau.

20 Yakooboofa Rabannana akaru qimasee sia qimamirai quqasee finau.

21 Yakooboofa narí ainaina namu faqa mareenoo kai kaqi ufanoo finau. Fifi ufanoo Eeufarateesa nammari taqa mareenoo dinni afainni oonu ranau. Doo miqooqari Kiriata aaqana qaannai oori ubeekamafi finau.

Rabannafa Yakooboona afaqee fu ufafa.

22 Qaarammoo faasaana aiqaroofanoo Yakooboofa sandoonara Rabanna qimamiqau.

23 Rabannafa minara iriseenoo narí aiku asauku aiqama nifiqee Yakooboona aanaaqiana afaqee finau. Dinni taikasee dinni oonu qaara marasee 7 afuru aanai fi faiqeenoo afaqee finoo oonu Yakooboona paqurinau. Kiriata aaqana moo amuaqu namusaa paqurinau.

24 Rabannafa aanai faiqaqee ufanoo mi eendanaki Anutufa qaina afunnareenoo qimaminau. Anee sia Yakooboona manda ufa amia.

25 Yakooboofa aaqanasaa narí uiqaana maqa usakaseenoo marufanoo Rabannafa narí ainaina faqa oonu reenoo mifa faqa narí uiqaana maqa Kiriata amuaqu namusaa usakanau.

26 Usakaseenoo Rabannafa oonu reenoo Yakooboona qimaminoo qinau. Naqi fee ifanee qini

qikaru qimaseenee qini qiraamuqmaaka raki-ranakiara foora rarisammaree sandeenee.

²⁷ Naqi fee ifanee sia qima qimirai qikaru qimasee qumee quqasee sandeenee. Anee qini qima qiminaqau qinee idi namu faqa asasirana namu faqa piri punna faqa dukaanaa faqa aridaqau aigani.

²⁸ Anee sia qini qima qimianaqa qeeqa qinaiqi mara faqa qeeqa qiraamuna qara faqa nimooqa saanana nifiqee aniaqaana. Anee furufarira ainaina auqaananoo.

²⁹ Qinee ani mandaikamma amaqara afeeka marifaqa marunanoo eenda eendaki ani akoona Anutufa qini rafaqaqafu seenoo qinoo. Anee sia uqanna Yakooboona mandaika mamaqaa qifaqa sia mandaikamma amaqaanauara.

³⁰ Qinee iridaqa anee aneenna akoona maqa maaqara oonu mafi iriananoo aundura dapikifana qini qisee sandaananoo. Naqaa fee ifanee qini maaqaki rakisi maria anutusa ummuara mamaree aninanee.

³¹ Yakooboofa iriseenoo qimaminoo qinau. Qinee aniara narí araamuna qara rafiqaandoo qimasee rufiasee sandeeqa.

³² Ani maaqaki rakisi maria anutusa marainana paqurimmaseenana kuqa arua. Doo qini qiku qisauku nifusaa qini ainaina moodaa moodaa mara quqaseenana aneenna ainaina paqurimmasee maraa. Yakooboofa Raseera nammarifa narí akoona Rabannana unnaqira anutusa ummuarunara sia irirai miqi qinau.

³³ Rabannafa Yakooboona uiqaana maqaki keeqa fufanoo randoosia sia paqurinau.

Miqooqari Rabannafa Reea nammarina uiqaana maqaki keeqafi randoosia. Kafaa miqooqari ainainira maanaaqaqara uiqaana maaqaki faqa keeqafi randasee sia paqurinau. Miqooqari Rabannafa Raseera nammarina uiqaana maaqaki keeqafinoo randanau.

³⁴ Raseera nammarifa Rabannana maaqasaa rakisi maru anutusa mareegeenoo kammeera saririga maaqaki quqaqoona uqeeraseenoo minaki kukeeqaseenoo minasaa ooqu faaqee marinau. Rabannafa Raseera nammarina uiqaana maqaki aiqama ainainaki randasee qafoofanoo sia marinau.

³⁵ Rabannafa randeemarufanoo Raseera nammarifa nari akoona qimaminoo qinau. Oo qipoo sia qinee findi fuanana sia qini diqia. Qinee qimaqqai qafaidaqa sia findi fidaqa. Miqi qufanoo Rabannafa aiqama ainainaki randoosia sia paqurinau.

³⁶ Sia paqurufanoo Yakoobofa amambaina qimasee aanoo qidanoo qinau. Qinee nana aaqarane maree fee. Nana sandufee rukiasaunana aranaqaifanee qiniara randamaree qumidanee.

³⁷ Anee qini ainainaki randeese doo fee aneenna ainaina paqurinee. Doo mina mareegeenana aneenna faiqi namu nifusaa faqa qini faiqi namu nifusaa faqa quqasee ufa qida qafaa, yafee andeegreenoo fee.

³⁸ Qinee moodaa fasiqa aiku asauku taikasee 20 aukwana ani ainaina imariqiafana. Mi kamuqoo ani sipsipa ani mimmi sia moo fannoo dapi maqee mariqau, amiqi kai mimariqau. Sia ani sipsipa akoona moo arusee naqiafana.

³⁹ Kaasau faini ani sipsipa arusoofaqa qinee mina amudaani apata siamma ani uqafiqee mariqiafana qeeqaindi kai moo mareeqee mina amaaqa maqeeqa anindiki quqee mariqiafana. Ummuara fasiqa eendaki fee faasaana fee ummuara masoofana anee qiniara qunaqa qinee qeeqaindi mareeqee anindiki quqee mari qiafana.

⁴⁰ Qinee moomoo kari ani ainaina imari-afananoo suani darinoo eendaki suara darinoo miqi marufaqa sia faiqee mariqiafana. Miqidaqa ani aininasaa rakisi mariqiafana.

⁴¹ Yakooboofa qimamidanoo qinau. Qinee moodaa fasiqa aiku asauku taikasee 20 aukuaana ani ainaini mariafanaua marida. Qisauku qara taikasee qikunooqu qaara faqa qaara faqa marasee 14 aukuaana ani araamuna qara mararara ani ainainiaafanaua maridaqa. Dinni taikasee dinni oonu moodaa marasee 6 aukuaana ani sipsipa mimmi mararara kaifaa ainaini qiafana. Miqi mariafanana anee qisauku qara taikasee 10 kari anee qini feefauruara qikaru maakaru qimarinau.

⁴² Abaraqaammana Anutufa qini qikoona Isakeena Anutufa sia qini dadaaqinanau anee qiniara kaqi samu fua qinaqau qinee kaqi samu fini. Anutufa qini ummaara faqa qini kadaapirirana faqa qiqaqamaseenoo eenda eendaki nari ufa irirana ani aminoo.

Yakooboosa Rabannasa moodaanakiku ufafa.

⁴³ Rabannafa Yakooboona mi ufana iriseenoo qinau. Maa ani anaaqa qara qini qiraamuna qara maridaqa maa ani faiqi namu qini qinaiqi mara

maridaqa maa ani sipsipa qinindi uqanna maridanoo, maa aiqama ainaina anee marana nuanafa aiqama ainaina maaqoo marifa qinindi kai maridanoo. Qinee sia amana qeeqa qiraamuna qara faqa qinaiqi mara faqa rafaqa fuanaura.

⁴⁴ Doo maqee ani faqa moodaanaki ufa qirara deedaqidaqa. Anindiri ooni aaku aakumasaanoo mifa maasa moodaanaki kira ufara daaqoo auqaannoo.

⁴⁵ Yakooboofa minara iriseenoo eedoo qimaseenoo ooni firaatia gumaree kuradama seenoo daaqoo auqara ooni fee qinau.

⁴⁶ Miqimmaseenoo Yakooboofa narí ainainira faiqiuqara qufaqa ooni moomoo suqusee aaku aaku iqau. Miqimmasee mi ooni aaku aaku irana aakaarinni ooqumarifi narana naqau.

⁴⁷ Namaseeqa Rabannafa mi oonisa auqureenoo Yageer Sahadutaa fee qimasee narí ufakiqari auqu ramasoofanoo Yakooboofa narí ufakiqari Gareeda fee qinau. (Mi nuquna oosana daaqoo auqara ooni fee qimasee narí ufakiqari auquraqau.)

⁴⁸ Rabannafa Yakooboona qimaminoo qinau. Maa ooni aaku aaku irafa anindiri daaqoo auqarafa mariannoo. Minara mi maqusana auqu Gareeda fee qianaura.

⁴⁹ Rabannafa kafaa maaqi qinau. Karaambaiqa fannoo maaqanda daraaniananoo mina afu fannoo maasasaa mariani. Miqi qimaseenoo mi maqusana auqureenoo Misipaa fee qinau.

⁵⁰ Rabannafa maaqi qinau. Anee qini qiraamuna qara mandaikamma nimaqeenaree moo

anaasee fee mareennaree, qinee sia minara iri-ananoo Anutufa anindirisa rakisidanoo.

⁵¹ Maaqoo qinee ooni aaku aaku maqaunanoo anindiri qara qambaana maridanoo. Maaqoo daaqoo auqara ooni rakiqarafa faqa maridanoo.

⁵² Maa ooni aaku aaku irafa faqa rakiqarafa faqa anindiri daaqoo auqarafa maridanoo. Qinee sia mina fiaaqaree ani aruanaura. Anee faqa sia mina aiaaqaree qini darua.

⁵³ Abaraqaamma Ana Nutufa faqa Naqoorana Anutufa faqa maasa qambaana andeeqa qisaanoo. Rabannafa miqi qufanoo Yakooboofa qinau. Qini qikoofa Isakeefa innaaru qimamaqee mari Anutuna auqasaa qimasee afaqaanauree qimasee qima afeekaikinau.

⁵⁴ Miqi qimaseenoo Yakooboofa aandau aruseenoo mi aaqannasaa Anutuna aandau tatufusee suqaminau. Suqa amiseenoo Yakooboofa nari aiku asauku naaramasoofaqa moodaaqoo ooqu mari fufaqa mi andauna ataraasa naqau. Namasee mi aaqannasaa faifaqau.

⁵⁵ Kananaana findifufanoo Rabannafa nari anaiqimara faqa araamuna qara faqa nimooqa namasee nimandamasee amaaqa finau.

32

Yakooboofa Eesauna oori qafarara deedaqu ufafa.

¹ Yakooboofa miqooqari findi fufanoo nari anaukoo unnai aanai fimaru fanoo Anutuna an-giroouqa aanai ani paquriqau.

² Yakooboofa nindafamaseenoo qinau. Maa maqa maaqafa Anutuna uiqaana maqusa maridanoo. Miqi qimasee mi maqusana auqureenoo Maqannaimmee qinau.

³ Yakooboofa narí faiqi namu qaaramoo ufa maree narí afasaafa Eesau funnai fuaqeera niqoofaqa Eedoomma maqa maaqai fiqau.

⁴ Miqoo qini qifasaana paqurimmasee qini maa ufana qimamiqa. Qinee Yakooboosa ani ainainira faiqi maaqi qimasee ani Eesauna qini uriqararana qimamidaqa. Qinee Rabannana faqa maridaqa anirara masaidaqa mariifaqa maqee anidaqa.

⁵ Qinee burimmakau faqa doonkiuqa faqa sip-sipa faqa mimmiuqa faqa ainainira faiqiuqa faqa faqaasa maridaqa. Qinee aniara ufa quqaidaqa qini uriqararafa qini maa ufafa ani asoamamaqaanifeera qidaqa.

⁶ Ufa mareefu fasiqausa oonu randee aniree Yakooboona maaqi qimasee qimamiqa qiqau. Doo maasa ani afasaana qimamisaunanoo mifa narí ainainira fasiqauqa maqi handareeta 400 namu faqa maasa inaaqianna anidanoo.

⁷ Yakooboofa mi ufana irufanoo aaququqoofanoo moomoo irirana maranau. Miqufanoo narí sipsipauqa faqa mimmiuqa faqa burimakauqa faqa kammeerauqa faqa qaaraki raina quqanau.

⁸ Maaqi qimasee qimirinau. Eesaufa anireenoo moo usiranaki narinaqa moo usiranakiqari amana sandeefaranoo.

⁹ Miqimmasee Yakooboofa maaqi qimasee innaaru qinau. Oo Anutu, qini qinaakuna

Abaraqaammanna Anutufa qini qikoona Isakeena Anutufa qini innaaru iria. Karaambaiqa anee qini qima qimiananoo aneenna maqa maaqai aneenna ainainiannai finaqa qinee aiqama ainaina andeeqa aisaanauranoo fee qinau.

¹⁰ Oo Anutu anee qini amiqi amiqimma qisarana faqa ani mapukira dadaaqiranara faqa irunanoo uriqaraifaqa qinee oorudupiqqa maridaqa. Qinee ooqai Yooradanna nammari qeeqa saunu kai uqirausa taqaqiafana doo maqee qinee qaaraki rainarausa faqa anidaqa.

¹¹ Qinee qeeqa qifasaana Eesauna asaukuki-naana asumu mara quqaqisaanneera innaaru qidaqa. Qinee minara rufiidaqa. Mifa anireenoo maasa faiqi anaasee faqa aiqama daru taikaandooru rufiidaqa.

¹² Anee maaqi qimasee qiniara qima afeekaikinau. Ani aiqama ainaina andeeqamma aisaanauranoo fee qinau. Ani moomoo faiqi asumu amianaqa sia amana moo fannoo asaana ruannoo, nukudara foora sia kasoo uqanna marifaranoo fee qinau.

¹³ Yakooboofa miqi qimaseenoo innaaru qimaseenoo mi eendanaki miqoo faiqeenoo iaqoofanoo nari aandau Eesauna amiraree qimasee raina quqanau.

¹⁴ Mifa mimmi anaasee 200 faqa mimmi akoona 20 faqa sipsipa anaasee 200 faqa sipsipa akoona 20 faqa raina aaduma quqanau.

¹⁵ Miqimmaseenoo kaifaa kammeera anaasee 30 faqa nari aanaaqi naamma neemarusu faqa burimakau anaasee 40 faqa akoona 10 faqa

doonki anaasee 20 faqa akoona 10 faqa raina quqanau.

¹⁶ Yakooboofa raineeqeenoo aandau oosana oosana naadu naadu kai quqaseenoo narí ainaini maru faiqisa moodaa moodaa mareeqeenoo minauqasaa rakisiaqeera quqanau. Quqaseenoo maaqi qimasee qimanniminoo qinau. Innee qini qifunni fidaqa adaaraika masaidaqa niana niana maridaqa fuaqa.

¹⁷⁻¹⁸ Miqi qimaseenoo Yakooboofa indaarufu faiqina qimaminoo qinau. Qini qifasaafa Eesaufa paquri maseenoo irainana yafee ani uriqararafa maridanoo fee yaiffee anee fidanee yana aandauqee anee maree fidanee, qinana anee maaqi qimasee narí qimamia. Maa ainausa ani ainainira faiqi Yakoobofoonaindi maridanoo. Mifa narí uriqararana Eesauna amiannee qimasee quqasaifaqa maree anidaqa. Yakooboofa narí inaaqianna anidanoo mifoo qia.

¹⁹ Yakooboofa indaarufu faiqina qimamundee kai minoo mina aanaaqiana fusa faqa miqi kaimmasee qimanniminoo. Innee Eesauna paqurimasee miqi kaimmasee qimamiaqa.

²⁰ Innee maaqi qiaqa. Eeo ani ainainira faiqi Yakooboofa inaaqianna anidanoo mifoo qiaqa. Yakooboofa narí kai oonu mafi irinoo qinau. Qinee maa ainainausa amiannanannoo mina irirana quandasanaanoo qiniara amiqi amiqiani. Qinee mina paqurimasaanoo aqbee mifa qini numooo minniqisaannoo.

²¹ Eesauna amaqqoo ainainausa indaarufu fifufanoo doo narí miqqoo mi uiqaana maqusanaki faiqanau.

Yakooboofa Peenieera maqa maaqai angiroo faqa narí qumaree narí qumaree qu ufafa.

²² Mi eenda amuqusanai Yakooboofa findi fufanoo narí anaafa qara faqa narí ainainira anaasee qanda faqa narí faiqi namu qisaukuqara taikasee qikunni ooqu moodaa marasee 11 nifiqamareenoo Yabooka nammari fitaqama-reenoo muqu afainai munu nisanau.

²³ Munusee niqamasoofaqa fufanoo narí aiqama aandauqa faqa mara quqasoofaqa misa faqa taqaqau.

²⁴ Taqa nimaqaseenoo naríara dinni afainni kaqi marinau. Marufanoo faiqi moo fannoo anireenoo aitata fufanoo Yakooboona qumaranau. Uaqeeidanoo narí rudammiqi narí rudammiqi idamarufanoo iaqarafa adeedi ranau.

²⁵ Sia mi fasiqafa Yakoboona uraaqaranau. Miqi usianoo asauku samu Yakooboona upisuna aranaiqi arinau. Miqubaqa Yakooboona upisuna arufanoo amudaani ootuparafa aikatamafufanoo raqee raqee inoo ninau.

²⁶ Iaqoofanoo mi fasiqafa Yakooboona qimaminau. Doo qini quqasainaqa fua, doo iaqarafa adeedi reenoo. Yakooboofa iriseenoo qinau. Sia ani quqaanaura. Anee qini qifaaqooqa qima qimaqasainaqa quqaanaura.

²⁷ Mi fasiqafa Yakooboona qimaminoo qinau. Ani auqu yafee. Aneenna auqu rainaqa iria. Yakooboofa qinau. Qini duqu Yakooboosa mari-daqa.

²⁸ Miqi qufanoo mi fasiqafa qinau. Maqee maaqooqari Yakooboofa taikaannoo ani auqu

Isaraeerafa marinnaranoo. Anee Anutuna faqa faiqi faqa aitatafi qumaraanannannoo uriqararafa marianaqa minara ani auqu Isaraeera fee qidaqa.

²⁹ Miqi qimasoofanoo Yakoofoofa mi fasiqana qimaminoo qinau. Aneenna auqu qimaqimia. Miq uqufanoo mi fasiqafa qinau. Nanaree anee qini duqu irirara iraidanee. Miqi qimaseenoo Yakoofoona afaqooqa qimama qaseenoo doo quqaseenoo finau.

³⁰ Mi fasiqafa fifufanoo Yakoofoofa qinau. Qinee Anutuna oori qafamaseeqa sia kuqiqa kaqi maridee qimaseenoo miqoo auqureenoo Peenieera fee qinau.

³¹ Suani afu ururoofanoo Yakoofoofa Peenieera maqa quqaseenoo upisuna aidafi marufanoo reetaa reetaa qinoo finau.

³² Miqooqari oosana arasee Isaraee maqannaasa sia aandau upisunakinaa amaqi neemariqau. Maqee faqa sia naidaqa. Anutuna angiroo fannoo Yakoofoona upisunaki arunara iridaqa sia naidaqa.

33

Yakoofoofa Eesauna paqurinau.

¹ Yakoofoofa qafoofanoo Eesaufa 400 fasiqa faqa aninau. Yakoofoofa mina qafamaseenoo nari faiqi namu rainasee Reea nammarina faqa Raseera nammarina faqa ainainira anaasee qaaraqanda faqa niminau.

² Nimiseenoo indaaru nari ainainira anaasee qara faqa nari faiqi namu faqa niqoofofa fiqau. Misa ninaaqianna Reea nammarifa nari faiqi

namu faqa finau. Inaaqianna uqanna Raseera nammarifa narí faiqi Yooseefaana faqa finau.

³ Yakooboofa misa noorinni indaarau finau. Oonu reenoo dinni taikasee dinni oonu qaara marasee kari maqasaa mapaminoo fifiufanoo narí afasaafa maruqoo oonuranau.

⁴ Eesaufa Yakooboona oori qafamaseenoo sandammamareenoo ani kaqaramma qumaraseenoo amooqananau. Miqanda aiqama qara qiki raqaqau.

⁵ Qiki raqaseenoo Eesaufa quanda fufanoo Yakooboona faiqi anaasee nindafamaseenoo qinai. Maa ani faqa aniasa yausee maridee. Qufanoo Yakooboofa qinai. Oo uriqararafa maa faiqi anaaseesannoo Anutufa qini amiqi amiqimma qimaqeenoo.

⁶ Miqi qimarufanoo Yakooboona ainainira aanaaseeqara nári faiqi namu faqa Eesauna oorisaani ninuka tuqu naumoo amisee reen-deeniqau.

⁷ Miqanda ninaaqianna Reea nammarifa narí faiqi namu faqa anireenoo miqinai. Mina aanaaqianna uqanna Raseera nammarifa narí faiqi Yooseefaana faqa anireenoo miqikai inai.

⁸ Miqima soofanoo Eesaufa Yakooboona maaqi qimasee qimaminai. Faasai qafaunna aandausa oosana naqaa fee inoo maridano fee qufanoo Yakooboofa qinai. Ani aqoondikiraree qimasee kaqi ani amidaqa.

⁹ Miqi qufanoo Eesaufa narí qimaminoo qinai. Qinindi moomoo maridanoo aneenaindi anenna kai maraa.

¹⁰ Miqi qufanoo Yakooboofa qinau. Qinee ani aqoondikiqa amunna ainainausa kaqi maraa. Anee qini kaaqa aqoondi kiannanara qinee ani oori Anutuna ooriara foora qafaidaqa.

¹¹ Qinee ani amiraree qimasee maree anunna ainainausa maraa. Anutufa qini amiqi amiqimma qiseenoo qini didimari aiqama ainainausa qiminoo. Yakooboofa maraanifeera afeekaiki marufanoo Eesaufa maranau.

¹² Eesaufa Yakooboona qimaminau. Doo uqeeraina anindiri fua qinee ani oorinni fuanana anee qini qinaaqianna ania.

¹³ Qufanoo Yakooboofa qinau. Oo qini uriqararafa anee iria, qini faiqi namu ummooqukiqa mariafaqa qinee sipsipa faqa misa aanaaqiuqara faqa iridaqa. Misa moodaa faasaana rarisqa fimarianaqa aiqama aandauga kuqifaranoo.

¹⁴ Anee indaaruu finaqa qinee ani afaqee ka-sooaqee qeeqa aandauga faqa faiqi namu faqa fifinaqa Eedoomma maqa maaqaki ani paquri-auranoo.

¹⁵ Miqi qufanoo Eesaufa qinau. Doo amana qini faiqi namu akaqausa ani dadaaqi fifaranoo. Qufanoo Yakooboofa qaoo qinoo qinau. Qinee ani aqoondikunnanara minara kai firaa ainainee qidaqa. Doo amana qeeqa kai fuanauranoo.

¹⁶ Eesaufa mi ufana iriseenoo doo mi faasaanna kai anirandee nari maqa maaqai Eedoomma maqa maaqai finau.

¹⁷ Miqufanoo Yakooboofa Sukoota maqa maaqai oonureenoo nari maqa faqa nari

aandau auqaana faqa usakanau. Minara mi maqusana auqureenoo Sukoota fee qinau.

¹⁸ Yakooboofa Meesoopootamia maqa maaqaindari oonurandee amiqimmaseenoo Kannaana maqa maaqai Seekeemma maqusaki anireenoo nari uiqaana maqa mi maqusana adeedi usakanau.

¹⁹ Usakaseenoo Yakooboofa mi maqana Amoorana Seekeemana akoona aiku asauku unnai wan handareeta 100 siruaa munnimmannoo feefaurinau.

²⁰ Feefauru maseenoo tatufirana sugara qainda auquseenoo mi kaqikaa maqusana auqureenoo Eeraa fee qinau. Mi auquna oosana Isaraee maqannaasa Anutu fee qinau.

34

Seekeemmafa Dinnaa nammarina mandaikamma amaqanau.

¹ Moo kari Dinnaa nammarifa Yakooboosa Reea nammarisa niraamuna fannoo Dinnaa nammarifa Kanna maqannaa aanaaseeuqa nindafaanee qimaseenoo finau.

² Seekeemmafa Amoorana amaaku Qifina aiku asaukukinaafa mi maqa maaqanakinaasa uriqararafa Dinnaa nammarina aanai paqurimaseenoo rarianau.

³ Mifa qafoofoo Dinnaa nammarifa kaqa amiqirafa marufanoo amuqusa mandaikufanoo amiqira ufannoo mi manaaqana amuqusa reen-deenianee qimasee amiqira ufauqa qinau.

4 Seekeemafa narí akoona Qamoorana qimaminau. Anee maa manaqana feefaurumma qiminaqa qinaaqara maraa.

5 Yakooboofa narí araamuna Dinnaa nammarina rarisoona iriseeno kasoo inoo marinau. Narí faiqi namu narí aandausaa rakisi marusa nianai marufanoo nifeesi marinau.

6 Seekeemana akoofa Ammoorafa Yakooboona faqa ufa qirara finau.

7 Oonuroofaqa kai Yakooboona faiqi namu aandausaa rakiusa aniraqau. Misa Dinnaa nammarina rarisoona irufanoo sia faiqi auqaqaa ira ainaina marufaqa kaaqa niranaqeenoo nifai sandurinau. Seekeemafa Yakooboona araamuna rarisoonannoo Isaraee maqannaasa nuqu mara maree quminau.

8 Qamoorafa maaqi qimasee Yakooboona qimaminau. Qini qimaaku Seekeemana irirafa ani araamunara firaaqoo aqufifaqa ani qimamidaqa. Amanee mina maraannoo fee.

9 Sainaqa maasa moodaanaki kira ufa qimasaanaqa kaqi ani maqanna faqa qini maqanna faqa kaqi narí maree narí maree iaqa.

10 Miqi mandaanaqa innee maa maqanasaa maridaqa kaqi dapi maa maqa maqanaki oonuree aniree idaqa maqa akausa mariaqa.

11 Seekeemafa Dinnaa nammarina akoona faqa asooqmaaka faqa qimannimino qinau. Innee qini didi marindee masaifaqa inni nidi mari ainaina nimianaura.

12 Inni nidi mari ainainnara qimaqimifaqa nimianaura. Fira feefauruara qifaqa nimianaura. Innee qiniara mina maraannee qimasee innee iraifandinna ainainna kai nimianaura.

13 Miqi qimasoofaqa Yakooboona faiqi namu nári nisookina rarisoona iriseeqa akaru qira ufa Seekeemmana faqa mina akoona Amoorana faqa qimannimiqau.

14 Maaqi qimasee qimamiqau. Maasa sia amana qeeqa dauna nifaqa ati sia aukiraua nimiana. Miqiqa maasa firaqoo qisauru-anoora.

15 Innee maasa daanna reeqa inneeqa faiqi namu nifaqa ati aukusaifaqa minara kai maasa eedoo qianaurano.

16 Miqimmasaifaqa maasa inniara eedoo qimasee inni faqa narí maree narí maree ifarano. Maasa inni qambaana maridaqa inni faqa moodaa maqanna marianaurano.

17 Innee sia mi ufanara eedoo qimasee nifaqa ati atekaifaqa maasa qeeqa dauna afaqamaree doo fuanaura.

18 Mi ufausara Qamoorafa faqa mina amaaku Seekeemmana faqa iriseeqa amanee qiqau.

19 Seekeemmana kai kaqi uqanna inoo misa qimamundee inau. Mifa Yakooboona araamunara aidi marunara miqinau. Seekeemmana narí aiku asaukukiqari kaaqa uriqararafa marinau.

20 Amoorafa narí amaaku Seekeemmasandiri ufa suqimaru maqusanasaa faandaaura kooqiki oonuree nári maqusanaki marusa maaqi qimasee qimanniminau.

21 Maa fasiqausa aqoondiuga maridaqa. Saifaqa maa maqanasaa maridaqa mana mana iqa nuaqa. Maa maqafa firaafa maridano. Misa faqa amana marifaranoo. Maasa misa niraamuqmaaka maraanaqa misa faqa

maasaindi mareefaranoo.

²² Maa fasiqausa maasa qambaana marirara eedoo qidaqa moodaa mariranaki mariranara eedoo qidaqa. Maasa misa naanna reeqa qeeqa faiqi namu akoonaiquqa nifaaqa ati ateekaaqeera qidaqa.

²³ Maasa miqianaqa misaki sipsipa burimakau aina marifa maasaindi kammiannoo. Anifaqa eedoo qianaqa maasa qambaana mariaqa.

²⁴ Aiqaama mi maqusanakinaasa Qamoorana faqa Seekeemmana faqa ufa iriseeqa eedoo qimasee aiqama akoonaiqi qisakoosa nifaaqa ati auku aqiqau.

²⁵ Qaarammoo faasaana aiqaroo faqa nifaaqa ati aukuqoosa firaaqoo nammuana nidafi maru-faqa Yakooboona amaaku qara Simeeoonafa faqa Reefifa faqa miqanda Dinnaa nammarina asooki qanda nári faaqaana qara mara maree umee kai Seekeemma maqusai ooru reeqara aiqama faiqi kumaaraa naru taikaqau.

²⁶ Qamoorana faqa Seekeemmana faqa narusee Dinnaa nammarina Seekeemmana maaqakinaana afiqamaree doo quqasee fiqau.

²⁷ Narusoofaqa Yakooboona faiqi namu akaqausa inaaqianna oonu reeqa nári nisookina rarisoona akiiqara mi maqusanakina aiqama ainaina maraqau.

²⁸ Misa sipsipauqa faqa burimmakauqa faqa doonkiuqa faqa aiqama ainaina mi maqusanaki maruna faqa mi maqusana atiqara maru ainainausa aiqama maraqau.

²⁹ Misa aiqama amiqira ainaina kai maraqau. Aiqaama faiqi anaasee faqa maraqau. Aiqaama

maaḡakinaa ainainauḡa faḡa maree fiḡau.

³⁰ Yakooboofa miḡunara irinoo Simeeonna faḡa Reefina faḡa maaḡi ḡimasee ḡimanniminou. Inneeḡara ḡini ummaaraki ḡuḡaḡisaafanoo. Kannaa maḡannaasa faḡa Peerisaa maḡannaasa faḡa aiḡama maa maḡa maaḡanaki mariasa ḡiniara fidiḡaammifaranoo. ḡini faiḡi sia moomoo mariafaḡa, misa aiḡama moodaanaki aniree ḡini dariḡa aiḡama maasa faiḡi anaasee kuridi nimaḡeefaranoo.

³¹ Yakooboofa miḡi ḡufaḡa miḡanda narí ḡi-mamiḡa ḡiḡau. Maasa sia ḡeeḡa ḡisookina ḡuḡaḡaanaḡa aanasaa aanaaseera foora kaḡi maraḡa nifaranoo.

35

Anutufa Beeteera maḡusaki Yakooboona amiḡira afaaḡooḡa aminou.

¹ Mi fasannai Anutufa Yakooboona ḡimaminoo ḡinau. Anee doo findi finana Beeteera maḡa maaḡaki oonu maria. Anee aneenna afasaana Eesaunara rufiasee sandoonaḡa ani afusaa kooroo iafanna Anutusa tatufirana suḡaḡimira ḡainda miḡoo oonuree auḡa.

² Yakooboofa iriseenoo narí aiku asauku faḡa narí faḡa marusa faḡa ḡimanniminoo ḡinau. Moo maḡannaasa unnaḡira anutusa uaḡeeianauḡa mara aquaḡa. Mara aḡuseḡa inneeḡa nifaaḡa anukamasee amiḡira ḡamunna afisuaḡa.

³ Maasa maaḡooḡari ḡuḡasee Beeteera maḡa maaḡai oonureḡa ḡini ummaara aukuana

dadaaqi mari Anutuna qinee aiqama atinai nunanoo qini faqa mari Anutuna tatufirana suqara qainda auquanauranoo.

⁴ Miqi qimasoo faqa misa aiqamausa iriseeqa nariqa moosaaqaraa unnaqira anutusa maraqa nuna faqa naaqooki quqee maru fidinaanuna faqa Yakooboona amufanoo umareenoo Seekeemma maqusaki arookasa aaqa maqa indufusee minaki akundanau.

⁵ Akundamaseenoo Yakooboofa faqa nari faiqi namu faqa doo quqasee fufanoo firaa rufiarafa mi saqanna maru maqusausaki maru fasiqausa rafaqaqafufaqa sia nifaqasee nariqau.

⁶ Yakooboofa aiqama nari faiqi namu faqa fifufanoo Rusa maqusa ki Kannaana maqa maaqaki oonuranau. Maqee mi maqusana auqu Beeteera fee qidaqa.

⁷ Mifa miqoo oonureenoo tatufirana suqara ooni qainda auquseenoo mi maqusanaki Anutufa uainaina afaafau reenoo Beeteera fee qinau. Yakooboofa ooqai nari afasaanara rufiasee sandeenoo miqoo aniroofanoo Anutufa miqoo mina afusaa koorouqoo marunara auqureenoo Beeteera fee qinau.

⁸ Miqi qimasee miqoo marufanoo Reebeeka nammarina ainainira maanaqa Deebooraa nammarifa kuqufufaqa arookasa ameemaanai suani afu ataaqee qaannai Beeteera maqusa dinni atinai akundaqau. Akundamasee mi maqusana auqureenoo ikiraqara saqari fee qiqau.

⁹ Yakooboofa Meesoopootamia maqa maaqaindari oonu randee ani marufanoo

Anutufa kaifaa mina afunni kooroommafufanoo amiqira afaaqooqa qimamaqanau.

¹⁰ Miqimmaseenoo Anutufa qimaminau. Ani auqu Yakooboofa maridanoo, maqee maqooqari oosana arasee Isaraeerafa marinnaranoo. Miqi qimaseenoo Anutufa mina auqureenoo Isaraeeranee qinau.

¹¹ Miqi qimaseenoo Anutufa kafaa Yakooboona maqi qimasee qimaminau. Qinee aiqama afeeka faqaa Anutusa maridaqa qimamidaqa. Anee moomoo faiqi faqaafa maria. Akaqa maqannaasa ani aiku asaukukiqari marifaranoo. Anee karaambaiqauqa ninaakufa marinnaranoo.

¹² Qinee Abaraqaammaana faqa Isakeena faqa nimiafanna maqa maqana ani faqa ani aiku asauku kasooqaqee kambiqainausa faqa nimi-anaura.

¹³ Anutufa miqi qimaseenoo Yakooboona qimamiseenoo doo quqaseenoo finau.

¹⁴ Yakooboofa mi maqusana Anutufa qimamuqoo miqoo ooni marasee daaqoo auqaaniffee qimaseenoo rakiqaseenoo uainna nammari qumareenoo mi oonina adia amaqaseenoo oorifa fadameena faqa adianau.

¹⁵ Miqimasee mi maqusana auqu Beeteera fee qinau.

Raseera nammarifa eeraqanu ufafa.

¹⁶ Yakooboofa nari faiqi namu faqa Beeteera maqusa quqasee Eefarataa maqusai fuanee qimasee aanai fimarufanoo Raseera nammarina faiqi maqarafa arinau. Arufanoo firaqoo uqanna aupuranau.

17 Raseera nammarina aidafrifa kaaqa mandaika uqanna ufanoo mina dadaaqa maru aanaaseefa qinau. Raseera sia rufiaa, moo akoonaiqi maqaananoo.

18 Maqaseenoo Raseera nammarifa doo kuqiraridanoo aanna taikee marufanoo mi faiqina auqureenoo Beenooni fee qinau. Mina akoofa auqu reenoo Beensaminna fee qinau.

19 Raseera nammarifa kuqufufaqa Eefarataa magusai fimaru aannana afainni akundaqau. Maqee miqoo Eefarataa maqusara Beeteeree-qemma maqusa fee qidaqa.

20 Yakooboofa aqoo auqaanifeera ooni miqoo rakiqanau. Maqee kaqi mi oonifa Raseera nammarina madika mariuqoo maridanoo mi madikana kooroidanoo.

21 Miqooqari Isaraeerafa findifinoo moo maqa maaqai Eedeera kisaaqa ooni maaqa usakaqoona dinni atinni narí uiqaana maaqa usakanau.

Yakooboona faiqi namu nuqu.

(1 Stori 2:1-2)

22 Isaraeerafa mi maqa maaqanaki marufanoo Reeubeennafa narí akoona anaaga Biriqaa nammarina narí ainainira maanaqa maraqaona sakasee faiqanau. Isaraeerafa mi ufana irufanoo arana qanaü.

Isaraeerana faiqi namu qisauku qara taikasee qikunni ooqu qaara marasee 12 mariqau.

23 Reea nammarina faiqi namu maaqimmiga mariqau. Reeubeennafa indaaruqaafa Yakooboona ooqa faiqi marinau. Mina aanaaqianaafa

Simeeonafa faqa Reefifa faqa Yudafa faqa Isakaarafa faqa Seeburunafa faqa mariqau.

²⁴ Raseera nammarina faiqi namu Yooseefaasa Beensaminnasa mariqau.

²⁵ Raseera nammarina ainainira maanaaqa Biriqaa nammarina faiqi namu Dannaafa faqa Napatarifa faqa mariqau.

²⁶ Reea nammarina ainainira maanaaqa Siripaa nammarina faiqi namu Kadafa faqa Aseerafa faqa mariqau. Mi faiqi namusa aiqama Meesopotamia maqa maaqai kambiqaqau.

Isakeefa kuqu ufafa.

²⁷ Yakooboofa nari akoofa Isakeefa unnai finau, Mamareena maqusaki Qeeboorona maqusa aaqa Abaraqaammafa faqa Isakeefa faqa mariuqoo finau.

²⁸ Isakeefa 180 aukuana maranau.

²⁹ Maraseenoo kuqufufaqa mina faiqi qara Eesausa Yakooboosa akundaqau.

36

Eesauna aiku asauku nuqu.

(1 Stori 1:34-37)

¹ Eesauna aiku asauku marusa maaqimmiga mariqau. Mina moo auqa Eedoomma fee qimariqau.

² Eesaufa Kannaana maqannaa aanaaseeuqa maranau. Indaaruu maroo anaaseena auqu Adaa nammarifa marinau. Mifa Qeeta maqannaa fasiqa Eeroona araamuna maranau. Mina

aanaaqiana maroo anaaseena auqu Ooqooribammaa nammarifa maranau. Mifa Qifita maqanna faşiqa Sibeeoona amaaku Annaana nama-rina araamuna maranau.

³ Mina aanaaqianna maroo anaaseena auqu Baseemata nammarifa marinau. Mifa Isamaeerana araamuna Neebaiootana asookifa marinau.

⁴ Eesauna indaaruuqaa anaasee Adaa nammarifa faiqi Eerifasana maqanau. Moo anaasee Baseemata nammarifa Reeueerana maqanau.

⁵ Moo anaasee auqu Ooqooribammaa nammarifa Yeeusana faqa Yaramana faqa Kooraana faqa maqanau. Eesauna mi faiqi namusa miqim-masee Kannaana maqasaa kambiaqau.

⁶ Eesaufa nari aanaaqmaaka faqa nari faiqi namu faqa nari araamuqmaaka faqa aiqama mina maaqaki mariusa faqa aiqama nari aandauqa faqa aiqama nari qumiasana Kannaana maqusai maridanoo maraqoona aiqama mara mareenoo Yakooboofa maruqoo qari nianasaa moo maqa maaqai finau.

⁷ Eesaufa faqa Yakooboofa faqa maru maqafa sia amana misa dadaaqiaqaa qufaqa Eesaufa quqasee moosaa finau. Misa kaaqa moomoo aandau ainaina marufaqa minara sia amana moodaanaki mariqau.

⁸ Eesaufa Eedoomma maqa maaqakina amuaqu namusaa marinau.

⁹ Eesauna aiku asauku maaqimmiqa mariqau. Misa Eedoomma maqannaasa ninaakusa marinau.

¹⁰⁻¹³ Eesauna anaqa Adaa nammarina amaaku moodaa Eerifasafa marinau.

Eerifasafa moodaannai qisauku faiqi maqanau. Teemmanafa faqa Oommarafa faqa Seefoofa faqa Katammafa faqa Keenasafa faqa mariqau. Moo anaasee Timinaa nammarinasaa moodaa akoonaiqi Amareekana maqanau. Eesauna moo anaasee Baseemata nammarifa akoonaiqi moodaa Reeueerana maqanau. Reeueerafa qaara faqa qaara faqa faiqi akoonaiqi maqanau. Naqatana faqa Seeraana faqa Sammaana faqa Misaana faqa maqanau.

¹⁴ Eesauna moo anaasee Ooqooribammaa nammarifa Anaana araamuna marinau. Anaafa Sibeeona amaaku marinau. Mi anaaseefa faiqi qaaramoo maqanau. Yeeusana faqa Yarammana faqa Koorana faqa maqanau.

¹⁵⁻¹⁶ Miqimmasee Eesaunakiqari aruaki kambiqarusa mariqau. Eesauna ooqa faiqi Eerifasafa maa maqannaasa ninaakufa marinau. Teemanaa maqannaasa faqa Oomaraa maqannaasa faqa Seefoo maqannaasa faqa Keenasaa maqannaasa faqa Kooraa maqannaasa faqa Katamaa maqannaasa faqa Amareeka maqannaasa faqa ninaakufa marinau. Misa aiqamausa Eesauna anaaqa Adaa nammarinakiqari kambiqarusa mariqau.

¹⁷ Eesauna amaaku Reeueerafa maaqimmasee maqannaasa ninaakufa marinau. Naqataa maqannaasa faqa Seeraa maqannaasa faqa Sammaa maqannaasa faqa Misaa maqannaasa faqa ninaakufa marinau. Aiqama misauqa Eesauna anaaqa Baseemata nammarinasaaqari kambiqarusa mariqau.

¹⁸ Kaifaa maa maqannaasa Eesauna anaaqa

Ooqooribamma nammarina araa muna Annaa nammarinasaaqari kambiqaqau. Yeeusa maqannaasa faqa Yaramma maqannaasa faqa Kooraa maqannaasa faqa mariqau.

¹⁹ Aiqama mi maqannaasa Eesaunakiqari kambiqaqau mariqau.

Seeirana aiku asauku nuqu.

(1 Stori 1:38-42)

²⁰⁻²¹ Eedoomma maqannaasa miqoo maridaqa rainasee qaara maqannaasaikammiga mariqau. Misa ninaakufa Seirafa Qoora maqannaafa marufaqa minasaa aruaki maaqimmasee kambiqaqau. Rootanafa faqa Soobarafa faqa Sibeeoonafa faqa Annaafa faqa Disoonafa faqa Eeseerafa faqa Disanafa faqa minamusa Eedoomma maqannaasa ninaakusa mariqau.

²² Rootanafa Qoorina oosana faqa Qeemmana oosana faqa ninaakufa marinau. (Rootanana auna Timinaa nammarifa marianau.)

²³ Soobarafa Arafana oosana faqa Manaqatana oosana faqa Eebarana oosana faqa Seefoona oosana faqa Oonamana oosana faqa ninaakufa mariqau.

²⁴ Sibeeoonnafa akoonaiqi qaaraqanda maqanau. Miqanda nuqu Aiaafa faqa Anaafa faqa mariqau. (Anaafa nari akoonana Sibeeoonana doonkiuqa mareenoo andanda naaqeera kaasau maqa maaqaki munusoofaqa neemarufanoo rakisidanoo ida qeemaru nammarifa maqakiqari ururee maruna paqurinau.)

²⁵⁻²⁶ Anaafa Disoona faqa mina auna Ooqooriba nammarina faqa nikoofa marinau.

Disoonafa Qeemadana oosana faqa Eesabana oosana faqa Itarana oosana faqa Keerana oosana faqa ninaakufa marinau.

²⁷ Eeseerafa Biriqana oosana faqa Saafana oosana faqa Akana oosana faqa ninaakufa marinau.

²⁸ Disanafa Usana oosana faqa Arana oosana faqa ninaakufa marinau.

²⁹⁻³⁰ Maaqimmasee Qooranasaaqari kambiqoo maqannaasa Eedoomma maqa maaqaki mariqau. Rootanana maqannaa faqa Soobara maqannaa faqa Sibeeoona maqannaa faqa Annaa maqannaa faqa Disoona maqannaa faqa Eeseera maqannaa faqa Disana maqannaa faqa mariqau.

Eedooma maqannaa karaambaiqa nuqu.

(1 Stori 1:43-54)

³¹ Isaraee maqannaa karaambaiqa sia maru kamuqoo maa fasiqausa Eedoomma maqa maaqaki karaambaiqauqa mariqau.

³² Eedoomma maqannaasa indaaruu rakisi ni-maqoo karaambaiqana auqu Beerafa marinau. Beeorana amaaku marinau. Mifa Dinabaa maqusanaasa karaambaiqa marinau.

³³ Beerafa kuqufanoo Seeraana amaaku Yoobabafa karaambaiqa marinau. Mifa Boosaraa maqusanaafa marinau.

³⁴ Yoobabafa kuqufanoo Qusamafa Teemana maqa maaqakinaafa karaambaiqaikinau.

³⁵ Qusamafa kuqufufanoo Beedadana amaaku Adadafa karaambaiqaikinau. Mifa Midianna

maqannaasa Mooaba maqa maaqaki naru ni-faqaaga maseenoo Adadafa Aftaa maqusaki karaambaiqa marinau.

³⁶ Adadafa kuqufufanoo Samarafa karaambaiqaikinau. Mifa Masareekaa maqusakinaafa marinau.

³⁷ Samarafa kuqufufanoo Saurafa Reeqooboota maqusakiqari Eeufarateesa nammari adeedi marufa karaambaiqaikinau.

³⁸ Saurafa kuqufufanoo miqooqari Akaboonana amaaku Baaraqanafa karaambaiqa marinau.

³⁹ Baaraqanafa kuqufufanoo Qadarafa karaambaiqaikinau. Mifa Pau maqusanaasa karaambaiqa marinau. Mina anaaga auqu Meeqeetabeera nammarifa Maatareeda nammarina araamuna marinau. Maatareeda nammarifa Meesaqabana anaiqi marinau.

⁴⁰⁻⁴³ Eesaufa Eedoomma maqa maaqakina maru maqusausa kinaasa ninaakufa marinau. Timina maqannaasa faqa Arafaa maqannaasa faqa Yeeteeta maqannaasa faqa Ooqooribammaa maqannaasa faqa Eeraa maqannaasa faqa Pinoona maqannaasa faqa Keenasa maqannaasa faqa Teemana maqannaasa faqa Mibasara maqannaasa faqa Makadieera maqannaasa faqa Iramma maqannaasa faqa ninaakufa mariqau. Misa maru maqusausa nariqa ninaakusa nuqu nifaafau ramaqoofaqa marinau.

37

Yoosefaana faqa mina afasausamara faqa ufa.

¹ Yakooboofa narí akoofa Isakeefa mariu maqa maaqana Kannaana maqa maaqaki miqoo kai marinau.

² Maa ufafa Yakooboona faiqi namu ufa maridanoo. Yooseefaafa kumaaraa maridanoo qisauku qara taikasee qiku dinni taikasee dinni oonu qaara marasee 17 aukwana faqaafa maridanoo narí afasausa faqa sipsipauqasaa faqa mimmiuqasaa faqa rakisimarinau. Narí akoona ainainira anaasee qara Biriqaa nammarisa Siripaa nammarisa faiqi namu faqa nidanoo rakisi marinau. Mina afasausamara manda oosana auqoonara narí akoona qimami marinau.

³ Yakooboofa aiqama narí faiqi namuara aidi-maruna uraaqaramaseenoo Yooseefaanara aidi marinau. Mifa asooqa namuki maqoonara kaqa minara aidi marinau. Mifa kisaaga qamunna kisaaga asauku faqaana auqu aminau.

⁴ Mina afasausamara qafoofanoo misa nikoofa Yooseefaanara aidi marufa uriqaranoo marufaqa misa firaaqoo uqanna naundura mandaiki marufaqa mina faqa ufa qimariqau.

⁵ Moo eendaki Yooseefaafa qainammaseenoo qafanau. Minara narí afasausa mara qimannimufaqa firaaqoo uqanna fidiagaamma amaqaqau.

⁶ Yooseefaafa maaqi qimasee narí afasausamara qimanniminau. Qini maa qainnana iriaqa.

⁷ Maasa aiqamausa qafuqaki maridaqa raisa fooqaairana atEEKasee rumbasee narisaa narisaa mundiqaunanoo innindi fannoo maqasaa aqufifanoo qinindi fannoo andeeqasee kikiqinoo

mariinoo. Innindi fannoo qinindi oosanaki aqufi-fanoo fiqumma datimmafinoo ammuqu namu rambaqaki oosanai quminoo.

⁸ Miqi qimasoofaqa mina afasausamara aqiqa qiqau. Kasooaqee anee karaambaiqaika mafi maasa rakisiqimaqeenaree. Miqi qimaseeqa mifa qainunara faqa misara qunara faqa iriseeqa firaaqoo fidiqaamma amaqaqau.

⁹ Moo kari mifa kafaa qaina maseenoo nari afasausamara qima nimirau. Innee iriaqa qinee qaina moommiqa. Qinee qafaunanoo suani faqa uqoona faqa qisaukuqara taikasee qikunni ooqu moodaa marasee 11 fasau namu faqa qini daumooki aniree ninuka tuqu naumoo amisee mariafaqa niqafeeqa.

¹⁰ Mifa nari akoona faqa mi qainufana qimamufanoo mina akoofa aqinoo qinuu. Naqaa ira qaina fee inanee. Anee aneenna anoonara faqa aneenna afasausa marara faqa qiniara faqa ani aramandunnai ninuka tuqu naumoo amisee mariaqee fee qidanee.

¹¹ Yooseefaana afasausa mara nari nikaqara nira qeemarinuu. Miqi marufanoo mina akoofa aiqama ufara kaqi kai irimarinuu.

Yooseefaana Midianna maqannaasa nimisee feefauru maroo ufafa.

¹² Moo kari Yooseefaana afasausa mara nari nikoona sipsipa mara maree Seekeemma maqusai karasa naaqeera nifiqee fiqau.

13 Oonu marufanoo Yakooboofa Yooseefaana qimaminoo qinau. Ani afasausa mara Seekeemma maqusai mariannai fua. Miqi qufanoo Yooseefaafa qinau. Qinee firara deedaqidaqa.

14 Mina akoofa maaqi qimasee qimaminau. Anee oonureenana qafaa. Ani afasausa mara kaqi fee maridafee. Aandauqa faqa amiqiqa fee maridee. Nindafamasee anireenana qimaqimia. Mina akoofa Heeboorona noopundukiqari aiqoofanoo finau. Yooseefaafa doo findifufanoo fifiufanoo Seekeemma maqusai oonuranau.

15 Oonureenoo narí afasausa mararara randanoo nidanoo oonuree aniree inoo nufanoo faiqi moo fannoo qafamasee mina iramirinoo qinau. Anee nanaree randaidanee.

16 Miqi qufanoo Yooseefaafa qinau. Qinee qeeqa qifasausa mara sipsipasaa rakisi mariasara randaidaga. Amanee anee misa mariannaira qini qima qiminnaree.

17 Miqi qufanoo mi fasiqafa qinau. Misa doo quqasee fiqau. Misa Dootana maqa maaqai firaree qufaqa iriqiafana. Yooseefaafa mi ufana iriseenoo narí afasausa ninaaqianna fifiufanoo Dootana maqa maaqai misa oonu paqurinau.

18 Mifa nianai ani marufaqa mina afasausamara qafamaseeqa mina arirara tipundaariqau.

19 Misa maaqi qimasee narí qimami narí qimami qimariqau. Doo qaininoo nifa anidanoo.

20 Anifaqa mina aruseeqa mina iri mareeqee maa soorausaki mooki aqua. Miqimmaseeqa maasa minara kaasau aandau ariifoo qianaura.

Maasa miqimmasaananoo mina qaina fannoo naqaa fee iannoo.

²¹ Reeubeenafa misa ufa iriseenoo Yooseefaana saa ititaidanoo qinau.

²² Kaqi maa kaasau maqa maaqanaki maa nammari madikanaki aqua. Sia aidafirana amia. Mifa miqi qimasee nari kai qimiriseenoo qumee afixamaree nari akoofunnai munu aisarara miqi qinau.

²³ Yooseefaafa nari afasausamara maruqoo ururoofaqa qumarasee mina kisaafa qamunna kisaafa asauku faqaana raipaqqau.

²⁴ Miqimmaseeqa nammari aadana usufu madikanaki aqqau.

²⁵ Aquseeqa miqoo ooqu faqee narana naidaqa tautummasee qafoofaqa Isamaeerana aiku asauku aniqau. Misa Kireeata maqa maaqaindari Isipa maqa maaqai fimariqau. Misa adiafaa imarufaqa neemaru ainainna faqa afundimaru saqari anoonnana faqa mara kammeerasaa quqeesee Isipa maqannaasa feefauriaqeera maree fiqau.

²⁶ Yudafa nari akaqaa fasaauqa qimanniminoo qinau. Inni saimbaqa qeeqa qikaqa arusee mina fidika rafaafusee nana dadaaqirane maraanauree.

²⁷ Anifaqa Isamaeerana aiku asauku maa aniraasa nimianaqa feefauru qimiaqa. Mifa maasa qikaqa maridanoo maasa moodaa fidika marinara sia mina aidafirana amia. Miqi qufaqa misa eedoo qiqau.

²⁸ Eedoo qimarufaqa Midianna maqusanaasa ainaina feefauri marusa aniroofaqa misa nari

nikaqa Yooseefaana madikakinaana qubaqeeqee
misa nimisoofaqa siruaa munnimma moodaa
fasiqa aiku asauku taikasee 20 nimisee doo
Yooseefaana maree Isipa maqa maaqai fiqau.

²⁹ Misa Yooseefaana nimuna Reeubeenafa
sia qafanau. Mifa anireenoo madikaki ooqu
qafofanoo sia marufanoo nari qamunna
anaqaana qinau.

³⁰ Miqimmaseenoo Reeubeenafa nari
akaqaafasaaqaa unnai oonuree qimannimiau.
Yooseefaana sia maridanoo qinee naqi fee
ianauree.

³¹ Miqi qufaqa misa mimmi arusee
Yooseefaana kisaaga qamunna mina fidikaki
raaraa iqau.

³² Miqimmasee misa mi qamunnana mara
maree nari nikoofunnai oonuree qimamiqau.
Maasa maa qamunnana moosaa paquriqa, qafaa,
ani amaakundi fee maridanoo fee.

³³ Yakooboofa mi qamunnana qafamaseenoo
qinau. Qini qimaaku qamunna maridanoo.
Kaasau aandau fannoo qini faiqi Yooseefaana
arusee rakeekaammaseenoo fee qinau.

³⁴ Miqi qimaseenoo Yakooboofa nari
qamunna anaqana qiiseenoo soofaara qamunna
afisuseenoo kisaagasaa nari faiqiara soofarida
marinau.

³⁵ Marufaqa mina faiqi namu faqa araamuq-
maaka faqa anireeqa nari nikoona aundura reen-
deenira ufa qufanoo misa nikoofa qaoo qidanoo
qinau. Qinee qeeqa faiqiara iki raqaqa fuan-
naqbaqa kuqiqa kuqirausa mariannai fuanaura.

36 Yakooboofa miqi marufaqa Midianna maqannaasa Yooseefaana afiqamaree Isipa maqa maaqai Pootifaana ainainira faiqi kianifeera amiseeqa feefauru maraqau. Isipa maqanna kinna maaqasaa rakisi marusakiqari Pootifaafa uriqarara oofisaa marufaqa amiqau.

38

Tamaara nammarifa Yudana akaru qinau.

¹ Mi aukuanna Yudafa narí ainaina min-niseenoo Qiraana faqa Aduramma maqusai ooqu marinau.

² Miqoo Yudafa Kannaana maqanna faşiqa Suana araamuna qafamasee maranau.

³ Mariufanoo mi anaaseefa amuaqu qaikinoo akoonaiqi maqasoofanoo Yudafa mina auqu Eera fee qinau.

⁴ Kafaa mariufanoo mi anaaseefa amuaqu qaikinoo faiqi moo maqaseenoo mina auqu reenoo Oonanee qinau.

⁵ Kaifaa amuaqu qaikinoo akoonaiqi moo maqaseeoo mina auqu Seeraa fee qinau. Yudafa Keesiba maqusai marufanoo mina anaaqa fanoo Seeraana maqanau.

⁶ Yudafa narí indaruqaa faiqi auqu Eerafa innooqa fufanoo anaasee Tammaara nammarina mara aminau.

⁷ Eerana marirafa Karaambaiqa afusaa mandaika uqanna ufanoo kuqa arinau.

⁸ Kuqufanoo Yudafa mina akaqa Oonana qimaminoo qinau. Anee maasa oosana ma-reenana aneenna afasaana anaaqa faqa aana

finanoo faiqi maqasainanoo ani afasaana auqu sia taikaani.

⁹ Oonanafa mina iriseenoo maaqi qimirinau. Qinee faiqi maqasaanoo sia qinindi kiandoo qimaseenoo narí afasaana anaqa faqa aana nidanoo kaqinni kai nammari adiee marinau. Narí afasaana faiqi asumu sia marianifeera miqi marinau.

¹⁰ Oonanafa mi oosanna maroofanoo Karaambaqa qafóofanoo mandaika uqanna ufanoo mina kuqamma arinau.

¹¹ Kuqufufanoo Yudafa narí aanaakuqu Tammaara nammarina qimaminoo qinau. Aneenna akoona maqa maaqai oonu adeedaana kai marinaqa Seeraafa innooqa finaqa mina faqa ani kai amianauro. Seeraafa faqa narí afasaqanda undee inoo mi anaaseena marasee kuquandoora mina akoofa miqiqinau. Miqi qufanoo Tammaara nammarifa narí akoona maaqai finau.

¹² Mariufanoo Yudana anaqa Suana araamuna kuqinau. Kuqufufanoo soofaara taikaseeoo Yudafa narí aqoondi Aduramma maqusanaana mina auqu Qiraana faqa Timinaa maqusai narí sipsipa asausi aukimaruna niqafarara ooru finau.

¹³ Faiqi moo fannoo Tammaara nammarina qimaminau. Ani aanaakuqu Timinaa maqusai narí sipsipa asausi atekarara ooru fidanoo fee qinau.

¹⁴ Tammaara nammarifa mi ufana iriseenoo adeedaana marida afisiu qamunnana raipaquseenoo moo qamunna afisumareenoo narí oori kaqikaa qamunnannai ititaseenoo

Eenaimma maqusaki fimaru aannanasaa ooqufaaqee marinau. Tammaara nammarifa Seeraafa innooqanoo marifanoo sia qimiannoo fee qimasee miqinau.

¹⁵ Yudafa ani qafofanoo qamunnannai oori rafaafusee marufanoo dapi maraqa nua aanaaseefa mifoo qinau.

¹⁶ Miqi qimaseenoo aana afainni mi anaaseefa marufanoo oonuree qimaminau. Ani rarisama saana mina akiqara naqumma feefauru fee maridanoo fee. Yudafa mi anaaseenara sia nari aanaakuqu fee qimasee miqi qinau. Miqiqufanoo mi anaaseefa qinau. Mina akiqara nanee qiminnaree.

¹⁷ Miqi qufanoo Yudafa qinau. Qinee mimmi moo timmusa ani amaqaanaura. Miqi qufanoo mi anaaseefa qinau. Anee moo ainaina qimiqaina uaqeeiana kasooaqee mimmi qiminna kari aninna amianaaura.

¹⁸ Miqi qufanoo Yudafa qinau. Nana ainainee amianauree. Miqi qufanoo mi aneeseefa qinau. Aneenna asaukukinaa isaaqama faqa aneenna saunu faqa qimia. Miqi qufanoo Yudafa minauqa amiseenoo mi anaaseena faqa aana numa-soofanoo amuaqu qaikinau.

¹⁹ Tamaara nammarifa findi fufanoo nari maqusai oonureenoo dapi anaasee maraqaanu qamunnana raipaqusee adeedaana qamunna kaifaa afisinau.

²⁰ Yudafa nari qaqoondi Qiraanasaa mimmi aanaaqi timmusa quqaseenoo munu mi anaaseena amisee nari ainaina uaqeeuna oonu

mini qimiannee qufanoo oonu randoosiaa sia mi anaaseena paqurinau.

²¹ Mifa oonureenoo Eenaimma maqusanaa fasiqauqa iramirinoo qinau. Yaifee dapi maraqanua aanaaseefa maa aannana afainni ooqufaaqeeiufa maridanoo fee. Miqi qufaqa misa qiqau. Sia maa maqusanaki dapi maraqanua aanaaseefa maridanoo.

²² Miqi qufanoo mi fasiqafa kafa anirandeenoo Yuda funnai oonureenoo qimaminau. Oo qinee sia mi manaaqana paquriqa. Mi maqusanakinaa fasiqauqa faqa qiqa, sia ooqaindari maasa maqusaki dapi maraqanua aanaaseesa marida miaafoo qia.

²³ Miqi qufanoo Yudafa qinau. Saina mi anaaseefa mi ainainausa uaqee iani. Faiqi maasara naanaidara qifooro qikooqaidanoo. Minara qinee mi anaaseena feefauru amirara qunana anee oonuree sia paquriananoo.

²⁴ Qaarammoo quqoona aiqaramafufanoo Yudana qimamiqa qiqau. Ani aanaakuqu fanoo dapi maraqanua aanaaseesara foora numaseenoo maqee mifa amuaqu qaikinoo maridanoo. Yudafa mi ufana iriseenoo qinau. Mi anaaseena maree munusee idarasaifanoo qaani.

²⁵ Misa afiqee fimarufanoo nari aanaakuqu Yudanara ufa quqanau. Qinee maa ainainausa faqaa fasiqa faiqi uqa faqa maridaqa. Qafamasee iria, yana ainainauqee maridanoo fee. Maa qisaaqamafa faqa mina sanda faqa saunu faqa yanaindi fee maridanoo fee.

²⁶ Yudafa qafamaseenoo qinau. Maa anaaseefa andeeqanoo maridanoo. Qinee kai aaqeeqa. Qinee qeeqa qimaaku Seeraana amiaqaana. Miqi qimaseenoo Yudafa sia kaifaa mi anaaseena faqa aana finau.

²⁷ Mi anaaseena faiqi maqarafa aniroofaqa qafeeqa qiqau. Maa anaaseefa qaara faiqi maqaannoo fee qiqau.

²⁸ Faiqi maqarara aupuree marufaqa moo fannoo naaree asauku quqasoo qumuroofanoo mina innaammuna afeesu aanaaseefa asauku qumaraseenoo taatuqee sanda rumbaseenoo qinau. Maafa indaarugaafa maridanoo.

²⁹ Miqi qimasoo fanoo asauku raqandaamma maroo fanoo moo kaiqeena naaree maqanau. Maqasoo fanoo innaamunai afeesu aanaaseefa qinau. Anee naqaa fee ifanee kaqinnaindari anee naaree qumidanee. Minara mina auqureenoo Peereesanee qinau.

³⁰ Mina inaaqianna mina akaqa taatuqee sanda asaukusaa rumbarana maqanau. Maqaseenoo mina auqu Seeraa fee qinau.

39

Pootifaana anaaqa faqa Yooseefaana faqa ufa.

¹ Isamaeerana aiku asauku Yooseefaana afiga-maree Isipa maqa maaqai muqusoofanoo Isipa maqannaa karaambaiqa Faraona sundiauga rakisirafa Pootifaafa Yooseefaana feefaurinau. Pootifaafa Faraofa maruqoo rakisi maru sudi-asa uriqararafa marinau.

² Karaambaiqa Yooseefaana faqa maridanoo dadaaqa marufanoo aiqama ainaina auqoofanoo

anoona kai kambiqee marinau. Mifa narí Isipa maqannaa uriqararana maaqaki marinau.

³ Pootifaafa qafoofanoo karaambaifa Yooseefaana faqa maridanoo aiqama ainaina auqoofa anoona kambiqee marinau.

⁴ Pootifaafa Yooseefaana asaammaseenoo uriqarara ainainira faiqikammaqoofanoo marinau. Miqimmaseenoo mifa Yooseefaana mareeqee narí maaqasaa faqa narí aiqama ainainasaa rakisirafaikamma qoofanoo marinau.

⁵ Miqooqari Yooseefaana kai qidanoo karaambaifa fannoo Isipa maqannaasa maaqakinaa aiqama ainaina faqa Pootifaana maaqakinaa ainaina faqa mina maqakinaa nara ainaina faqa amiqi amiqimma nimaqee marinau.

⁶ Pootifaafa mana mana kaimmi marinau. Sia narí ainainara irimarinau, naranara kai irimarinau. Yooseefaana amudaani tiafa amiqirafa uqanna mariaua.

⁷ Kaqi kaaqoo marinoo mina uriqararana anaafa fannoo Yooseefaana aidufanoo qimaminau, aniree qini faqa faiqaa.

⁸ Miqi qufanoo Yooseefaafa qaoo qimaseenoo qimaminoo qinau. Qini uriqararafa sia maaqaki quqaqai ainainausara iridanoo. Qinee marunanoo sia iridanoo. Mifa narí aiqama ainainasaa qini quqaqai faqa rakisidaqa.

⁹ Qinee maa maaqanaki rakisira afeeka mifa uaqeeindee kai masee uaqee idaqa. Mifa sia moo ainaina qini kukeeqa qimaqa qaifanoo maridanoo aiqama ainaina qimiqaifanoo, ani kai sia qimiqaifanoo. Naqi fee mandee fee qinee

maa manda oosanna auqamasee fee Anutuna mandaikamma amaqaanauree.

¹⁰ Pootifaana anaqa fannoo aiqama faasaana Yoosefaanara qini faqa faiqaannee qimarufannoo Yoosefaafa sia mina faqa faiqanau.

¹¹ Moo faasaana Yoosefaafa nariara maaqaki ainaina auqanoo nufannoo sia moo ainainira faiqi minaki marinau.

¹² Nariaraa marufannoo mi anaaseefa mina siuta ani qumareenoo qin角度. Doo ania. Aniree qini sakasee faiqaa. Miqi qimaseenoo Yoosefaana siutandauru qumaroofannoo mifa nari siuta kai raipaqueegee mina asaukuki quqaseenoo rafudamakufannoo madaanai sandanau.

¹³⁻¹⁵ Madaanai sandoofannoo Pootifaana anaqa fannoo qafamaseenoo nari maaqaki ainaini maru faiqisa naaramaseenoo qin角度. Innee maana qafaafa. Maa Qeeburu maqannaa fasiqana qini qifaaqi fannoo maaqaki miniqaiifa maasa mandaikamma qima qaidanoo. Mifa qini rarisara rifaqa qinee firaaqoo faafa runannoo mifa nari siuta qini daafa quqasee sandeenoo.

¹⁶ Mifa miqi qimasee qimannimiseenoo mi siutana kaqi uaqeeufannoo Yoosefaana uriqararafa aniranau.

¹⁷ Aniroofannoo mi ufana kai qimaminau. Maa Qeeburu maqannaa anainira faiqina anee miniqaanafa qini maaqaki keeqafi qini faqa manda oosanna auqarara inoo.

¹⁸ Miqifaqa qinee faafa runannoo nari siuta qini daafa raipaqu quqasee madaanai sandeenoo.

19-20 Yooseefaana uriqararafa mina irufanoo aranaqoofanoo Yooseefaana qumareeqee uriqararausa rumbara fasiqauqa marunaki quqanau. Quqasoofanoo minaki marinau.

²¹ Marufanoo karaambaiqa Yooseefaana faqa maridanoo dadaaqida amiqi amiqimma amaqqee marufanoo karabusasaa rakisi marufa Yooseefaana qafamaseenoo asasinau.

²² Karabusasaa rakisi marufa Yooseefaana mareeqee karabusauqasaa rakisiranaika minau. Miqimmasoofanoo Yooseefaafa karabusa maaqaki aiqama ainaina auqee maruna rakisirafa marinau.

²³ Karabusasaa rakisirafa Yooseefaafa rakisi maru ainainausara sia amiqimmasee iridanoo. Sia rakisi marinau. Karaambaiqa fannoo Yooseefaana faqa marunara aiqama ainaina mifa auqoofa anoona kai kambiqee marinau.

40

Yooseefaafa karafusaki marusa qainuna kooroo qimaru ufafa.

¹ Kaqikaaqoo marinoo Isipa maqannaa karaambaiqa uainna anoona tatimaru fasiqafa faqa mina feemu suqee marufa faqa nariqa uriqararana mandaikamma amaqaqau.

² Mandaikamma amaqasoofanoo mi qandara aranaqoofanoo nari sundiauqara qufaqa qumaraqau.

³ Qumaraseeqa sundiauqa uriqararana karabusa maqaki Yooseefaafa maru maqanaki quqanau.

⁴ Mi qanda kisaacaqasaa karabusaki marufanoo karabusasaa rakisirafa qufanoo Yooseefaafa misasaa rakisi marinau.

⁵ Miqoo karabusaki maridaqa moo eendaki uainna tati marufa faqa feemu suqee marufa faqa qainiqau. Uainna tati marufa mina qaina oosana aaduma marinau. Feemu suqee marufa mina qaina oosana aaduma marinau.

⁶ Mi kananaanna miqanda noori runusee marufanoo Yooseefaafa ani nindafeenoo iramirinoo qin角度.

⁷ Inneeqara nanaree kaaqa moomoo irira irida maridee.

⁸ Qufaqa miqannda qiqaau. Maaqanda qaina maqaqee idaqa qaina oosana qimannimi marifasia marifaqa maaqanda minara oonu mafi irida maridaqa. Yooseefaafa miqanda ufa iriseenoo qima nimirana. Anutufa kai qaina oosana qimannimirana nimidanoo. Inneeqa qaina qima qimifaqa iria.

⁹ Miqi qimasoo fanoo Faraona uainna namari tati maru fasiqafa nari qaina maaqi qimasee Yooseefaana qimaminau. Qinee qafaunanoo uainna sanda qini doorinni marifaqa qafeeqa.

¹⁰ Qaarammoo asaana minasaa marifaqa qafeeqa. Amanee ifaqa qafaunanoo afufeenaarifaqa qafaunanoo qaqaama irafi akuqeenoo.

¹¹ Qinee karaambaiqa Faraona kaafa uaqeedaqa akuqamafina minaki anoona tatiisee munu amiqa.

12 Yooseefaafa mina iriseenoo maaqi qimasee qimaminau. Sanda qaarammoo asaana qafaanana mina amana qaaramoo faasaana marinara.

13 Qaaramoo faasaaana taikainanoo Faraofa ani iduku aisainana kafa aneenna saikaki finnanoo. Anee ooqai mina uainna tatira faiqi maridana mina uainna kaafa amiunnandee inana kaifaa aminnaranoo.

14 Anee miqimma finana qiniara qimudao qimasee karaambaiqa Faraona qimaminanoo qini dadaaqinoo iduku qisaani.

15 Misa ooqai qini Qeeburu maqusaindaraana ummuara mamaree aniqau. Qinee maaqoo Isipa maqa maaqaki marida sia moo manda oosana mareeqa. Misa fifau qini karabusaki quqaqaafaqa maridaqa.

16 Feemu suqee marufa narí agoonnana qaina oosana qimamuna irufanoo amiqufanoo Yooseefaana qimaminoo qinau. Qinee faqa moo qainammiga. Qinee qaarammoo feemu difaani qumbiqarana qikiiaaqa akuagee idaqa qafeeqa.

17 Meeraqooqaraa difaaniki oosana oosana feemu ainaina uriqararanaindi marifanoo ufinuqa nee mariafaqa qafeeqa.

18 Yooseefaafa mina qaina oosana iriseenoo maaqi qimasee narí qimaminau. Qaarammoo difaani qafaanafa qaarammoo faasaana maridanoo.

19 Qaaramoo faasaana amana mina qaaramoo feemu difaani marifana qafaananoo. Qaaramoo faasaana aiqarainanoo Faraofa ani ani qumareenoo munusee anuka atekasee ani

iri saqarisaa dirisainaqa ufiniuqa ani amaqi neefaranoo.

²⁰ Miqiqimasee qima nimisoofanoo miqooqari mi qaaramoo faasaanna aiqaroofanoo mikari Faraona maqoo aukuanafa aniroofanoo narana firaqoo suqaseenoo narí ainainasaa rakisi marusa niminau. Mifa narí uainna tati maruna faqa feemu suqee maru fasiqana faqa idukumaree mini narí ainainasaa rakisi marusa nifusaa quqanau.

²¹ Idukuseenoo uainna tati maru fasiqana mareeqee ooqai mareeu saikanaki kafaa quqa-soofanoo uainna tatimarinau.

²² Feemu suqee maruna idukuseenoo anuka atekasoofaqa sandannai mina qiri saqarisaa diriqau. Aiqama ainaina Yooseefaana ufamau andeeqaseenoo mimau kaimbinau.

²³ Uainna tati marufa kafaa Faraona ainainidanoo Yooseefaanaara siamma irinau. Qaunusee marinau.

41

Yooseefaafa Faraona qaina oosana kooroou ufafa.

¹ Qaara aukwana aiqaroofanoo moo eendaki Isipa maqannaa karaambaiqa Faraofa moo qaina maaqimmasee qafee fee qinau.

² Qinee Niru nammmari afainni kikiqiga marida qafaunanoo qisauku dinni taikasee dinni ani qaara marasee 7 burimakau nifaaqa faqaasa urureeqa andanda nee mariafaqa qafeeqa.

³ Neemarufaqa dinni qisauku taikasee dinni oonu qaara marasee 7 nimudaani aanaaqi nammarikiqari urureeqa indaaru qaasa naaqa nam-mari afainni kikiqamma fuafaqa qafeeqa.

⁴ Nimudaani aanaaqiuqa nifaaqa faqaasa aiqama nambiqama saafaqa qafeeqa. Mi ainainausa qainasaa qafamaseenoo karaambaiqa Faraofa tauti findifinau.

⁵ Mifa kaifaa afuki qaunduarufanoo faifufanoo moo qaininau. Sakumma moodaa oosana saa dinni qisauku taikasee dinni oonu qaara marasee 7 iranoo marufa aiqama anoona qumbi qumbiqirafa marufanoo qafanau.

⁶ Kafaa mina aanaaqianna moo qaina qafoofanoo dinni taikasee dinni ani qaaraqanda marasee 7 sakumma moodaa oosanasaa iranoo marinau. Anoona siaifa narana maaqina kinaafa mandaikirafa sia anoona marufa, ufai fannoo raudaqoo fara foora marufanoo fifau akee kai marinau.

⁷ Anoona siai sakummafa quandaku fanoo anoona faqaa sakumma aiqama namasanau. Mi qainna maseenoo Faraofa tauti findi fufanoo Boo moo qainammidaqee qinau.

⁸ Mi kananaanna Faraofa findi fufanoo moomoo irirana maroosia Isipa maqannaa irirana faqaasa faqa afunee fasiqauqa faqa naaranau. Naaramaseenoo nari qainuna qimannimufaqa sia moo fannoo amana mina oosana nari qimamiqau.

⁹ Minara tutu qidaqa randee marufanoo Faraona uainna tati maru fasiqafa Yoosefaanara iriseenoo Faraona qimaminoo

qinau. Oo karaambaiqa maqee kai qeeqa furufariafanna oosanna oonu mafi iriseeqa kooroommasee qimamidaqa.

¹⁰ Ooqai anee aanoo qimaseenana qini faqa feemu suqee maruna faqa aneenna sundia rakisirana maaqaki quqaqisanau.

¹¹ Moo eendaki maaqanda qaina qiqiafana. Mi qaina qanda naadu naadu oosana faqaa qaina qiqau.

¹² Minakina Qeeburu maqanna kumaaraa moo fannoo, sundia rakisirana Pootifaana ainainira faiqi marufa maasa faqa marinau. Maasa qeeqa qaina qimamianafanoo mifa mina oosana maasa qimaqiminau.

¹³ Mifa qundee kaimminau. Anee qini saikaki kaifaa mara quqaqiseenana feemu suqee maruna d irinau.

¹⁴ Faraofa mi ufana iriseenoo niqiqoofaqa Yooseefaana karabusa kinaana aaqee uqanna afigee aniqau. Mifa oosau suqaseenoo narí qamunna fuka afisumareenoo Faraona afusaa aniranau.

¹⁵ Aniroofanoo Faraofa qimaminau. Qinee qainammasaunaqa sia moo fannoo mina oosana qimaqimia faqa iriqa. Anee qaina oosana kooroo qimarianafa mariannanara qimaqimi-afaqa aaraidaqa.

¹⁶ Miqi qufanoo Yooseefaafa qinau. Oo qini uriqararafa amiqirafa qinee qeeqa kai sia amanaikianauroo. Anutufa kai qaina oosana qimannimirana qiminaqa qimamianauro.

¹⁷ Miqi qimasoofanoo Faraofa narí qaina oosana Yooseefaana maaqi qimasee qimaminau.

Qainunnana qinee Niru nammari afainni kikiqqa maridaqa qafeeqa.

¹⁸ Qafaunanoo burimakau nifaaqa faqaasa dinni qisauku taikasee dinni oonu qaara marasee 7 nammariqari urureeqa andanda neemari-afaqa niqafeeqa.

¹⁹ Misa ninaaqianna miqi kaimmaseeqa dinni qisauku taikasee dinni oonu qaara marasee 7 misa nimana kai nimudaani aanaaqi urureeqa kikiqamma fuafaqa nindafeeqa. Miqira mandaikira burimakauqa sia ooqai Isipa maqa maaqaki mootinai mariafaqa qafeeqa.

²⁰ Nimudaani aanaaqi burimakauqa nifaaqa faqaasa namataikeea.

²¹ Nambiqamaseeqa sia moo fannoo nifaaqa mareea, ooqai mariundee kai miqa mariafaqa qafeeqa. Nindafamaseeqa tauti findi fiqa.

²² Qinee moo qaina faqa masee qafaunanoo dinni qisauku taikasee dinni oonu qaara maraseenoo 7 sakuma aiqama qumbi qumbiqirafa moodaa saqarisaa marifaqa qafeeqa.

²³ Mina aanaaqianna qafaunanoo kafaa moo sakuma saqarisaa dinni qisauku taikasee dinni oonu qaara maraseenoo 7 iranoo marifaqa qafeeqa. Mifa anoona siaifa ufai uqinoo rauda quqaqai fara fooraa marifaqa qafeeqa.

²⁴ Ira fifaqa qafaunanoo anoona siaifa indaaru iraina anoona sakumma nambiqamasaafaqa qafeeqa. Qinee mi qainnana afunee fasiqauqa qima nimunaqa sia moo fannoo mina oosana qimaqimia.

²⁵ Yooseefaafa mina qaina ufa iriseenoo Faraaona qimaminoo qinau. Anee qainiannana oosana moodaara qaaraqanda qaina iananoo. Anutufa auqaaninna ainainnara qainasaa ani qimaminoo.

²⁶ Dinni qisauku taikasee dinni oonu qaara marasee 7 burimakau afaaqa faqaana qafaannana oosana dinni qisauku taikasee dinni oonu qaara marasee 7 aukwana qafaananoo. Sakumma dinni qisauku taikasee dinni oonu qaara marasee 7 sakuma anoona qumbi qumbiqirana faqa qafaanafa mifa faqa miqikai inoo dinni qisauku taikasee dinni oonu qaara marasee 7 aukwana maridanoo. Mi qaina qanda oosana moodaa maridanoo.

²⁷ Dinni qisauku taikasee dinni oonu qaara marasee 7 burimakau nimudaani aanaaqi nam-mariki ururaasa faqa dinni qisauku taikasee dinni oonu qaara marasee 7 sakuma anoona siaina qafaannana oosana 7 aukuanaki aandaroo firaafa mariannoo.

²⁸ Qinee qimamunandee kaimmiannoo. Anut-ufa nari auqaaninnanara ani uqafiqeenoo.

²⁹ Dinni qisauku taikasee dinni oonu qaara marasee 7 aukuanaki Isipa maqa maaqaki narana firaagoo rairaa iannoo.

³⁰ Mina aanaaqianna kafaa miqi kai inoo dinni qisauku taikasee dinni oonu qaara marasee 7 aukwana aandaroo naruannoo. Mi aandaroonaki mi rairairra narannara qaunifaranoo. Aandaroo fannoo maqa maaqa mandaika uqanna masaan-noo.

³¹ Mi aandaroo aukuanai faiqi anaasee doo

rairairā aukuanara qaunu uqannaseefaranoo. Aandaroo firāafa mandaika uqanna irāfa mari-aninnanara miqifaranoo.

³² Anee kaifaa kaifaa qainiannana oosana Anutufa mi ainainna kasooaqee kuqaa miqian-noo.

³³ Minara anee aneenna maqannaasakina moo qafamaseenana irirana faqaa fasiqa mara quqasainanoo mifa Isipa maqa maaqasaa rakisiani.

³⁴ Anee akaqa rakisirāusa quqasaināqa moodaannai qisauku taikasee dinni oonu qaara marasee 7 rairairā aukuanakina oosana oosana narana moodaannai qisauku namu kinaana moodaa moodaa mara afeediaqa.

³⁵ Anee qimanniminaqa aiqama narana rairairā aukuanakinaana suqu quqaaqa. Anee afeeka ufa nimisaināqa narana maqusa maqusaki suqu quqasee minasaa rakisiaqa.

³⁶ Mi narannafa dinni qisauku taikasee dinni oonu qaara marasee 7 aukuaana aandaroo firāafa anianinnanaki mi afeediranakinaana neefaranoo. Miqidaqa sia faiqi anaasee kuqifaranoo.

Yooseefaafa Isipa maqannaasa uriqararafaik-inau.

³⁷ Faraoofa faqa narí uriqararāusa faqa Yooseefaana iriranara eedoo qiqau.

³⁸ Miqi qimaseenoo Faraoofa qimanniminoo qinau. Maasa sia amana moo fasiqa Yooseefaana uraaqararana paqurianaura, Anutuna maraquna minaki marifa marinara saifanoo mifa kai mari-ani.

³⁹ Miqi qimaseenoo Faraoofa Yooseefaana qimaminoo qinau. Anutufa kai maa aiqama

ainainna ani uqafiqeenoo. Anee aiqamausa urin-naaqara masee firaa irirana faqaafa akooqoo mariananoo.

⁴⁰ Qinee ani quqasaanana qini maqa maaqasaa rakisinnaranoo. Aiqama qini faiqí anaasee ani ufa mau kai fifaranoo. Ani afeeka fannoo qini afeeka ameemaanai mariannoo.

⁴¹ Miqi qimaseenoo Faraofa kafa Yooseefaana qimaminau. Qinee maqee ani mareeqee Isipa maqannaasa uriqararafai kammiga.

⁴² Miqi qimaseenoo Faraofa narí asauku amukakinaa rinna firaa uriqararausa rinna maruna raduku Yooseefaana asaukuki quqanau. (Yooseefaafa mi rinnanannai peennakina raaraa maseenoo papiqasaa atooqasoofaqa maaqanna maaqanna mina qafeeqa Faraona rinna akara fee qimaseeqa kaaqa rufieeqa mi papiqana saaqaraa ufara eedoo kai qimariqau.) Faraofa amiqira qamunna afisu amaqaseenoo koorannai auqira kukukakana faqa rufu amaqanau.

⁴³ Miqimmasoofanoo Faraofa uriqararausa nifiqanoo nu qoosa karana Faraofa Yooseefaana amisoofanoo minasaa rakisira sundiauqa mina afunni fidaqa maaqi qimasee faaqaridaqa qiqau. Amaaraaqa amaaraaqa. Mi oosannannai Yooseefaana aiqama Isipa maqannaasa uriqararanaikinai.

⁴⁴ Faraofa kafa Yooseefaana maaqi qimasee qimaminau. Qinee uriqararausa Faraoosa qimamidaqa. Sia amana Isipa maqannaasi fasiqa moo fannoo narí aidiranannai moo ainaina auqaannoo. Mifa anisaa naaree iraannoo.

⁴⁵ Miqi qimaseenoo Faraoofa Yooseefaana fuka auqu reenoo Safeenata Paneeanee qinau. Miqi qimasee mifa Yooseefaana anaasee aminau. Mi anaaseena auqu Aseenata nammarifa Pootifeerana araamuna marinau. Pootifeerafa Qeerioopoorisa maqusanaasa suani afuara innaaru qimarusa aanaiqikirafa marinau.

⁴⁶ Yooseefaafa moodaa fasiqa faqa moo fasiqa asaukuqara taikasee 30 aukwana marasee Faraona ainainirana oosana aranau. Oosana araseenoo Faraona aiseenoo Isipi maqa maaqaki oonuree aniree idanoo aiqama atinai nimirinau.

⁴⁷ Qisauku dinni taikasee dinni ani qaara marasee aukuanaki Isipa maqa maaqaki narana moomoo kambiqafi rairaa inau.

⁴⁸ Mi aukuanna namunakinana narana irairaa una Yooseefaafa mareeqeenoo maqusakiaqa afeedinau. Mi moodaa moodaa maqusanaki mi maqusana fiq fiqinoo maru maqanakinaa naranna marasee mi maqusanaki afeedinau.

⁴⁹ Mi naranausa unakiisoofanoo ooruku nammari afaiqaraa nukudara foora moomoo uqanna marufanoo Yooseefaafa asaana rusia minnisanau.

⁵⁰ Aandaroo aukwana sia ani marufanoo Yooseefaana anaqa Aseenata nammarifa akoonaiqi qaara qanda maqanau.

⁵¹ Maqasoofanoo Yooseefaafa qinau. Anutufa qini dadaaqifaqa qeeqa aupurarana faqa qeeqa qikoonna atiara iriranara faqa auniqa. Miqi qimaseenoo mifa nari indaaruqaa faiqi auqureenoo Mannasee nee qinau.

⁵² Kafaa Yooseefaafa akoonaiqi moo maqaseenoo qinau. Anutufa maa maqa maaqanaki qinee aupurarana maree marunnanaki faiqi qiminoo. Miqi qimaseenoo mifa narí inaaqiannaa faiqi auqureenoo Eefaraimmanee qinau.

⁵³ Qisauku dinni taikasee dinni oonu qaara marasee 7 aukuanaki narana irairaa imarufaqa Isipa maqannaasa asasiufa taikanau.

⁵⁴ Yooseefaafa undee kai inoo qisauku dinni taikasee dinni oonu qaara marasee irairaa ira aukuana aiqarroofanoo aandaroo kambiqanau. Aiqama maqa maaqaki aandaroo narinau. Isipa maqa maaqaki kai narana kaqi marinau.

⁵⁵ Mariufanoo Isipa maqa maaqaki faqa aandaroo narufaqa faiqí anaasee Farao funnai oonuree naranara faaqarida innaaru qufanoo mifa qinau. Innee Yooseefaa finnai oonu raifanoo mifa innandee innandee kai iaqa.

⁵⁶ Aandaroo firaafa Isipa maqa maaqaki aiqama atinai firaqoo narufanoo Yooseefaafa aiqama afeedira maqauqa atuqasoofaqa Isipa maqannaasa narana feefauri mariqau.

⁵⁷ Aiqama maqa maaqaki maru fasiqa aanaaseesa aandaroo firaafa naru faqa aiqama atinaindari narana feefaurirara Yooseefaa funnai Isipa maqa maaqaki aniqau.

42

Yooseefaana afasausamara narana feefaurirara Isipa maqusai ooqu fu ufafa.

¹ Yakooboofa Isipa maqa maaqai narana moomoo marunara narí faiqi namu qimanniminoo qinau. Innee naqaa fee ifagee narana minni ooqu maraaqaana maridee.

² Isipa maqa maaqai narana maridanoo mifoo qiafaqa iriqa. Miqoo ooqureeqa akaqa narana feefaurumma maree murusaifaqa namasee sia kuqua.

³ Miqi qufaqa Yooseefaana afasausa mara moo anaasee faiqi namu qisauku qara taikasee marusa narana feefaurirara Isipa maqa maaqai ooqu fiqau.

⁴ Yakooboofa Yooseefaana akaqa uqanna Been-saminna sia aiqanau. Moo ainaina mina afaaqai kambigaandoo qimasee rufiasee sia aiqanau.

⁵ Aandaroo firaafa Kanna maqa maaqaki nári marunara Yakooboona faiqi namu faqa moomoosa faqa narana feefaurirara ooqu fiqau.

⁶ Yooseefaafa Isipa maqa maaqakinaasa uriqararafa maridanoo aiqama maqa maaqakinaasa feefauriaqee qimasee quqaqoofaqa feefauri mariqau. Yooseefaana afasausa mara ooquree Yooseena oorinni noorindari maqasaa kummaraqau.

⁷ Yooseefaafa narí afasausa mara noori nindafoofanoo Yooseefaana irirafa kambiqanau. Kambi qoofanoo sia misara iridanoora foora aranaiqi iramirinoo qinau. Innee yaindariffee anidee. Qufaqa misa qiqau. Maasa Kannaana maqusaindari narana feefau rirara qumidaqa.

⁸ Miqi qufanoo Yooseefaafa misara iri maru-faqa mína afasausa mara minara sia iri mariqau.

⁹ Yooseefaana irirafa kambiq̄a fufanoo mifa ooq̄ai narí faiq̄i saa q̄ainunara oonu mafi irinau. Innee nipuraraa fasiq̄auq̄a mariafaq̄a nindafaída. Innee mai q̄umuree maasa aandaroo darifaq̄a ummooq̄ukida mandaiki marunausa q̄umu q̄iq̄afararee q̄imasee q̄umuafanoo.

¹⁰ Miq̄i q̄ufaqa misa maaq̄i q̄imasee narí q̄imamiq̄au. Oo uriq̄ararafa sia maasa miq̄ianaúra. Maasa ani ainainira faiq̄iara foora narana feefaurirara q̄umidaqa.

¹¹ Maasa moodaa fasiqa faiq̄i namu kai maridaqa. Maasa kuq̄aa ufa kai q̄imarunausa maridaqa. Uriq̄ararafa maasa sia nipuraraa fasiq̄au maridaq̄au.

¹² Miq̄i q̄imasoofanoo Yooseefaafa nariqa q̄ima niminoo q̄inau. Innee unna q̄imariafanoo. Maasa maqa maaqa mandaikinoo sia afeekaikinoo marina q̄afarara q̄umuafanoo.

¹³ Misa mi ufana iriseeq̄a kafaá narí q̄imamiq̄a q̄iq̄au. Uriq̄ararafa, maasa aiq̄ama q̄isaukuq̄ara taikasee q̄ikunni ooqu qaara marasee 12 maridaqa. Kannaá maqa maaq̄aki moodaa fasiqa faiq̄i namu mariafannanakiq̄ari moodaafa kuq̄inau. Maasa ninaaq̄iannaafa maasa nikoona faqa maq̄usai kaq̄i maridanoo.

¹⁴ Yooseefaafa mina iriseenoo kafaá q̄ima niminoo q̄inau. Doo q̄inee q̄idaqa, innee nipuraraa fasiq̄auq̄a mariafanoo.

¹⁵ Q̄inee maaq̄immasee inni nimanammasee q̄afaánaúra. Q̄inee Faraona auq̄usaa inni q̄ima nimidaqa sia innee ooru fifaranoo maaq̄oo marifanoo inni nikaqa q̄umurainaqa ooruffaranoo.

16 Innikiqari moo fannoo ooru inneeqa nikaqa afiqee qumuaqa. Innee akaqausa sundiauqa faqa marifaqa innisaa rakisi marifaqa maasa innee qia ufana qimasee qafamasaana oorufifaranoo. Innee unna qifaqa kuqaa Faraona auqusa qimannimidaqa innee nipuraraa fasiqa marifaranoo.

17 Miqi qimasee Yooseefaafa qufaqa misauqa rumbeegee karabusa maqaki quqasoofaqa qaaramoo faasaana mariqau.

18 Qaaramoo faasaanasaa marisoofanoo Yooseefaafa maaqi qimasee qima nimaau. Qinee Anutunara rufiee marunna fasiqausa maridaqa. Innee qini ufa mau fiqa amiqimmasee marifaranoo.

19 Inniara kuqaa qira fasiqauqee qiaqera innikiqari moodaafa innee maria karabusanaki marinaqa innee akaqausa narana feefauru maqaana muru inneeqa faiqi anaasee nimifaqa naaqa.

20 Innee ooruree inneeqa nikaqa inaaqianaana afiqeeqa qumuaqa. Qumu raifaqa qinee inniara kuqaa ufa kai qimariasee qimasee sia kuqa naranaura. Miqi qufaqa misa aiqamausa mina ufara eedoo qiqa.

21 Eedoo qimasee nari qimami nari qimami qiqa. Innisaimbaqa kuqaa qeeqa qikaqa mandaikamma amaqa qiafana. Mifa firaa ummaarakii maridanoo dadaaqiaqee qimarufaqa innisaimbaqa sia iriqaafana. Minara maasa maqee maa ummaaranaki maridaqa.

22 Reeubeenafa misa ufa iriseenoo maaqi qinoo qinau. Qinee qaoo qiafana innee sia iriqa.

Mifa kuquna akiiqara maasa maqee ummaara maraidaqa.

²³ Yooseefaafa misa qimaru ufana umee kai irimarinau, miqi marunara misa sia iriqau. Misa Yooseefaana faqa ufa qianee qimasee qimarufanoo moo fasiqa fannoo misa ufa quandee marinau.

²⁴ Yooseefaafa misa ufa iriseenoo quqasee umeenni oonureenoo ikiraqa seenoo oonu randee aninau. Iki raqarafa taikoofanoo ufaqirana amanaikufanoo oonu randee aninau. Anireenoo misakina Simeeonnana qumarasee misa nifusaa rumbanau.

Yooseefaana afasausa qumumaree Kannaana maqusai ooru fu ufafa.

²⁵ Yooseefaafa nari ainainira faiqiuqa qimannimufaqa narana mina afasausamara uqa umbiqaseeqa misa munnimma kaifaa nariqa uqa adianai uqarumasee nimiaqa, aanai fida neefandinna narana faqa nimiaqa qufaqa eedoo qimasee miqimma nimiqau.

²⁶ Mina afasausa mara feefaurummasoo naranna nariqa doonkisa qaqasee maree ooru fiqau.

²⁷ Yooseefaana afasausa mara narana nari doonkisa qaqasee maree fifi ufaqa eendufaqa aanai uiqaana arasee faiqarara imarufanoo mina afasaafa moofannoo nari doonki narana amirara nari uqa ooraqasee qafuofanoo mina munnimma uqa adianai marufanoo qafanau.

²⁸ Qafamasee nari ainaina naaramaseenoo qinau. Innee aniree qafaaqa qini munnimma kaifaa qiqa qimiafanoo qini uqaki maridanoo.

Miqi qufaqa misa nimuqusa mandaikufaqa ru-fiaidaqa qiqau. Anutufa maasa naqaa feemma qimaqeenoo fee maaqinoo fee.

²⁹ Miqi qimasee faiqagee mariufaqa iaqoo kananaana nári nikoofa Yakooboofa marunnai Kanna maqusai ooruree aiqama mi ainainausa kambiqoonara qimamiqau.

³⁰ Isipa maqanna karambaiqa fannoo aanoo qira ufa kai maasa qima qimaqeenoo. Mifa maasara innee qini maqa maaqaki nidaqa nipuree mariafanoo fee qimasee rairai qinoo.

³¹ Miqi qifaqa maasa maaqi qimasee narí qimamiqa. Oo maasa sia nipuraraa fasiqau maridaqau. Maasa kuqaa ufa qimarunausa maridaqa.

³² Maasa moodaa fasiqa faiqi namu qisauku qara taikasee qikunnooqu qaara marasee 12 maridaqa. Maasa qikaqa moo fannoo narí akoona faqa Kannaana maqusai maridanoo, moo fannoo kuqinuu.

³³ Maasa miqi qimasee qimamianfanoo mifa mina iriseenoo qinoo, qinee maaqi masee inni nimanida qafaanauree qinoo. Innikiqari moodaafa qini faqa marinaqa innee akaqausa sakumma aina maree muru faiqi anaasee nimiaqa.

³⁴ Nimiseeqa narana taikainaqa kafa qumiqa inneeqa nikaqa faqa afiqee qumuaqa. Muqusaifaqa qinee mina qafamaseeqa inniara kuqaa sia nipuraraa fasiqauqee kuqaa ufakai qimariasee qimaseeqa inni faiqí iduku nimianaqa innee maqee maqee narana aina feefaurida ooruree qumuree qiqa nuaqee qinoo. Misa miqi qimasee nári nikoona qimamiqau.

³⁵ Qimamiseeqa nári uqauqa idukusee ooraqasee qafoofanoo aiqamausa munnimma kaqi marinau. Misa qafamasee nári nikoona Yakooboona faqa rufiaqau.

³⁶ Yakooboofa rufiaidanoo maaqi qimasee nári faiqi namu niqinau. Innee qini faiqi namu mandaika maqimaqee mariafanoo. Yooseefaafa doo taika fufaqa, Simeeonafa faqa taika fifaqa kafa innee Beensaminnana faqa afiqee firaree qidee. Qinee ummaaraki kai maridaqa.

³⁷ Reeubeenafa nári akoona ufa iriseenoo maaqi qimasee nári akoona qimaminau. Oo qipoo, qinee Beensaminnasaa rakisianauro. Qinee sia mina afiqee ururaanana mina akiqara qini qimaaku qara narua. Anee qini qisaukuki quqasainaqa qinee amiqi masee afiqaqa niniinaqa afiqee uruanauro.

³⁸ Miqi qimasoofanoo Yakooboofa qinai. Qini qimaaku sia uqanna inni faqa fuannoo. Mina afasaafa doo kuqu fufaqa mifa náriara maridanoo. Aanai mandainaina paqurinaqa qinee maaqiraua asooqa inni mi ummaarafa darinaqa kuquanoora.

43

Yooseefaana afasausamara Beensaminna uru afiqee kaifaa Isipa maqa maaqai ooqu fu ufafa.

¹ Kannaana maqa maaqaki aandaroo firaafa narinoo mandaika uqanna inau.

² Isipa maqa maaqai feefaurummamaree murusoo naranna Yakooboona aiku asauku nama

taikasoofoano Yakooboofa narí faiqi namu qimannimianau. Kaifaa ooquree kaqika narana feefaurumma murusaifaqa naa.

³ Miqi qimasoofoano Yudafa qinau. Mindaraa uriqararafa maasa oori runusee qimaqimifaqa iriqa. Innee inneeqa nikaqa sia afiqee qumiqa sia qini qifusaa nifaranoo fee qinoo.

⁴ Anee qini qikaqara eedoo qinaqa maasa afiqee ooquree ani narana feefaurianaara.

⁵ Anee sia eedoo qinanoo maasa qikaqa sia ooqu finaqa sia amana fifau ooqu fuanaura. Mi maqannaasa uriqararafa qinoo inni nikaqa sia quminaqa sia qini qifusaa nifaranoo fee qinoo.

⁶ Yakooboofa mi ufana iriseenoo qinau. Innee nanaree moomoo ummaara qini qimidee mi uriqararana qimamiqa maasa qikaqa maridanoo fee qifee.

⁷ Misa iriseeqa kafa qimamiqa qiqau. Mi uriqararafa maasara faqa maasa faiqi aanaaseera faqa iréenoo. Inni nikoofa kaqi fee maridanoo fee qinoo. Kafa inni nikaqa moo maridanoo fee qinoo. Miqi qimasee maasa iraiifaqa qimamiqa. Maasa naqaa fee masee maasa qikaqa afiqee qumuaqee qianinnanara irianauree. Sia maasa iriqa.

⁸ Miqi qimasee Yudafa narí akoona maaqi qimasee qimaminau. Qipoo anee maasa qikaqa qini qisaukuki quqasainaqa maasa doo findifi ooqu fuanauranoo. Miqinaqa maasa sia daara rainaqa kuqunauranoo.

⁹ Qinee qeeqa marirana mina amaaqa maqaanaura. Anee minara qini kikiaqa usua.

Qinee sia afiqee andeeqasee anee iannannai uriqa qinee ani nifairirana maraanaura.

¹⁰ Maasa sia ani faqa kisaagasa ufa qifau, maasa amana qaara kari ooquree ururee unaiqini.

¹¹ Miqi qufanoo misa nikoofa qimannimainau. Doo amana inneeqa miqiqa miqiaqa. Innee maa maqa maaqana kinaana amiqira ainaina inneeqa uqaki rumammareeqa kaqi nimi maria ainainnara foora muqu mi maqannaasa uriqararana amiaqa. Saqari anoona qoodaa faqa ookasaasa anoona qoodaa faqa adiafaa imari saqari qaqa mana anoona faqa oofauna fooqaa ira ainaina anoona faqa kasa fooqaana anoona faqa maree ooqu fuaqa.

¹² Innee moomoo munnimma qaara kari afaqamaree ooqu fuaqa. Innee ooqai munnimma inni uqa adianai marufaqa qafaqau. Abee, aaqamasee munnimma inni uqaki kafaa quqaqau.

¹³ Inneeqa nikaqa afiqee ooqurandee kai kaqi uruaqa.

¹⁴ Aiqama afeeka faqaa Anutufa dadaaqinanoo mi fasiqafa inniara qimudaoo qiani. Qimudaoo qimaseenoo Beensaminna faqa inni nikaqa moo faqa kafaa nimiani. Qinee qini faiqi namu kakasifanoo doo saina kakasiani.

¹⁵ Miqi qimasoofaqa Yakooboona faiqi namu mi saqari anoonausa faqa munnimma moomoo qaara kari mara maree Isipa maqa maaqai Beensaminna faqa afiqeeqa ooqu fiqau. Miqoo misa Yooseefaafa maruqoo ooqu kikiqa mambufanoo Yooseefaafa misa nindafanau.

16 Yooseefaafa Beensaminna qafamaseenoo nari maaqakinaa ainainasaa rakisi maru fasiqana qimaminoo qinau. Anee maa fasiqausa nifiqeenana qini maaqaki munu quqaa. Misa suani qambaana qini faqa narana neefaranoo. Anee aandau aruseenana deedaqia.

17 Ainainira faiqi fannoo mifa qimamundee inoo misauqa nifiqee Yooseefaana maaqaki munu quqanau.

18 Yooseefaana maaqai nifiqee munu quqarara fimarufaqa misa rufiidaqa oonumafi irimariqau. Indaaru narana feefauriafanna munnimmana maasa mara mareeqa qimaaqai murusee mi munnimmana maasa uqaki paquriafannana akiqara maasa mai qifiqee anidanoo. Misa kai kaqi maasa darusee maasa doonkiuqa marasaifaqa maasa misa ainainira faiqikianaura.

19 Misa miqi qimiriseeqa mina ainainasaa rakisi maru faiqina maaqa kooqiki oonuree qimamiqau.

20 Oo uriqarara amanee maasa ufa irinnaree. Ooqai maasa qeeqa maaqaindari mai qumuree narana feefauru iqiafana.

21 Maasa mai feefauru mamaree ooru fiuufaqa aanai ooru faiqarara uiqaana arasee maasa qeeqa sakuma uqa sanda idukusee qafaafananoo maasa aiqamausa aquafanna munnimmafa aiqama maasa uqauqa adianai marinau.

22 Maasa mi munnimmana fabaqa maasa qeeqaindi moo faqa fiqaramasee narana feefaurirara maree qumidaqa. Yafee moo fannoo

maasa uqakiaqa maasa narana feefauriafanna
munnimmana kafaa uqarinau fee.

²³ Miqi qimasoofoo Yooseefaana ainainasaa
rakisi maru faiqifa iriseenoo qinau. Doo innee
nifaaga quqaaqa. Sia rufia rufia iaqa. Inni
Anutufa inni nikoona Anutufa mifa kai inni
munnimma inni uqaki rinau. Doo qinee inni
munnimma mareeqa. Mifa miqi qimaseenoo
Simeeonna karabusaki maruna iduku eeqeenoo
misaki quqanau.

²⁴ Quqaseenoo misa nifiqa mareenoo
Yooseefaana maaqaki munu quqaseenoo
nammari nimufaqa niku nammari uqusee
mariqau. Misa doonkiuqa faqa narana nimufaqa
naqau.

²⁵ Miqimmasee misa nári maree qumu ainain-
ausa Yooseefaafa suani qambaana anirainaqa
amiraree qimasee deedaqiau. Yooseefaafa
suani qambaana inni faqa narana naanauranoo
fee qimasee qimannimunara irisee deedaqiau.

²⁶ Yooseefaafa maaqai aniroofaqa misa nári
maaqaindari maree qumu ainainausa mara
maree maaqaki mifa marunnai ooruree mina
oorinni noorindari maqasaa aqufiqau.

²⁷ Miqimmasoofoo Yooseefaafa misara amiqi
fee masee maridee qimasee iramirinau. Inneeqa
nikoona nauraiqiara qima qimufaqa iriafanafa
maqee kaqi fee maridanoo fee.

²⁸ Qufaqa misa iriseeqa qiqau. Eeoo ani ure-
eqara ainainira faiqi maasa qikoofa kaqi mari-
danoo. Miqi qimaseeqa misa kafaa Yooseefaana
oorinni noorindari maqasaa aqufiqau.

29 Miqimmasoofanoo Yooseefaafa narí akaqa Beensaminna qafamaseenoo qinau. Maana inneeqa nikaqara qima qimufaqa iriafanafee. Qimaseenoo Yooseefaafa qinau. Qini qimaaku Anutufa ani amiqi amiqimma amaqaani.

30 Miqi qimaseenoo kai kaqi findifufanoo quqasee finau. Mina amuqusa firaqoo narí akaqara mandaikufanoo finau. Yooseefaafa misa nifusaa iki raqaaqaa ufanoo quqasee narí faiqee maru rummanai oonuree iki raqanau.

31 Iki raqeeseenoo nammarinnnai aukunu nammari uquseenoo narí aukunu afeekaika mandeenoo doo misunnai qumureenoo narí suqee maruna qimaminau. Doo narana rak-
iqaannee qinau.

32 Miqi qufanoo suqee marufa narana naadu naadu rakiqanau. Yooseefaana aaduma teeboorasaa rakiqa amaqanau. Kafaa mina afasausa mara naaduma teeboorasaa rakiqa nimaqanau. Isipa maqannaasa minaki nee marusa naaduma moo teeboorasaa rakiqa nimaqanau. Isipa maqannaasa Qeeburu maqannaasa faqa narana narara nikooqee marusa marunara naadu naadu naqau.

33 Yooseefaafa narí narana suqee maru faiqina qumee kai qimamufanoo mi faiqifa misa nifasaana indaaruu mara ooqu mara amaqaaseenoo mina aanaaqiannaana mina muqufi ooqu mara amaqaasee miqimmamaree inaaqiana nikaqa fanoo atinni ooqu marinau. Misa nári ooqufaaqee-una qafamasee tautumasee narí qafee narí qafee iqau.

³⁴ Yooseefaafa narí qufanoo mina difaanikinaa narana mareeqaida misa piritakiaqa quqa mareenoo Beensaminnaindiki fiqaramasee moodaannai qisauku 5 kari narana quqanau. Quqasoofaqa narana faqa uainna nammari faqa neeneesoofanoo doo nifaaqa iduku fufaqa qufaina qiqa asasiqau.

44

Yooseefaafa narí kaafara randoo ufafa.

¹ Namasoofanoo Yooseefaafa narí maaqakinaa ainainasaa rakisi maru fasiqana qimaminoo qinau. Anee misa uqa maraseenana minakiaqa narana uqa ruma qumbiqasainaqa maree fuaqa. Moo uqa sia apeequniani. Amana kai marinaqa maree fuaqa. Misa munnimma faqa narana feefauriana nariqa uqa adianai rumasainaqa maree ooru fuaqa.

² Miqidana inaaqiannaana uqakina narí munnimma narana feefaurina namufaqa qini siruaa kaafa faqa mina uqa adianai rua. Miqi qimasoofanoo mifa qimamundee inau.

³ Kananaana keekoo qufaqa doo misa narí doonkiuqa namufaqa niqiqoofaqa oorufiqau.

⁴ Doo mareeqa kaqi kaaqoo maqusa quqasee nianai fufanoo Yooseefaafa narí ainainasaa rakisi maru faiqina aiqeenoo qinau. Anee kai kaqi misa ninaaqianna fua fidana oonu misa rafaqafusee maqi qimasee qimannimia. Innee naqi fee ifaqee qinee amiqimma nimaqaunnana akiqara mandaikamma qimaqee fee. Miqi qimasee qimannimia.

⁵ Nanaree innee qini uriqararana kaafa qumuari fee, mifa minaki kai nammari neemarina. Mifa minaki afunee qafeemari kaafana qummuariafanoo, innee manda ainaina uqanna auqaafanoo fee qia.

⁶ Miqi qimasoofanoo mina ainainira faiqi fanoo iriseenoo nifaqee finau. Misa oonu paquri mandeenoo Yooseefaana ufa kai misa qimanniminau.

⁷ Qimannimisoofaqa misa qiqau. Oo uriqararafa maasa ani ufa oosanara randaidaqa. Sia uqanna maasaki maaqira manda oosana maridanoo.

⁸ Maasa ooqai indaaruu narana feefauriafanna munnimmafa maasa uqaki maruna mina maasa sia qumuariqa mina Kannaana maqusaindari mara maree kafa muqu ani amiqa. Maasa miqi marausa maridaqa naqi maseeqee ani uriqararana maaqakinaa siruaa faqa kooru faqa maraanaaree.

⁹ Anee maasa uqa kiaqa randasee qafa. Yana uqakiffee mi ainainafa mariannoo fee doo mifa kai kuquannoo, maasa ani ainainira faiqi kamambi marianaurea.

¹⁰ Yooseefaana ainainira fasiqa fannoo misa ufa iriseenoo qima niminau. Doo amana inni ufa mau kai fuanaura. Ya fasiqana uqaki fee marinafa mifa kai qini ainainira faiqi mariannoo. Innee aiqama nimaqa fifaranoo.

¹¹ Miqi qimasoofaqa misa kai kaqi nári uqauqa afiqu maqasaa quqasee idukiqau.

¹² Yooseefaana ainainasaa rakisirafa indaaruaanaindi naaree qafamaseenoo miqooqaraanaindiki miqoo qafamaseenoo

kafa miqoo qaraanaindiki qafamaseenoo miqi kai mamaree aiqamausa uqakiaqa amiqimmasee qafanoo finau. Miqi mamareenoo misa ninaaqiannaana Beensammina uqaki qafoofanoo kaafa minaki marinau.

¹³ Beensaminnana uqaki paquri masoofaqa mina afasausa mara aiqamausa nimuqusufaqa nári qamunna aiqamausa rakeekaa iqau. Miqooqari nári ainaina doonkisaa quqasee oonu quandakufaqa maqusai aniqau.

¹⁴ Yudafa narí auna akaqa faqa Yooseefaana maaqai oonuree qafoofanoo Yooseefaafa kaqi maaqaki marinau. Marufaqa misa anireeqa noorindari maqasaa aqufiqau.

¹⁵ Aqufuma fufanoo Yooseefaafa qinau. Innee naqi fee ifee. Innee sia fee iridee, qinee maaqira uriqararausa qeeqa afuneenoo inni ummuarirana paquriranara, sia fee irifee.

¹⁶ Miqi qimasoofanoo Yudafa qinau. Oo uriqararafa maasa nana ufa fee ani qimamianau-ree. Maasa naqi mandee fee maasa qeeqa an-deeqaranara qianauree. Anee maasa kikiqa qusimariannana naqimmasee fee qaoo qianauree. Anutufa maasa aaqarana koorooinoo. Sia kaafa maraifa kai ani ainainira faiqi mariannoo, maasa aiqamausa ani ainainira faiqi marianaura.

¹⁷ Miqi qimasoofanoo Yooseefaafa nariqa qimanniminoos qinau. Oo sia uqanna qinee miqianaورانoo. Kaafa maraifa kai qini ainainira faiqi kiannoo. Innee akaqausa nimaqa ooruree ineeqa nikoona qimamiaqa.

Yudafa Beensaminna amaaqa maqarariu ufafa.

18 Yudafa Yooseefaafa maruqoo oorureenoo qimaminoo qinau. Oo uriqararafa, anee qiniara eedoo qinaqa ani faqa qifaaqa quqasee ufa qia. Anee sia qiniara aanoo qia. Anee Faraona miqirafa mariananoo, uriqararafa mariananoo.

19 Oo uriqararafa, ooqai maasa umuraafanana anee maasa iramirinana inni nikoofa maridanoo fee inni nikaqa maridanoo fee qinau.

20 Miqi qunaqa maasa maaqi qimasee aninna qimamiqiafana. Maasa qikoofa asooqa maridanoo. Maasa qikaqa faqa maridanoo. Mifa asooqa namuki mi faiqina maqeenoo. Mi faiqina afasaafa kuqufufanoo nariara marifanoo maasa qikoofa kaaqa minara amuqusidanoo.

21 Maasa miqi qimasee indaaru ani qimamiqiafana. Uriqararafa anee maasara afiqee muqusaifaqa qafaanee qinau.

22 Miqi qunaqa maasa maaqi qimasee aninna qimamiqiafana. Oo mi faiqifa sia amana nari akoona quqaannoo. Mina faiqi fannoo miqinanoo mina akoofa kuquannoo fee qiqiafana.

23 Maasa miqi qimasee ani qimamiqiafana anee maaqi qinau. Innee inneeqa nikaqa sia afiqee qumiqa sia qini qifusaa anifaranoo fee qinau.

24 Maasa ani ufa iriseeqa qeeqa qikoo finnai oonuree anee qunna ufana qimamiqiafana.

25 Qimamiseeqa mariafananoo maasa qikoofa maasara kaifaa ooqu narana feefauriaqee qiqau.

26 Miqi qufaqa maasa maaqi qimasee nari qimamiqiafana. Maasa qikaqa ooqu finaqa maasa ooqu fuanaura. Sia maasa qeeqaraa uriqararana afusaa ooqu fuanaura.

27 Miqi qufanoo maasa qikoofa maaqi qimasee maasa qima qiminau. Innee irimmari-afanoo qini qinaaqa Raseera nammarifa qini faiqi qaaraqanda kai maqanau.

28 Moo fannoo fifufaqa qinee minara kaasau aandau fannoo qini faiqi arusee rakeekaamma namaseefoo qiqaafana. Mi fasannai sia kafaa mina qafeeqa. Doo mifa taikafinau.

29 Innee maana qinee unnannaindaraana afiqee fifanoo moo ainaina mina afaaqai kambiqainaqa qini minara qimudao qirafa asooqa marunnaqoo qini daruannoo fee qinau.

30 Yudafa Yooseefaana kaifaa qimamidano qinau. Maasa qeeqa qikaqa quqaseeqa oonu-raanano maasa qikoofa maasa qiqaamaseenoo doo nari faiqiara amuqusinano kuquannoo.

31 Maasa qikoona amuqusirafa firaqoo maa faiqinaki maridano. Mifa asooqa uqanna maridano maasa maaqaamma saanano mi ummaarafa mina kuqa aruannoo.

32 Qinee qeeqa qikoona maaqi qimasee qimami qiafana. Qinee qeeqa qikaqa akiiqara ummaara maraanauree qiqaafana. Qinee sia mina afiqee uriqa ani nifairira ufa qinee maraanaurano fee qiqaafana.

33 Miqi qimasee qinee qeeqa qikoona qimamiqiafana. Maqee qinee qeeqa qikaqa amaaqa maqeeqa ani ainainira faiqi kianano qini qikaqa fannoo nari afasausa faqa ooru fuan-
noo.

34 Qinee naqimmasee fee maa faiqifa sia qini faqa ooru finaqa qeeqaraa qeeqa qikoo finnai

ooru fuanauree. Qini qikoofa manda um-
maara marinaqa qafaananoo sia amiqiannoo,
mandaikammianoo.

45

Yooseefaafa nariara kooroou ufafa.

¹ Yooseefaana aundura dapikufanoo nari
ainainira fasiqauqa nifusaa ikiraqararusia
minnisee sia amanaikufanoo niqi qamasoofaqa
madaanai fiqau. Fifufanoo Yooseefaafa nari
ainaina faqa kai maridanoo qimannimianu.
Qinee inni nikaqa Yooseefaasa maridaqa.

² Yooseefaafa firaqoo iki raqaida qufaqa Isipa
maqannaasa madaanai maridaqa iriseeqa oonu
Faraona qimamiqau.

³ Yooseefaafa nari afasausa mara maaqi qi-
masee qimannimianu. Qinee maana Yooseefaasa
maridaa. Kuqaa fee qini qikoofa kaqi fee mari-
danoo fee. Miqi qufaqa mina afasausa mara
tautu maseeqa naaquqoofaqa sia ufa qiqa.

⁴ Yooseefaafa kafaa qimannimino qinuu. Doo
inne qini daaqa aniaqee qufaqa misa mina aqa
aniroofanoo kafaa qimannimino qinuu. Qinee
inni nikaqa mariafanaqa inne feefauruara ma-
maree qini quqasoofofa qini qifiqamaree Isipa
maqa maaqaki ainainira faiqi kamma qisaqau.

⁵ Doo maqee inne sia qini qimu oosannara
inneeqa kikiqusifanoo nimuqusiani. Anutufa
kai qini diiqoofaqa inne kuqi foora indaarunni
kamma nimaqasee inni dadaaqianeera qufaqa
qumiqiafana.

⁶ Firaa aandaroo narirafa maa maqanasaa qaara aukuana marasee aiqaraifanoo moodaannai qisauku aukuana kaqi maridanoo. Mi kamuqoo fuka narana ummaqirafa faqa unakirafa faqa sia mariannoo.

⁷ Anutufa kai qini mareeqee inni indaarunni kamma saifaqa inni asumu marasainaqa sia kuquaqeera, mi mookira oosannananai kuqaa mifa inni faqa inni niku nisauku faqa marasainaqa asumu marifaranoo.

⁸ Minara sia innee fau qini diiqoofaqau maa maqa maaqanaki ani maridaqa. Anutufa diiqoofaqa ani maridaqa. Mifa kai qini mareeqee Faraona oofisaauqa uriqarausaikamma qaifaqa maridaqa. Miqimmasaifaqa qinee mina aiqama maqa maaqasaa rakisirausa maridaqa. Aiqama Isipa maqa maaqasaa rakisirausa maridaqa.

⁹ Innee kai kaqi qini qikoo finnai ooruree ani amaaku Yoosefaafa maaqi qinoofee qimasee qimamiaqa. Anutufa qini mareeqeenoo aiqama Isipa maqa maaqasaa rakisira faika maqaifaqa maridaqa. Sia kisaqaasaa maria, kai kaqi qinee unnannai qumua.

¹⁰ Anee faqa aneenna faiqi namu faqa aneenna anaiqi mara faqa inneeqa sipsipa faqa inneeqa mimmiuqa faqa inneeqa burimakau faqa inneeqa aiqama ainaina faqa indaa mamaree qumuraifaqa Kooseena maqa nimianaqa qini daaqa mariaqa.

¹¹ Innee Kooseena maqa maaqaki innisaa rakisianaura. Moodaannai qisauku aukuana kaqi maridanoo, mi aukuana namunaki aandaroo ida mariannoo. Innee faqa ineeqa faiqi anaasee faqa

inneeqa aandauqa faqa naararaina kuqifoora qikooqaidanoo.

¹² Yooseefaafa kaifaa narí afausa mara qima nimidanoo qinau. Innee nifu maqasee qini qiqafaaqa sia moosau maridau qinee Yooseefaasa uqanna maridaqa. Doo qini qikaqa Beensaminnafa mifa faqa qini qiqafaani.

¹³ Qinee Isipa maqasaa firaqoo uriqararusa marunnanara qini qikoona qimamiaqa. Aiqama ainaina qafaanara faqa qimamiaqa. Qimamiseeqa doo dauni dauni afigee mai qumuaqa.

¹⁴ Miqi qimaseenoo narí akaqa Beensaminna oonu mafi anukaki difaa difamma qumareenoo iki raqoofanoo Beensaminnafa faqa iki raqanau.

¹⁵ Yooseefafa quandaku fanoo narí afausa mara aiqamausa nimooqaseenoo naiki raqanau. Naiki raqasoofaqa mina afausa mara mina faqa ufa qiqau.

¹⁶ Isipa maqannaasa misa miqi unara oonu Faraona qimamisoofanoo Faraofa faqa mina uriqararusa faqa iriseeqa اساسمميڤا.

¹⁷ Faraofa Yooseefaana maaqi qimasee qimaminoo qinau. Anee maaqi qimasee aneenna afausa qimanniminaqa nári ummaara doonkisaa mara quqasaifaqa maree Kannaana maqusai ooru fuaqa.

¹⁸ Miqoo oorureeqa nári nikoona faqa nári faiqi anaasee faqa nifiqee mai qumuaqa. Qumuraifaqa Isipa maqa maaqaki qafamasee amiqira maqa nimianaqa miqoo narana fiqaranoo moomoo marinaqa marifaranoo.

19 Faraofa kafaa Yooseefaana qimaminau. Anee qinee ufa qunnana qimanniminaqa Isipa maqusaindari qoosa rarisee mari karausa faqa daraiwaa faqa mara maree ooru fuaqa. Minakina nári ninaaqmaaka faqa nári faiqi aanaaqiuqa faqa nári nikoona faqa mara quqasai ooqu mari-fiqa qumuaqa.

20 Misa sia nári umiasana aina mafi quqasee quminnanara oonu mafi iriaqa. Isipa maqa maaqa amiqirafa aiqama misaindakammianoo.

21 Yakooboona amaaku mara Faraofa qimannimundee kai iqau. Yooseefaafa Faraona ufa iriseenoo qoosa rarisee maru karausa mara quqasoofaqa daraiwaa namu faqa aatata neefandinna narana faqa nimufaqa maree ooru fiqau.

22 Yooseefaafa narí afasausa mara qamunna moodaa kai moodaa kai nimana nimana kai nimirau. Beensaminna moodaanai qisauku qamunna faqa siruaa munnimma 300 faqa aminau.

23 Yooseefaafa Isipa maqannaa amiqira ainaina suquseenoo qisauku qara taikasee doonkisaa oorufusasaa amaqoofaqa mara maree muru mina akoona amiqau. Kafaa aatata qumidanoo naaninna narana sakumana faqa feemu faqa narana oosana oosana faqa anaasee doonki qisauku qara taikaseesaa oorufusasaa quqasoofaqa maree ooru fiqau.

24 Yooseefaafa narí afasausa mara Kannaana maqusai niqamasoofaqa fufanoo qima niminoo qinau. Innee aatata fidaqa sia qiniara qimasaida narí aqi narí aqiqa fuaqa.

25 Misa Isipa maqa maaqa quqasee nimaqa

nári nikoofa Yakooboofa marunnai Kannaana maqa maaqai ooru fiqau.

²⁶ Ooruree nári nikoona qimamiqau. Yooseefaafa sia kuqinoo kaqi maridanoo, misa miqi qimasee nári nikoona qimamiqau. Mifa Isipa maqannaa aiqamausa uriqarafa maridanoo fee qiqau. Yakooboofa mi ufana irufanoo amuqusa kaqinnaindari ufanoo misa ufara sia kuqaa fee qinau.

²⁷ Yooseefaafa qimannimu ufausa nári nikoona qimami marufanoo Yakooboofa qafoofanoo qoosa rarisee maru karausa Yooseefaafa quqasoosa Yakooboona afiqee Isipa maqa maaqai ooqu firara ururaqau. Yakooboofa mi karausa qafoofanoo aundura idukinau.

²⁸ Idukufanoo qinau. Qini qimaaku Yooseefaafa kaqi maridanoo. (Qinee kaqi maridaqa ooqu mina qafarafa mifa kai aiqama ainaina arusee uriqararafa maridanoo.) Qinee ooqu mina qafamasee kuquanauree qinau.

46

Yakooboofa narí aiku asauku faqa Isipa maqusai ooqu fu ufafa.

¹ Yakooboofa narí ainaina indaaii mareenoo Beeraseeba maqusai ooqureenoo miqoo narí akoona Isakeena Anutuna aandau tatufirana suqaminau.

² Miqoo eendaki faiqaqee ufanoo Anutufa qainasaa afu nareenoo qinau. Yakooboo Yakooboo qufanoo Yakooboofa maqi qimaseenoo qinau qinee maaqoo maridaqa.

³ Qufanoo Anutufa qimaminoo qinau. Qinee Anutusa ani akoona Anutusa maridaqa. Aneesia Isipa maqasaa ooqu firaranara rufiaa. Mi maqanasaa ooqu marinaqa ani aiku asauku firaa maqanaasaikamma nisaanaura.

⁴ Qinee ani faqa Isipa maqasaa ooqu fuanaura. Yooseefaafa ani faqa Isipa maqa maaqaki mari-nana mariinana kuqinnaranoo. Mariinaqa kasoogee kafaa ani aiku asauku mareegee kafaa Kannaana maqasaa quqaanaura.

⁵ Beeraseeba maqusa Yakooboofa quqasee Kannaana maqa maaqai ooqufinau. Mina faiqi namu Yakooboona faqa nari faiqi aanaaqiuqa faqa nari ninaaqmaaka faqa mareegee qoosa rarisee maru karana Isipa maqanna karaambaiqa Faraofa nimaqoonasaa quqasee nifigee ooqufiqau.

⁶ Misa nari aandau aina faqa nariqa umiasana faqa Kanna maqasaa maridaqa maqeeiunauqa aiqama maree ooqu fiqau. Yakooboofa nari aiku asauku aiqama nifigee ooqu finau.

⁷ Yakooboofa nari faiqi namu faqa nari anaiqi mara akoonaiqiuqa faqa nari araamuqmaaka faqa nari anaiqi mara maanaaqauqa faqa aiqama nifigee ooqu finau.

⁸ Yakooboona faiqi namu Isipa maqasaa ooqu fusa maaqi miqa mariqau. Yakooboona ooqa faiqi Reeubeenafa marinau.

⁹ Reeubeena faiqi namu Qanookafa faqa Parufa faqa Qeeseeroonafa faqa Karamifa faqa mariqau.

¹⁰ Simeeona faiqi namu Yeemueerafa faqa Yaminafa faqa Ooqadafa faqa Yakifa faqa Sooqarafa faqa mariqau, misa aiqamausa

moodaa anaasee faiqi namu mariqau. Moo anaasee faiqi Saurafa marinau. Mina anoofa Kannaana maqannaa anaasee marinau.

¹¹ Reefina faiqi namu Keerasoonafa faqa Kooqafa faqa Meerarifa faqa mariqau.

¹² Yudaana faiqi namu Seeraafa faqa Peeresafa faqa Siraafa faqa mariqau. Yudaana faiqi qaaraqanda Eerafa faqa Oonanafa faqa mariiufaqa Oonanafa Kannaana maqasaa kuqinau. Peeresana faiqi qara Qeesaroonafa faqa Qamurafa faqa mariqau.

¹³ Isakarana faiqi namu Toorafa faqa Puaafa faqa Yasubafa faqa Simaroonafa faqa mariqau.

¹⁴ Seeburuna faiqi namu Seereedafa faqa Eeroonafa faqa Yareerafa faqa mariqau.

¹⁵ Miqimmaseenoo Reea nammarifa Yakoo-boona faiqi namu Meesapotamia maqusai mardanoo maqanau. Maanaaqa moodaa auqu Dinnaa nammarifa mina faqa miqoo maqanau. Doo Reea nammarina faiqi namu maanaaqa akoonaiqi aiqamausa 33 mariqau.

¹⁶ Kadana faiqi namu Seefoonaa faqa Qakifa faqa Sunifa faqa Eesaboonafa faqa Eerifa faqa Aroodifa faqa Areerifa faqa mariqau.

¹⁷ Aseerana faiqi namu Iminaafa faqa Isauaafa faqa Isififa faqa Beeriaafa faqa misa nisookifa Seera nammarifa faqa mariqau. Beeriaana amaaku qara Qeebeerafa faqa Marakieerafa faqa mariqau.

¹⁸ Doo miqimmasee Yakoo-boona aiku asauku 16 nári ainainira maanaaqa Rabanafa Reea nammarina amuna Siripaa nammarinasaa maqanau.

19 Yakooboona anaaqa Raseera nammarifa faiqi qaaraqanda maqanau. Yooseefaafa faqa Beensaminnafa faqa mariqau.

20 Yooseefaana faiqiqara qaaraqanda Isipa maqasaa kambiqaqau. Miqanda nuqu Mannaseefa faqa Eefaraimmafa faqa mariqau. Miqanda ninoofa Aseenata nammarifa marinau. Aseenata nammarina akoona auqu Pootifeerafa marinau. Mi fasiqafa Qeerioporisa maqannaa amaana maqasaa rakisi marufa marinau.

21 Beenasaminna faiqi namu maaqimmiqa mariqau. Beerafa faqa Beekeerafa faqa Asabeerafa faqa Keerafa faqa Naamanafa faqa Eeqifa faqa Roosafa faqa Mupimafa faqa Qupimafa faqa Aratafa faqa mariqau.

22 Doo miqimmasee 14 Yakooboona aiku asauku Raseera nammarinasaa qari kambiqaqau. (Rabanafa Biriqaa nammarina nari ainainira maanaaqa Raseera nammarina nari araamuna amufanoo mifa mareeqeenoo nari afaaqi Yakooboona amufanoo faiqi maaqi mandee maqanau.)

23 Biriqaa nammarina indaruqaa faiqi Dannafa marinau. Dannana faiqi moodaa marinau mina auqu Qusimafa marinau.

24 Biriqaa nammarina faiqi moo Nafatarifa marinau. Nafatarina faiqi namu maaqi miqa mariqau. Yaqaseerafa faqa Kunifa faqa Yeeseerafa faqa Sireemafa faqa mariqau.

25 Doo miqimmasee Yakooboona aiku asauku 7 nari ainainira manaqa Rabanafa Raseera nammarina amunasaa Biriqaa nammarinasaa maqanau.

26 Yakooboona aiku asauku uqanna Isipa maqasaa oofufusaa aiqama moodaanaki 66 mariqau. Misa ninaakuqmaaka sia nisaanariqa.

27 Yooseefaana faiqi gara Isipa maqasaa kam-biqaqau. Miqanda faqa Yooseefaana faqa Yakooboona faqa moodaanaki ootupamasee 70 fasiqa ooqu fiqau.

Yakooboofa narí aiku asauku faqa Isipa maqsai maru ufafa.

28 Yakooboofa Yudana aiqoofanoo indaaru ooqu Yooseefaana qimaminanoo Kooseena maqasaa misa paquriani feera aiqanau.

29 Yooseefaafa narí qoosa rarisee maru karanaki akarama fufanoo Kooseena maqa maaqai narí akoona paqurirara finau. Oonu paqurimmaseenoo Yooseefaafa narí akoona anukaki oonu mafi kaqaramma umareenoo kisaaqasaa iki raqee marinau.

30 Iki raqee marufanoo Yakooboofa Yooseefaana qimaminoo qinau. Doo qinee kuqiraridaqa qinee maqee ani qafeeqa anee sia kuqina mariana kaqi mariana.

31 Yooseefaafa iki raqaseenoo narí afausa mara faqa narí akoona aiku asauku aiqama faqa qimanniminoo qinau. Qinee Faraofa mariqoo ooruree inniara qimamiana. Qini qikoofa faqa qini qifasausa faqa Kannaana maqusaindari qinee marunnannai qumureeaa maqi qiana.ura.

32 Qinee inniara sipsipasaa rakisi mariasa maridaqa nariqa sipsipa faqa burimakau faqa nariqa aiqama ainaina faqa maree qumiaa maqi qimasee qimamiana.ura.

³³ Qinee miqi qimasee qimamisaananoo Faraofa inni naaramasee innee ainaini marianara irainaqa maaqi qimasee qimamiaqa.

³⁴ Oo maasa uriqararafa maasa qikeeku qikaaku ooqai sipsipa kai rakisi marusa marufaqa maasa faqa maqee minasaa kai rakisidaqa. Innee miqi qimasee Faraona qimamifanoo mifa Kooseena maqa inni nimiannoo. Isipa maqannaasa sipsipa rakisiranara nikoo uqanna qaidanoo. Minara inni naaduma saa Kooseena maqa nimiannoo.

47

¹ Yooseefaafa narí afasausa moodaannai qisauku namu nifiqeenoo Faraoo fuqoo ooru finau. Oorureenoo qimaminoo qinau. Oo Faraoo qini qikoofa faqa qini qifasausa faqa Kannaana maqusaindari nári sipsipa burimakau aiqama faqa nári ainaina faqa maree qumidaqa. Maqee misa Kooseena maqasaa qumu maridaqa.

² Miqi qimasee narí afasausa mara Faraona oorinni murusoofanoo niqafanau.

³ Faraofa Yooseefaana ufa iriseenoo mina afasausa mara iramirinoo qinau. Innee nana ainaini mariasee. Miqi qufaqa misa iriseeqa qiqau. Uriqararafa, maasa sipsipasaa rakisira ainaina imarunausa maridaqa. Maasa qikeeku qikaaku auqeeu saikana kai maasa faqa maraidaqa.

⁴ Aandaroo firaafa uqanna Kannaana maqasaa darifanoo maasa sipsipauqa nara andanda sia marifaqa maasa maa maqa maaqanaki marirara

umidaqa. Amanee eedoo qirana qiminaqa maasa
Kooseena maqa maaqaki marianauree.

⁵ Faraofa misa ufa iriseenoo Yooseefaana
qimaminoo qinau. Doo ani akoofa faqa ani
afasausa faqa ani faqa mariraree qidee.

⁶ Isipa maqa maaqa misaindi maridanoo.
Sainaga Kooseena maqa maaqaki mariaqa.
Kooseena maqa maaqa amiqirafa maridanoo.
Ani afasausa kinaana moo qafainanoo sipsipa
burimakau amiqi mandee rakisi marinnana
mina mareeqeenana quqasainanoo mifa qini
sipsipa burimakausaa rakisiani.

⁷ Miqi qimasoofanoo Yooseefaafa nari akoona
afiqeenoo Faraoo fuqoo minisoofanoo Yakoo-
boofa miqoo anireenoo Faraona afaaqooqa qi-
mama qanau.

⁸ Miqi qimasoofanoo Faraofa Yakooboona
aukuanara iramirinau. Ani aukuaana naqummee
maridanoo fee qufanoo Yakooboofa qinau.

⁹ Qinee 130 aukuaana kai maa maqanasaa
maridaqa. Sia kisaagasaa fau qinee moomoo
ummaara paquriqa. Qini qikeeku qikaaku
kisaagasaa uqanna mariqau. Misa aukuaana fan-
noo qini aukuaana fiaqaranoo maridanoo.

¹⁰ Yakooboofa miqi qimaseenoo kafaa
Faraona afaaqooqa qimama qaseenoo doo
raudamaki finau.

¹¹ Yooseefaafa nari afasausa mara faqa nari
akoona faqa Faraofa uqoo Isipa maqa maqaki
Rameeseesa maqusa aaqa soofaqa mariqau.

¹² Miqiga miqoo marufanoo Yooseefaafa nari
akoona faqa nari afasausa mara faqa nari akoona

aiku asauku marusa faqa kaaqa aanaaqi faiqiuqa faqa narana nimi marinau.

Aandaroo firaafa Isipa maqannaasa naru ufafa.

¹³ Aandaroo firaafa uqanna imarufanoo sia uqanna aiqama tinai narana marinau. Isipa maqannaasi fasiqa anaasee faqa Kannaana maqannaasi fasiqa anaasee faqa naararoo faqa ummooquka iqa nimariqau.

¹⁴ Misa narana feefauri marufanoo Yooseefaafa mi munnimmana mara maree Faraoofa maruqoo munusee mina ami marinau.

¹⁵ Isipa maqannaasa faqa Kannaana maqannaasa faqa narana feefaurida aiqama nári munnimma taikaqau. Miqi maseeqa Isipa maqannaasa anireeqa Yooseefaana qimamiqa qiqau. Maasa munnimma doo taikaseeqa anee sia maasa afu kai qiqafaa kuquana faara narana niminaqa naa. Sia maasa narana qiminaqa maasa ani afusaa kuquanaura.

¹⁶ Misa miqi qufanoo Yooseefaafa maaqi qimasee nariqa qimanniminau. Inni munnimma taikainaqa innееeqa aandau aina maree mini qimidaqa narana mina akiqara maraqa.

¹⁷ Miqi qufaqa misa nariqa aandau aina Yooseefaana mini amufanoo misa qoosauqa faqa sipsipauqa faqa mimmiuqa faqa burimakauqa faqa doonkiuqa faqa mina akiqara narana nimimarinau. Doo mi aukuanna misa nári aandau aina akiqara Yooseefaafa narana nimi marinau.

¹⁸ Mi aukuanna taikoofaqa kafa moo aukuanaki Yooseefaafa fuqoo anireeqa maaqi qimasee

qimamiqau. Maasa naqi fee mandee moo ainaina ani afusaa kukeegaanauree, sia. Doo maasa munnimma taika fifaqa maasa aandau aina faqa anindika kai mambifaqa kaqi maridaqa. Sia ani amira ainaina moo marifaqa. Maasa qiqa qifaqa faqa maasa maqa faqa kai maasaki maridanoo.

¹⁹ Maasa ani afusaa kuquaqaa midaqa doo saina maasa qeeqa faiqi faqa maqa faqa mina kai amisaidaqa feefauru marasaidaqa narana naa. Miqimmaseeqa maasa qeeqa faqa Faraona anainira faiqi kakai iqa maria. Maasa moodaa ainainara kai iridaqa. Narana faqa narana asumu faqa nimaqa maasa qummaqa. Narana qummaquseeqa maasa sia kuqua.

²⁰ Yooseefaafa misa ufa iriseenoo aiqama Isipa maqa maaqa feefaurumma Faraona aminau. Aiqama Isipa maqannaasa aandaroo firaafa uqanna narunara nariqa maqa amisee feefauru marasee minannoo narana feefaurumma neemarufanoo aiqama maqa maaqa Faraonaindika minoo maarinau.

²¹ Miqi marufanoo Yooseefaafa Isipa maqa maaqa dinni atindari dinni atinni marusa maree-gee ainainira faiqika kai masanau.

²² Isipa maqannaamaa amaana maqasaa rakisir-ausa maqa kai Yooseefaafa sia feefaurinau. Faraoofa maqee maqee munnimma nimi maru-faqa narana feefaurummasaida neemarufaqa sia misa maqa feefauriqau.

²³ Yooseefaafa faiqi anaasee qimannimino qinau. Doo innee qafaidee qinee maqee inni faqa inniqa maqa faqa feefaurumma Faraona amiqa.

Maqee narana asumu nimianaqa inneeqa maqa Faraona amu maqanaki kafaa qummaquaqa.

²⁴ Narana anoona mambinaqa moodaaqoo unaku quqaseeqa aiqama moodaannai qisaukukinaana moodaa moodaa Faraona amisee akaqana inneeqa faiqi aanaaseera faqa asumuara faqa quqaaqa.

²⁵ Faiqi anaasee Yooseefaana maaqi qimasee qimamiqa qiqau. Oo Yooseefaafa anee aneenna kai maasa manda ainainasaa itita qisaananoo. Anee kai maasa amiqimma qisaananoo. Uriqararafa maasa amana Faraona ainainira faiqi mari-anaura.

²⁶ Miqoo qari Yooseefaafa afeeka sanda ufa quqanau. Mi sanda ufana oosana maaqi minoo maridanoo. Aiqaama Isipa maqa maaqakinaa narana unakusee moodaannai qisauku kinaana moodaa Faraona amiqa. Mi ufafa maqee kaqi afeekaikinoo maridanoo. Amaana maqasaa rakisi marusa maqa kai sia Faraonaindikinoo marinau.

Yakooboofa inaaqianna moodaa ufa iramirinau.

²⁷ Isaraee maqannaasa Isipa maqasaa Kooseena maqa maaqaki mariqau. Miqoo maridaqa moomoo ainaina faqaasa marufanoo misa faiqi namu faqa moomoo kambiqaaqa.

²⁸ Yakooboofa qisauku qara taikaseenoo qiku dinni taikaseenoo dinni oonu qaara maraseenoo 17 aukwana Isipa maqasaa marinau. Mina aukwana aiqama moodaanaki 147 aukwana marasee kuqinau.

²⁹ Mina kuqirafa adeedi rama fufanoo Yakoofoofa Yooseefaana aaramaseenoo qimaminau. Anee aneenna asauku qini qifundana ameemaanai quqaseenana sia Isipa maqasaa akundaanauranoofee qimasee qimafeekaikia.

³⁰ Qini qiqa qikausa mara nikundoonaki qikundaa. Qini Isipa maqasaaqari mara maree misa nikundooqoo qikundaa. Miqi qufanoo Yooseefaafa narí qimaminoo qinau. Anee qianandee mianaura.

³¹ Yooseefaafa narí akoona ufa iriseenoo eedoo qufanoo mina akoofa qinau. Saa sia kaqi eedoo qia, kuqaa qima afeekai kinana eedoo qia. Miqi qimasoofanoo kuqaa Yooseefaafa eedoo qima afeekai kinau. Qima afeekai kammasoofanoo Yakoofoofa narí qaarisaa ooqu marifi Anutunara dufi dufi qinau. Innaaru qimasoofanoo Yooseefaafa narí ainainai finau.

48

Yakoofoofa Eefaraimana faqa Mannaseena faqa nifaaqooqaqu ufafa.

¹ Kaqikaaqoo mari kufaqa misa Yooseefaana qimamiqau. Ani akoofa doo amiqimma auridanoo. Yooseefaafa mi ufana iriseenoo narí amaaku qara Mannaaseesa Eefaraimasa nindiqeenoo narí akoofunnai ooqu finau.

² Misa Yakoofoofa qimamiqau ani amaaku Yooseefaafa ani qafarara qumidanoo fee qufanoo Yakoofoofa afeekaikammasee findi fufanoo narí qaarisaa ooqu marinau.

³ Ooqu mari fufanoo Yakooboofa Yooseefaana qimaminoo qinau. Ooqai qinee Kannaana maqa maaqaki nuafannana kinai Rusa maqa maaqaki mariafananoo Anutufa aiqama afeeka faqaafa akooqoo kooroomma fufanoo qini qifaaqooqa qima qimaqanau.

⁴ Mifa maaqi qimasee qini qima qiminau. Qinee moomoo faiqi asumu amiana anisaaqari ani aruakinausa moomoo maqannaasaika mifaranoo. Qinee maa maqana ani aiku asauku nimiananoo naaru naaru misaindika minoo marianno.

⁵ Ani amaaku qara Isipa maqasaa kambiqara qanda qinee Kannaana maqasaa kaqi marunaqa kambiqaa qanda Mannaseesa Eefaraimasa qini faiqi qara Reeubeenasa Simeeoonasara foora marifaranoo.

⁶ Anee akaqa faiqi namu maqa sainausa misa anindika mambi marifara. Misa nari nifasaa qanda Mannaseesa Eefaraimasakinaa qumiasana ainaina maree faranoo.

⁷ Qinee ani anoona Raseera nammarinara iriqa miqi qidaqa. Mifa qini firaa qimudao qiranaki Kannaana maqa maaqaki kuqinau. Qinee Meesapootamia maqa maaqaindari ani mariafananoo aanai Eefarataa maqusa aqa kuqinau. Qinee mina iri Eefarata maqusai fimaru aanna afainni akundaqiafana. (Maqee Eefarataa maqusara Beedeeree maqusee qidaqa)

⁸ Yakooboofa miqi qimaseenoo Yooseefaana amaaku qara nindafeenoo qinau. Maaqanda yana faiqi qaree.

⁹ Qufanoo Yooseefaafa qinau. Qini faiqi

qara Anutufa Isipa maqasaa mariafananoo qimu qanda maridaqa. Yakooboofa mi ufana iriseenoo qinau. Doo miqanda nifiqee mai qinee unnaqoo adeedi minisainaqa nifaaqooqa qima nimaqaa.

¹⁰ Yakooboofa nauraiqi marunara sia amiqimmasee afu maqee marinau. Yooseefaafa narí amaakuqara minisoofanoo oonu mafi kaqaramma qumareenoo nimooqanau.

¹¹ Nimooqa namasee Yakooboofa Yooseefaana qimaminoo qinau. Qinee sia kaifaa ani qafaanau-ree qunanoo Anutufa kai qifaqa ani faiqi namu niqafaidaqa.

¹² Miqi qimasoofanoo Yooseefaafa narí akoona afundana saaqaraana narí faiqi qara qumaree-geenoo narí akoona afunni oorindari maqasaa aqufinau.

¹³ Yooseefaafa narí akoona afusaa kummarama fufanoo Eefaraimana mara munu Yakooboona asaaqai quqaseenoo Mannaseena mina asaukuannai quqanau.

¹⁴ Quqasoofanoo Yakooboofa asauku qara fiqaree aiqaree mambufanoo akaqa Eefaraimana saa asauku uqannai quqeenoo afasaana Mannaseena saa asaaqai asauku quqanau.

¹⁵ Miqi mandeenoo Yooseefaana afaaqooqa qimamaqeenoo qinau.

Qini qikausa mara Abaraqaamma faqa Isakeena faqa nikoofa Anutufa maa faiqisa amiqi amiqimma nimaqaani. Qini qifiqamaree maaqoo maqee miniqaiifaqa marunna Anutufa misa amiqi amiqimma nimaqaani.

16 Qini oosana oosana madainaina kinaana itita qimaqoo qangiroofa misa amiqi amiqimma nimaqaani.

Qini duqu faqa qini qikooqanda Abaraqaammaasa Isakeesa nuqu faqa maa faiqi qandasaa mariani.

Miqanda moomoo faiqi maqasaifanoo moomoo miqanda kiqari kambiqafi mariaqa.

17 Yooseefaafa narí akoona asauku qafooфанoo aundura mandai kufanoo narí akoona asauku qumareenoo afasaanasaa asaaqai asauku quqaqoona mareeqee akaqasaa quqasee akaqasaa asaukuannai asauku quqaqoona mareeqee afasaanasaa quqarara qinau.

18 Oo qipoo anee sia andeeqaananoo indaarugaafa mai maridanoo aneenna asauku uqannai asauku mina akiiqasaa quqaaqaana.

19 Miqi qufanoo mina akoofa qaoo qida qinau. Qini qimaaku qinee iridaqa miqidaqa. Indaarugaafa mifa faqa mina aiku asauku moomoo marifaranoo. Inaaqiannaana aiku asaukuqa firaa afeeka maqannaauqanna marifaranoo narí afasaana ooraaqaranoo mariannoo.

20 Miqi qimaseenoo mi faasaanna nifaaqooqa qima nimaqeenoo qinau.

Isaraee maqannaasa nifaaqooqa qiqa anisaa qimasaida qifaranoo.

Misa maaqi qifaranoo Anutufa Eefaraimmana faqa Mannaseena undeemma amaqaani. Miqunannai Yakooboofa Eefaraimmana uqeerasee Mannaseena rafaqa finau.

21 Miqi qimaseenoo Yakooboofa Yooseefaana qimamiinoo qinau. Qinee kuqirara midaqa Anutufa

ani faqa maridanoo ani afiqee aninna akeeku akaaku maqasaa ooru fuannoo.

²² Seekeemma maqa maaqa amiqirafa maridanoo. Qinee ooqai qeeqa duru feefannoo Amoorra maqannaasa faqa rakusee maraafanna maqana ani amianauro sia ani akaqaa fasaauqa nimianauro.

49

Yakooboofa narí aiku asauku taikara qafaaqooqa qimannimu ufafa.

¹ Yakooboofa narí faiqi namu naaramaseenoo qima niminau. Innee aiqama maaqoo aniraifaqa kasooaqee inni kina kambiqaaninna ainainara qima nimiana iriaqa.

² Innee qini Yakooboosa faiqi namu innee qini fiqqu fiqqu mambifaqa inneeqa nikausa qini Israaerasa ufa iriaqa.

³ Reeubeenafa anee qini ooqa faiqi mariananoo.

Anee qini afeeka indaarugaafa mariananoo.

Anee aiqama qini faiqi namu kiqari uriqararafa kaaqa afeekaiki marianafa mariananoo.

⁴ Anee nammari afinddee imarianafa kaaqa afeekaiki marianafa mariananoo.

Anee sia uriqarana marinnaranoo.

Anee qini qaarisa qini ainainira anaasee sakasee faiqaannanara miqinnaranoo.

⁵ Simeeonasa Reefisa innee qara moodaa fidika mariafanoo.

Innee qara inneeqa rakira duru saamunnoo faiqi mandaikamma nimaqaqau.

⁶ Qini irirafa sia misa kukeeqara ufaki ootupanoo maridanoo.

Qinee sia miqanda ufa suqiranaki marianaura.
Misa nirana qoofaqa faiqí anaasee narusee
miqooqari nasuridaqa burimakau
akoonauqa naununu ateeqaqau.

⁷ Innigara aannoo qiranasaa niqirafa mariannoo.
Innee kaqi fifau nárí marianara minara niqirafa
mariannoo.

Isaraee maqa maaqakina innigara faiqi namu
furufaramambuaqa.

⁸ Yakooboofa miqanda nifaaqooqa qimaseenoo
quandafinoo Yudana afaaqooqa qinau.

Yuda, ani akaqaafasaa ani amooqifara.
Anee aneenna namuqaa ninukasaa reenana
rafaaqa finafa mariananoo.

Ani akoona faiqi namu ani oorinni niqoori saunu
areefaranoo.

⁹ Yuda anee kaasau aandaura foora faiqí nárí
marianafa mariananoo.

Anee firaa kaasau ainaina mariana, anee aandau
arusee namasee faiqaqee inanoo moo fan-
noo sia ani afauriannoo, rufiaannoo.

¹⁰ Yudafa karaambaiqa duru feefa uaqeeiannoo.
Minasaa ani aruakinausa uriqaraqa maridaqa
rakisi nimaqeeefaranoo.

Mifa uriqarara auqu marasee rakisi nimaqanoo
fifiinoo Siroo maqusaki oonuraannoo.

Miqoo maridanoo aiqama maqannaasa mina
ameemaanai marifanoo rakisinnimaqaan-
noo

mina aiku oosana maridaqa mina ufa mau kai
fifaranoo.

11 Mifa narí doonki timmusa uainna sandasaa rumbeenoo.

Uainnauqakiqari kaaqa amiqiranasaa rumbeenoo.

Mifa narí qamunna fidika arira uainna anoonaki nammaruqinoo.

12 Mifa uainna neemarifanoo mina afu fidikandanda inoo marifanoo mimmi naamma anoona neemarifanoo afai eekara aridanoo.

13 Miqi qimasee Yudana qimamiseenoo Seeburunana quandafi afaaqooqa qinau.

Seeburuna, anee ooruku nammari afainni mari-naranoo.

Sipauqaindi nammariara rufiasee ani mandaaqasee marifara.

Ani maqa maaqa oosu Sidoona maqa maaqa ati raquru aminoo mariannoo.

14 Miqi qimasee Seeburuna qimamiseenoo Yakooboofa quanda finoo Isakaana afaaqooqa qinau.

Isakaa anee afeeka doonkiara foora mafinana narana uqauqa amuaaqa faiqaqeeia.

Yooseefaafa narí akaqaa fasaauqa aqoondikira ufa nimirau.

15 Isakaafa idooara maqusa qafuofanoo amiqinoo marufanoo kummarama fufanoo ataufakaaqa firaa ummaara quqasee maranoo nimirau. Mifa ainainira faiqiara foora ainainiannoo.

16 Yakooboofa Isakaana qimamiseenoo quandafinoo Dannaana afaaqooqa qinau.

Dannaafa narí maqannaasa uriqararafa mariannoo.

Misa Isaraee maqannaafu foora marifarannoo.

17 Anee ukadiqara foora aana afainni marinanoo qoosa fannoo aatata finana aiku raquraminanoo maqasaa aqufinanoo faiqí minasaa marina afiqu aqusainanoo aanaaqiannaindari aqufuani.

18 Yakooboofa Dannaanara miqi qimaseenoo Anutunara innaaru qinoo qinau.

Oo Yaawee qinee ani dadaaqiranara afeesidaa.

19 Miqi qimaseenoo Kadannana afaaqooqa qinau.

Kada nipuraraa fasiqauqa ani arifaranoo.

Miqifana anee quandaki nariqa nifaqee finnaranoo.

20 Miqi qimaseenoo Yakooboofa Aseeranara qinau.

Ani maqa maaqaki narana moomoo amiqirafa kai mariannoo.

Anee kinna ami mariandee ira narana kai neemarinanoo.

21 Napatari anee kaasau aandaara fooqaana maridana aneenna aidiranasaa sandana nua. Anee amiqira faiqi moomoo maqeennaranoo.

22 Yooseefaafa anee irumu miqirafa maridana nammari afainni kambiqafi aqama moomoo ireennaranoo.

23 Ani namuqaa nimudaanai qimasee nári duru feefannoo ani arirara afaqeefaranoo.

24 Miqifanoo Yooseefaana duru fannoo sia paruparuqiannoo tipu kai qinoo mariannoo. Yakooboona Anutufa aiqama afeeka faqaafa mina afeeka aminanoo mina asauku fannoo afeekaikiannoo. Mi Anutufa Isaraee maqannaasa rakisirafa misa afeeka kukeeqara maqusa maridanoo.

25 Ani akoona Anutufa ani dadaaqiannoo.

Aiqama afeeka faqaa Anutufa ani amiqi
amiqiani.

Innaarunaindaraa aakunnoo ani amiqi
amiqimma amaqaannoo.

Maqakiqari ururainna nammarifa ani amiqi
amiqirana amiani.

Ani burimakau aandau faqa faiqi aanaaqiuqa
faqa amiqi amiqimma nimaqaani.

²⁶ Moomoo taatuqeenauqa faqa sakummauqan-
noo faqa ani amiqi amiqimma amaqaani.

Ooqeenaa aaqanasaqaraa amiqi amiqirafa ani
amiqi amiqiannoo.

Naaruara marira aaqanasaqaraa amiqi amiqi-
rafa ani amiqimma amaqaani.

Oosana oosana ainaina qinee qunna amiqi
amiqirafa ani Yooseefaanasaa mariannoo.
Anee aneenna afasausa kiqari uriqararafa
marinnanasa mi ainainausa anisaa mari-
annoo.

²⁷ Miqi qimasee Yooseefaana qimamisee
quandafinoo Beensaminna qimaminau.

Beensaminna anee kaasau fainiara foora mari-
naranoo.

Anee kananaana faqa eendimarinana faqa aan-
dau arusee neennaranoo.

²⁸ Doo miqimasee Yakooboofa narí faiqi namu
indaaruqaana saa oosana araseenoo aiqama
mafi nifaaqooqa qimasanau. Miqimasoofaqa
misa qisauku qara taikasee qikunooqu qaara
marasee oosana faiqi namu Isaraee maqannaa
mariqau.

Yakooboofa kuqufuqaqa akundoo ufafa.

29 Yakooboofa nifaaqooqa qimanni-maqaseenoo maaqi qimasee narí faiqi namu qimaniminau. Qinee kaqi kaaqoo kuqiqa qeeqa qikeeku qikaaku marianaki oonu ootupaanaura. Innee sia maaqoo qikundaaqa. Ooqai Abaraqaammafa nikundara maqa feefauru maqoofa maridanoo. Qeeta maqanna Eefarona maqaki qini qikausa nikundoonaki qini faqa qikundaaqa.

30 Kannaana maqa maaqaki Makapeera maqusa Mamareena maqusa suani afu oosana qaana maridanoo. Abaraqaammafa Eefarona unnai mi maqana feefaurummaseenoo nikundanau.

31 Miqoo misa Abaraqaammana faqa mina anaqa Saraqa nammarina faqa nikundaqau. Minakikai Isakeena faqa mina anaqa Reebeeka nammarina faqa nikundaqau. Qinee minaki inni ninoona Reea nammarina akundeeqa.

32 Mi maqana faqa minakinaa ooni aamara faqa Qeeta maqannaasa unnai feefauriqia. Qini minaki qikundaaqa.

33 Yakooboofa narí faiqi namu qimannimi taikasee aiku raqandaammasee doo kuqinoo narí akeeku akaaku unnai finau.

50

Yoosefaafa narí afasausamara asoora ufa qimannimu ufafa.

1 Yakooboofa kuqu fufanoo Yoosefaafa aundura mandaikufanoo narí akoona qirisaa roofebaaqa mambufanoo narí akoona oori amooqeenoo qiki raqanau.

² Qiki raqaseenoo Yooseefaafa Isipa maqanna oosana mareenoo tutaqausa qimannimufaqa anireeqa sia kai kaqi mandaikianifeera marasinna oosana oosana akuamaqee mariqau.

³ Misa Isipa maqannaasa oosana maraseeqa qaara fasiqa niku nisauku taikasee 40 faasaanasaa marasinna Yakooboona qiri akuamaqaqau. Isipa maqanna qaaramoo fasiqa faqa qisaukuqara taikasee 70 faasaanasaa Yakooboonara iki raqaida soofaari mariqau.

⁴ Soofaarirana taikasoofanoo Yooseefaafa Faraona aaqa marusa uriqararausa qimannimino qinau. Innee maa ufana mara maree munu karaambaiqa Faraona qimamiqa.

⁵ Qini qikoofa kuqirara idanoo qima afeekaikammasee qini qima qimino qinau. Qinee kuquanana qini qiri mara maree Kannaana maqa maaqaki ooni aamara deedaqamma qaafannanaki qikundaa. Minara amanee qinee oorureeqa qeeqa qikoona minaki akundamaseeqa qumunauree.

⁶ Minara Faraofa irisee qimaminau. Doo ooruree aneenna qima afeekaikianandee inana aneenna akoona akundamasee qumua.

⁷ Yooseefaafa nari akoona akundarara oorufu faqa Faraona aaqa uriqararausa marusa faqa Faraona koota irimarusa uriqararausa faqa Isipa maqannaasa indaarunniki imaru fasiqausa faqa Yooseefaana faqa ooru fiqau.

⁸ Mina aiku asauku faqa mina afasausa mara faqa mina akoona aiku asauku akaqausa faqa aiqamausa Yooseefaana faqa ooru fiqau. Misa aandau faqa faiqi aanaaqiuqa faqa kaqi kai

Kooseena maqa maaqaki mariqau.

⁹ Akaqausa qoosasaa ooru fiqau. Akaqausa qoosa rariseemaru karanaki ooru fiqau. Yooseefaana faqa faiqí tatufufaqa ooru fiqau.

¹⁰ Misa aiqamausa suani oosana qaanai Yooradana nammari afainni sakuma faqa raisa adiuqa mara qaqimaru maqusanasaa ooruree misa firaqoo kisaaqasaa soofariqau. Yooseefaafa narí akoonara qisauku dinni taikasee dinni ani qaara marasee 7 faasaana soofarinau.

¹¹ Kannaana maqusanaasa miqoo marusa iki raqoona qafamasee qiqau. Nindafaaqa Isipa maqannaa firaqoo faqa rumasaida iki raqaida. Miqi qimaseeqa misa mi maqusana auqu Abeera Misaraima fee qimariqau. Mi auquna oosana Isipa maqannaa soofaarira maqusa fee qiqau.

¹² Yakooboona faiqi namu nári nikoofa qiman-nimundee iqau.

¹³ Misa nári nikoona qiri mara maree Kannaana maqa maaqai ooruree Makapeeraa maqa maaqaki Mamaree maqusa suani oosana qaan-nai marufaqa miqoo ooni aamaraki akundaqau. Qeeta maqanaa fasiqa mina auqu Eefarona Abaraqaammafa feefauru maqoonaki quqaqau.

¹⁴ Yooseefaafa narí akoona akundamaseenoo narí faqa fusa narí akaqaafasauqa faqa moosa faqa kafa anirandee Isipa maqusai fiqau.

Yooseefaafa narí akaqaa fasaauqa aqoondikira ufa niminau.

¹⁵ Yooseefaana akaqaa fasaauqa misa nikoofa kuqufufaqa Yooseefanara rufieeqa narí qimami

narí qimami qiqau. Ooqai maasa Yooseefaana mandaika mamaqaafanausa marida. Mina aki- iqara iannoofee.

¹⁶ Misa miqi qimaseeqa Yooseefaa funnai ufa quqaseeqa maaqi qimasee qimamiqau.

¹⁷ Oo Yooseefaa maasa qikoofa kuqiraridanoo aniara maaqi qimasee maasa qimaqiminau. Yooseefaa ani akaqaafasaa ani mandaika mamaqoonara qaunummasaa siamma iria. Misa ani mandaika mamaqoonara doo qinee mi ufana oosana iriqa. Maasa qikoofa miqi qunara minara maasa ani qimamidaqa. Ani akoona Anutuna ainainira faiqiuqa maasa ani mandaikamma amaqaafanna numoona minni qisaa. Miqi qufanoo Yooseefaafa minara iriseenoo iki raqanau.

¹⁸ Mina akaqaa fasaauqa minara iriseeqa anireeqa nariqa Yooseefaana oorinni maqasaa kummarama fufaqa qiqau. Maasa ani ainainira faiqi kakai mambi marianaaura.

¹⁹ Yooseefaafa iriseenoo qinau. Innee sia qiniara rufiaaqa. Sia qinee qeeqa qifaaqa Anutuna amaaqa maqaanaura.

²⁰ Kuqaa innee qini mandaikamma qimaqaaneera tipundaarufanoo Anutufa mina mara quandasoofanoo amiqinai. Moomoo maqee kaqi mariasa marirana dadaaqianifeera miqinai.

²¹ Sia rufiaaqa. Qinee inni faqa inni faiqi anaasee faqa narana nimida rakisi nimaqaanaura. Miqi qimasee Yooseefaafa narí ainaina nifaaqa quqaaqera qima niminai.

Yooseefaafa kuqu ufafa.

²² Miqoo Yooseefaafa Isipa maqannai narí ainaina faqa kaqi marinau.

²³ Mifa wan handereeta faqa qisauku qara faqa 110 maraseenoo kuqinau. Yooseefaafa miqoo maridanoo narí amaaku Eefaraimmana faiqi faqa qafanau narí anaiqi faqa narí afaq-nausa faqa nindafanau. Yooseefaafa Man-naaseena faiqi Makirana faiqi namu narí afaq-nausa marasee f irinau.

²⁴ Kuqiraridanoo Yooseefaafa maaqi qimasee narí ainaina qimanniminau. Qinee kuqiraram-midaqa. Qinee kuqu fuananoo Anutufa in-nisaa rakisidanoo inni indaarunnikinaqa ooqai Abaraqaammana faqa Isakeena faqa Yakoo-boona faqa qima afeekaika mandee nimiraa maqanasaa inni nindiqamaree miqoo munu quqaannoo.

²⁵ Yooseefaafa minara kai kafaa qimanniminau. Anutufa inni nifiqee finaqa qini qimudaani faqa mara mareeqa miqoo munu madikama qisaaqa. Innee minara qima afeekai kifaqa qinee iria. Misa irisee qima afeekaikammasoofanoo Yooseefaafa kuqinau.

²⁶ Yooseefaafa Isipa maqa maaqaki maridanoo wan handereeta faqa qisauku qara faqa 110 aukwana maraseenoo kuqinau. Kuqufufaqa misa sia kai kaqi putaa ianifeera mi marasinna aku amaqaaseeqa bukisaki quqaqoofanoo marinau.

Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698